

O Le Liahona



**O Le Aoao ia Fiafia i
Tusitusiga Paia, i. 14,
16, 20**

Tilotilo i Luga, Ae Le o Autafa, i. 42

**O Se Savali mo i Latou O Le
A Auauna Atu i se Misiona, i. 48**

**Tamaiti, o Lou Tausaga i le
Tusi a Mamona, i. 60**



E LE MAFAI ONA KORINA

O Le Laau o le Ola, na saunia e Wilson J. Ong

I le 1 Nifae 8, na faamatala ai e Liae le faaaliga na ia vaaia i le laau o le ola. Fai mai o ia:

“Ma sa oo ina ua uma ona ou tatalo atu i le Alii, sa ou vaaia se fanua tele ma le ateatea.

“Ma sa oo ina ou vaaia se laau, o ona fua sa manaomia lava e faafiafia ai le tagata.

“Ma sa oo ina ou alu atu ma ai i lona fua; ma sa ou iloa ua sili ona suamalie nai lo o mea uma sa ou tofo muamua i ai. Ioe, ma sa ou vaai o le fua o le laau ua paepae, ua sili atu nai lo mea paepae uma ua ou vaai i ai. . . .

“Ma sa ou vaai i se ai uamea, ma sa alu faasolo ane i le auvai o le vaitafe, ma sa tau mai i le laau lea sa ou tu ai i ona tafatafa” (1 Nifae 8:9–11, 19).



O SAVALI

4 Savali a le Au Perisitene Sili: Ola i se Olaga Faamanuiaina

Saunia e Perisitene Thomas S. Monson

7 Savali a Faiaoga Asiasi: Vaavaaiga ma le Auaunaga e ala i Faiaoga Asiasi

TALA FAAALIA

16 Sueina o Tali i le Tusi a Mamona

Saunia e Sara D. Smith

Ua faasoa mai e ni tagata se toaono se eseese ua faia e le Tusi a Mamona i o latou olaga.

I LE FAAVAA

Atavali na saunia e Jeff Ward.



20 Toe Mauaina o se Mea Ofofogia o le Lalolagi . . . ma le Aloese i le Matautia o le Musuā Faaleagaga

Saunia e Adam C. Olson

E pei o tagata suesue o e na aoaoina le tele ma le tele o mea e uiga ia Machu Picchu, e mafai foi ona tatou aoao atili e uiga i le talalelei i taimi taitasi tatou te suesue ai i ai.

24 O Le Iloaina o le Aao o le Atua i o Tatou Faamanuiaga i Aso Taitasi

Saunia e Elder D. Todd Christofferson

O le ole atu mo “a tatou mea e ai mo le aso” i aao o le Atua, e i ai sona vaega taua i le aoao e faalagolago ia te Ia.

32 Siaosi Alapati Samita: Sa Soifua e pei ona la Aoao Mai

Saunia e Ted Barnes

O se folasaga i le kosi aoaoina a le Au Perisitua Mekisateko ma le Aualofa i le tausaga lenei.

MATAGALUEGA

8 Tusigāmanatu Konafesi Oketopa

10 Auaunaga i le Ekalesia: O Le Ala a le Alii e Taitai Ai

Saunia e Craig Merrill

12 Tatou te Talanoa ia Keriso: O Faiaoga Asiasi na Taitaiina Atu Au ia Iesu Keriso

Saunia e Jayne P. Bowers

14 O Tatou Aiga, O Tatou Auaiga: Fesoasoani i Tamaiti ia Fiafia i le Tusi a Mamona

Saunia e Clyde J. Williams

38 O Leo o le Au Paia o Aso e Gata Ai

74 Tala Fou o le Ekalesia

79 Manatu mo Afiafi Faaleaiga

80 Seia Tatou Toe Feiloai: Aoao mai le Au Popoto

Saunia e George C. Robinson

TILOTILO
ILUGA

42

42 Sa Latou Saunoa Mai ia i Matou: Tilotilo i Luga

Saunia e Elder Carl B. Cook
O le a se mea e tupu pe a tatou tilotilo i luga e vaai pe o faapefea ona silasila mai le Tama Faalelagi ia i tatou nai lo le tilotilo i autafa e vaai pe o faapefea ona vaai mai isi tagata ia i tatou?



Vaai pe mafai ona e mauaina le Liahona o loo natia i le lomiga lenei. Faaitete: faa-aoga se tapasa e soipoa ai le Vasa Pasefika.

46 Tuusao i le Mataupu

48 Tausia o Feagaiga: O Se Savali mo i Latou O Le A Auauna Atu i se Misiona
Saunia e Elder Jeffery R. Holland
O loo i ai se ki e maua ai mana o le faaleatua e mafutaina i tatou i le avea ai o ni faifeautalai.

52 Autu o le Mutuale 2012

Saunia e le au peresitene aoao o Tamaitai Talavou ma Alii Talavou
“Tutulai ia ma susulu atu, ina ia avea lo outou malamalama ma tagavai mo atunuu” (MF&F 115:5).

54 Pepa Lautele o I Ai se Savali: Ia Susulu Atu

55 O Lea Mataupu ma Lea Mataupu: Mataupu Faavae ma Feagaiga 115:5

56 Mai le Misiona: Na Tali le Atua i Tatalo Uma e Lua

Saunia e Carlos Iván Garmendia Pacheco

57 Ia Faamaoni

Saunia e Elder Gérald Caussé



64

58 Maa, Aū, ma Polokiona

Saunia e David L. Frischknecht
E mafai faapefea ona ou alofia le au taufaamatau? Ia faapei o Samuelu le Sa Lamana.

60 Taumafataga o le Tusi a Mamona

Valivali le siata lenei i vaiaso taitasi pe a e faitauina le Tusi a Mamona.

63 Molimau Faapitoa: E Faapefea Ona Ou Ausia A'u Sini

Saunia e Elder M. Russell Ballard

64 Aumaia o le Peraimeri i le Fale: O Le Faitalia O se Meaalofa e Filifili ai mo i Tatou Lava**66 Tala ia Iesu: O Loo Aoao Mai le Tusi a Mamona e uiga ia Iesu Keriso**

Saunia e Diane L. Mangum

68 Faigā Uo i le Pasefika

Saunia e Jane Hansen Lassetter
Ua fefaamasania'i tamaiti Peraimeri mai Iuta ma Toga.

69 O Loo I Ai o Ia lina

Saunia e Rosemary M. Wixom
E faafofoga ma tali mai le Tama Faalelagi i tatalo a tamaiti uma lava.

70 Mo Tamaiti Laiti

52



O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Paul B. Pieper

Fautua: Keith R. Edwards, Christoffel Golden Jr., Per G. Malm

Pule Faatonusili: David L. Frischknecht

Faatonusili e Fuafuaina ma Faatonotonu:

Vincent A. Vaughn

Faatonu o Karafi: Allan R. Loyborg

Pule Faatonotonu: R. Val Johnson

Pule Faatonotonu Lagologo: Jenifer L. Greenwood, Adam C. Olson

Au Faatonu Fesoasoani: Susan Barrett, Ryan Carr
Aufaigaluega Faatonotonu: Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Jennifer Maddy, Lia McClanahan, Melissa Merrill, Michael R. Morris, Sally J. Odekirik, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

Pule Faatonusili o Faatufugaga: J. Scott Knudsen

Faatonusili Tusiata: Scott Van Kampen

Pule i le Gaosiga: Jane Ann Peters

Au Mamanu Sinia: C. Kimball Bott, Thomas S. Child, Colleen Hinckley, Eric P. Johnsen, Scott M. Mooy

Aufaigaluega e Mamanuina ma Gaosia: Collette Nebeker Aune, Howard G. Brown, Julie Burdett, Reginald J. Christensen, Kim Fenstermaker, Bryan W. Gygi, Kathleen Howard, Denise Kirby, Ginny J. Nilson

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo O le okaina o mekasini, alu i le store.lds.org po o le Falefusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonu" e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Itonesia, Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatenama. (E eseese lava gagana.)

© 2012 Puletaofia e le Intellectual Reserve, Inc. Ua taofia aia tatau uma. Lomia i le lumaite Setete o Amerika.

E mafai ona kopi tala ma ata o le Liahona mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

January 2012 Vol. 36 No. 1. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Faaopoopoga o loo maua i le Initoneti Liahona.lds.org



MO TAGATA MATUTUA

O nisi o tusiga o lenei lomiga o loo talanoa mai e uiga i tusitusiga paia, ae maise lava o le Tusi a Mamona (tagai i itulau 14, 16, ma le 20). I le konafesi aoao ia Aperila 2010, na saunoa ai Elder David A. Bednar i auala e mafai ai e le suesue i le Tusi a Mamona ona faamalolosia aiga. Ina ia faitau pe faalogologo i lana saunoaga, asiasi i le lds.org/general-conference/2010/04/watching-with-all-perseverance.

Na tuuina mai e se taitai o maimoaga taamiloiu i Machu Picchu ni fautuaga se tolu mo le suesueina o le talalelei (tagai i le itulau e 20). Tagai i nisi o ata o lenei mea ofoofogia a le lalolagi i le liahona.lds.org.

MO LE AUTALAVOU

A uma ona faitauina le fautuaga a Elder Holland mo i latou o e o le a auaua atu i se misiona, e mafai ona e maua nisi fautuaga ma faamatalaga e uiga i le galuega faafaifeautalau i le <http://lds.org/study/topics/missionary-work>.

AUTU I LENEI LOMIGA

E ta'u mai e numera le itulau muamua o le tusiga.

Agelu, 47

Aiga, 14, 16, 79

Alofafia, 7, 12, 32

Amio po o uiga faaalua, 4, 42, 52, 69

Aoao atu, 14, 80

Auauna atu, 10, 12, 24, 32, 38, 46

Faamoemoe, 4, 16

Faaitaiga, 52, 54, 59, 70, 72

Faatuatua, 24, 59, 69

Faauo, 47, 68

Faiaoga asiasi, 7, 12

Faiaoga o aiga, 10

Faitalia, 24, 64

Feagaiga, 48

Galuega Faafaifeautalau, 8, 32, 39, 41, 46, 48, 56, 70, 72

Iesu Keriso, 24, 40, 66, 80

Liua, 16

Mulimuli i le Agaga, 41

Mutuale, 52, 54, 55

Perofeta, 32

Salamo, 16

Samita, Siaoasi

Alapati, 32

Sini, 69

Suesue i tusitusiga paia, 14, 16, 20, 40, 55, 60

Taitaiga, 10

Talafaasolopito o le Ekalesia, 32

Tatalo, 8, 24, 38, 42, 55, 58, 69

Toa, 4, 8, 57

Tofotofoga, 24, 40


Tosina i le itupa tutusa, 47

Tusi a Mamona, 14, 16, 20, 40, 60, 66

Vaisu, 16

I LAU GAGANA

O loo maua le Liahona ma isi tusi a le Ekalesia i le tele o gagana i le languages.lds.org.

Saunia e Peresitene
Thomas S. Monson

OLA I SE Olaga Faamanuiaina

Ile amataga o lenei tausaga fou, ou te tuuina atu se lu'i i le Au Paia o Aso e Gata Ai i atunuu uma ina ia faia se saililiga patino, filiga, ma le taua mo le mea ua ou ta'ua o le olaga faamanuiaina—o se olaga ua faatumulia i le tele o mea na ausia, mea lelei, ma faamanuiaga. E pei ona tatou aoaoina le AEI i le aoga, ou te ofoina atu foi la'u AEI ina ia fesoasoani ia i tatou uma ia maua le olaga faamanuiaina.

Ia I Ai se Amio po o se Uiga Lelei

O le A i la'u AEI e faatatau lea i le amio. Na tusia e William James, o se paionia Amerika e suesueina le mafaufau ma tulaga faalelotu, faapea, “O le taua sili lava o loo tauina e o tatou tupulaga o le iloaina lea, e mafai e tagata soifua ona suia o latou olaga, e ala mai i uiga po o amio i totonu o o latou mafaufau.”¹

O le tele lava o le olaga e fuafua ia tatou amioga ma uiga. O le auala tatou te filifili e vaai ai i mea ma tali atu ai i isi e matua tele lava

sona aafiaga. O le faia o le mea sili tatou te mafaia ona filifili lea ia fiafia e uiga i o tatou tulaga, e tusa lava po o le a, o le a mafai ai ona aumaia le filemu ma le faamalieina.

Na fai mai Charles Swindoll—o se tusitala, faiaoga, ma se faifeau Kerisiano—: “Ia te au lava ia, o le amio po o uiga faaalua e sili atu le taua nai lo. . . mea ua tuanai, . . . nai lo tupe, nai lo tulaga, nai lo toilalo, nai lo manuia, nai lo manatu po o tala po o mea e fai e isi tagata. E sili atu le taua nai lo foliga vaaia, faameaalofaina, po o le tomai. E mafai ona fausia ai pe gausia ai se kamupani, se ekalesia, se aiga. O le mea sili ona ofoofogia o le i ai lea o sa tatou filifiliga i aso uma e faatatau i le amio o le a tatou opogiina mo lena aso.”²

E le mafai ona tatou faatonuina le matagi, ae e mafai ona tatou fetuunaia ia la o a tatou vaa. Mo le faatapulaaina o le fiafia, filemu, ma le faamalieina, talosia tatou te *filifilia* se amioga lelei.

Talitonu ia te Oe Lava Ia

O le E e mo le talitonu—ia te oe lava ia, ia i latou o loo siomia oe, ma i mataupu faavae e faavavau.



Ia e faamaoni ia te oe lava ia, i isi, ma lou Tama Faalelagi. O Katinale Wolsey o sē tasi e le'i faamaoni i le Atua seia oo ina ua matua tuai lava ma o lē, sa ta'ua e Siekisipia, na ia faaalaina se taimi umi o lona olaga e auauna atu ai i ni tupu se toa-tolu ma fiafia ai i le tamaoiga ma le malosi. Mulimuli ane, na aveesea lona malosi ma le tamaoiga e se tupu e le lava le onosai. Na tagi Katinale Wolsey ma faapea:

*Pe a na fai lava ou te auauna
i lo'u Atua ma le afa o le
naunautai
Sa ou auauna ai i lo'u tupu,
semanu Na te le
Tuua lava a'u ua lē lavalavā
i o'u fili.*³

O Thomas Fuller, o se tagata lotu Peretania ma se tusitala o talafaasolopito lea na ola i le seneturi lona 17, na tusia le upu moni lenei: "O lē e le ola e tusa ma lona talitonuga, e le talitonu moni lava."⁴

Aua e te tuuina oe lava i lalo ma aua e te faatagaina isi e faatalitonu oe faapea e tapulaa mea e te mafai ona faia. Ia e talitonu ia te oe lava ia ma ia e ola ina ia ausia mea e te gafatiaina.

E mafai ona e ausia mea e te talitonu i ai. Faamoemoe ma talitonu ma ia faatuatua.

la Lototoa e Fetaiai ma Luitau

O le I e mo le lototoa. E avea le lototoa ma se uiga lelei taua ma le aoga pe afa e le mafaufau tele i ai faapea o se naunautaiga ia oti ai faatamatane, ae o se naunautaiga ina ia ola tauagafau.

Fai mai le tagata tusitala Amerika ma se fatusolo o Ralph Waldo Emerson: "Po o le a lava sau mea e fai, e te manaomia lava le lototoa. Po o le a lava se ala e te filifilia, e i ai pea lava se tasi e ta'uina atu ia te oe e te sese. E i ai pea lava faafitauli o loo tutupu ae e faaosoosoina oe ina ia e talitonu e sa'o lau au faitio. Ina ia fuafuaina se faatinoga e fai ma mulimuli ai seia oo i le iuga, e manaomia le ituaiga lototele lea foi e manaomia e se fitafita. E i ai manumalo i le filemu, ae e moomia ia alii ma tamaitai lototetele ina ia manumalo ai."⁵

O le a i ai taimi o le a outou fefefe ma lotovaivai ai. Atonu o le a outou lagona ua faatoilaloina outou. O isi mea e maua ai le manumalo atonu e foliga lofituina. E i ai taimi atonu e te lagona ai le pei o Tavita o loo taumafai e tau ma Koliata. Ae ia manatua—na manumalo lava Tavita!

E manaomia le lototoa e faia ai se uluai taumafaiga e agai atu ai se tasi i se sini o naunau i ai, ae e sili atu le manaomia o le lototoa pe a tautevateva se tasi ma ua tatau ai ona faia se taumafaiga lona lua ina ia ausiaina.

Ia i ai se naunautaiga e faia ai se taumafaiga, o le manatu tasi e galue

agai i se sini aoga, ma le lototoa e le na o le feagai ai ma luitau lea e mautinoa lava e oo mai ae e tatau foi ona faia se taumafaiga lona lua, pe a manaomia. "O nisi taimi, o le lototoa o se leo lemu lea e faapea mai i le faaiuga o le aso, 'O le a ou toe taumafai foi a taeao.'"⁶

Ia tatou manatua nei AEI a o amata la tatou malaga i le tausaga fou, i le atiina ae o se amio e lelei, se talitonuga e mafai ona tatou ausia a tatou sini ma folafolaga, ma le lototoa e feagai ai ma soo se luitau e oo mai ia i tatou. Ona fai ai lea mo i tatou le olaga faamanuaina. ■

FAAMATALAGA

1. William James, i le Lloyd Albert Johnson, tuufaatasia, *A Toolbox for Humanity: More Than 9000 Years of Thought* (2003), 127.
2. Charles Swindoll, i le Daniel H. Johnston, *Lessons for Living* (2001), 29.
3. William Shakespeare, *King Henry the Eighth*, vaega 3, vaaiga 2, laina 456–58.
4. Thomas Fuller, i le H. L. Mencken, fa., *A New Dictionary of Quotations* (1942), 96.
5. Ralph Waldo Emerson, i le Roy B. Zuck, *The Speaker's Quote Book* (2009), 113.
6. Mary Anne Radmacher, *Courage Doesn't Always Roar* (2009).

AOAO ATU MAI LENEI SAVALI

Ma faufau e valaaulia tagata o le maiga e faasoa mai ni aafiaga o le tagata lava ia ina ua fesoasoani ia i latou se uiga faaalua lelei, talitonuga ia i latou lava, po o le lototoa. Pe valaaulia foi i latou e sue ni faataitaiga o mataupu faavae nei e tolu i tusitusiga paia. E mafai foi ona e sauniuni e aoao atu e ala i le mafaufau ma le agaga tatalo i mau po o ni ou lava aafiaga.

Lototoa e Tatalia ai le Afa Saunia e Maddison Morley

I le po lona lua o le tolauapiga a Tamaitai Talavou o le matou siteki, sa matua mamafa timuga ma se asiosio. Pe tusa ma le 24 tamaitai talavou o la'u uarota sa i ai i le tolauapiga faatasi ai ma ni taitai se toalua, ma sa matou taufaaofiofi uma i se tama'i fale. Sa matua mamafa timuga, ma sa faasolo ina malosi le matagi. Sa ou faamanatu pea lava pea ia te a'u lava ia le tatalo mo le saogalemua lea sa faia e lo matou peresitene o le siteki i se taimi ua mavae. Sa fai foi le tatalo a le matou lava vaega o le matou uarota i lo matou fale, ma sa ou faia foi a'u lava tatalo.

O le toatele o teineiti na fefefe, ma na iloagofie le mafuaaga. E le malosi tele lo matou fale, ma sa matou i ai i tafatafa tonu o se vaitafe. Pe tusa ma le 20 minute na matua malosi ai lava le afa, ma o lea na tamomoe uma ai le siteki mai fale o a latou uarota i fale o le au fesoasoani, sa maualuga le nofoaga na i ai. Sa toe fai foi e lo'u peresitene o le siteki le isi tatalo, ma matou usuina ni viiga, pese o le Peraimeri, ma pese o le tolauapiga i se taumafaiga e faamafanafanaina i matou lava. Ioe, na matou fefefe, ae na matou lagona o le a lelei mea uma. Na mavae se afa itula mulimuli ane, ona mafai ai lea ona matou toe foi i fale o a matou uarota.

Na matou iloa mulimuli ane le mea na tupu i le asiosio i lena po. Na vaeluaina i ni afa se lua. O le isi na faataamilomilo ia i matou i le itu taumatau a o le isi i le itu tauagavale. O le vaega na matou aafia ai e le'i taitai lava oo i lona malosi!

Ou te iloa sa faafofoga mai le Atua i a matou tatalo i lena po ma sa la puipuia i matou mai le ogaoga o le afa. Aisea o le a vaeluaina ai se asiosio pe a le finagalo ai le Atua? Ou te iloa i afa o le olaga, e mafai ona tatou tatalo i taimi uma i le Tama Faalelagi ma o le a la faafofogaina ma tali mai ia i tatou, ma aumaia le lototoa ma le puipuiga tatou te manaomia ina ia tatou saogalemua ai.

Taitai'au o Moronae

Sa lototoa Taitai'au o Moronae a o feagai o ia ma Sluitau. Sa fialia o ia i le upumoni, saolotoga, ma le faatuatua. Sa tuuto atu lona soifua e fesoasoani ai ia Sa Nifae e tausisia lo latou saolotoga. E mafai ona avea oe e faapei o Taitai'au Moronae e ala i le faafaetaia'ia o ou luitau i le lototoa. E mafai foi ona e faia lau lava tagavai o le saolotoga i lou tusiaina lea i le fu'a o loo i lalo ifo, po o se isi fasipepa o mea e taua ia te oe ma lou aiga.

O Fea e Maua Atili Ai

Alema 46:11–27: O le tagavai o le saolotoga

Alema 48:11–13, 16–17: O uiga 'au'au mamā o Moronae



Suesue i mea nei, ma pe a talafeagai ai, ia talanoaina faatasi ai ma uso e te asia. Faaoga fesili e fesoasoani ai ia te oe e faamalolosa ai ou uso ma avea ai le Aualofa ma se vaega ola o lou lava olaga.

Vaavaaiga ma le Auaunaga e ala i Faiaoga Asiasi

Na aoa mai Peresitene Henry B. Eyring, Fesoasoani Muamua i le Au Peresitene Sili, “O le alofa moni o lona [uiga], e matua sili atu i lo na o se lagona o le agalelei. O le alofa moni e afua mai i le faatuatua i le Alii o Iesu Keriso ma o se aafiaga o Lana Togiola.”¹ Mo uso o le Aualofa, o faiaoga asiasi e mafai ona avea ma se faatinoga o le alofa moni, o se auala taua e faaoga ai lo tatou faatuatua i le Faaola.

E ala atu i faiaoga asiasi, tatou te tuuina atu ai le vaavaaiga e ala i le faafesootaia o uso taitoatasi, faasoa atu se savali o le talalelei, ma saili ia iloa ona manaoga ma manaoga o lona aiga. Ua faamalamalama mai e Julie B. Beck, peresitene aoao o le Aualofa. “E avea faiaoga asiasi ma galuega a le Alii pe a tuu atu la tatou tulimata’iga i tagata ae le o pasene. O le mea moni, e le uma lava faiaoga asiasi. E mafuli i se ala e ola ai nai lo se feau. O le tautua ma le faamaoni e avea o se faiaoga asiasi, o se faamaoniga lea o lo tatou tulaga o ni soo.”²

A o tatou tuuina atu e le aunoa ma le agaga tatalo le vaavaaiga ma le puipuiga, tatou te aoao ai auala e sili ona lelei e auauna atu ai ma taulima ai manaoga o uso taitoatasi ma lona aiga. O le auaunaga e tele ituaiga auala e faia ai—o nisi e tetele ae o nisi e le tetele tele foi. Na aoa mai Peresitene Thomas S. Monson, “E masani lava o nai faatinoga laiti o le auauna atu ona pau na o mea o loo moomia e siitia ai ma faamanuia ai se tasi: o se fesili e



faatatau i le aiga o se tagata, o upu faatopetope o le faamalolosauga, o se faamalo mai le lotu, o sina faaupuga laititi o le faafetai, o se valaau puupuu atu i le telefoni. Afai tatou te mataitu ma iloa, ma afai tatou te faatino i uunaiga ia e oo mai ia te i tatou, e mafai ona tele mea lelei tatou te faataunuaina. . . . E le mafaitaulia faatinoga o le auaunaga ua faia e le toatele o faiaoga asiasi o le Aualofa.”³

Mai Tusitusiga Paia

Ioane 13:15, 34–35; 21:15; Mosaea 2:17; Mataupu Faavae ma Feagaiga 81:5; Mose 1:39

O Le a se Mea e Mafai ona Ou Faia?

1. O le a la’u mea o fai e fesoasoani ai i o’u uso ia lagonaina o a’u o se uo e alofa ma popole mo i latou?
2. E mafai faapefea ona ou lelei atili i le vaauga ma le tausiga o isi?

Faatuatua, Aiga, Toomaga



Mai lo Tatou Talafaasolopito

I le 1843, sa vaevaaina ai tagata o le Ekalesia i Navu, Illinois i ni uarota se fa. O lulai i lena tausaga, sa tofia ai e taitai o le Aualofa se komiti asiasi o tuafafine e toafa mo uarota taitasi. O tiute-tauave o komiti asiasi na aofia ai le fuafuaina o tulaga manaomia ma le aoina o foai. Sa faaogaina e le Aualofa nei foai e saunia ai fesoasoani ma le toomaga mo e le tagolima O lulai i lena tausaga, sa tofia ai e taitai o le Aualofa se komiti asiasi o ni tuafafine e toafa mo uarota taitasi. O tiute-tauave o komiti asiasi na aofia ai le fuafuaina o tulaga manaomia ma le aoina mai o foai. Sa faaoga e le Aualofa nei foai e tausua ai e le tagolima.⁴

E ui ina le toe aoina mai e faiaoga asiasi ia foai, ae o loo latou tauaveina pea le tiute-tauave o le fuafuaina o tulaga manaomia—faaleagaga ma faaletino—ma galulue e faafetauia na manaoga. Sa faamalamalama mai e Eliza R. Snow (1804–87), o le peresitene aoao lona lua o le Aualofa: “O se faiaoga . . . e tatau ona matua tele ai le Agaga o le Alii, pe a ia ulufale atu i se fale e iloa ai po o le a le agaga la te feiloai iina. . . . Ole atu i le Atua ma le Agaga Paia ia maua [le Agaga] ina ia mafai ona e feiloai i lena agaga o loo i ai i lena fale . . . ona mafai lea ona e lagona e tautala atu i upu o le filemu ma le mafanafana, ma afai e te maua atu se uso o maalili, ia e aveina o ia i lou lotu e faapei ona e opoina o se tamaitiiti i lou fatafata ma faamafanafana [ia te ia].”⁵

FAAMATALAGA

1. Henry B. Eyring, “O Le Talatuu Mausali o le Aualofa,” *Liahona*, Nov. 2009, 121.
2. Julie B. Beck, “O Le Aualofa: O Se Galuega Paia,” *Liahona*, Nov. 2009, 114.
3. Thomas S. Monson, “O Sini e Tolu e Taialaina ai Oe,” *Liahona*, Nov. 2007, 121.
4. Tagai i le *O Afafine i Lo’u Malo: O Le Talafaasolopito ma le Galuega a le Aualofa* (2011), 113.
5. Eliza R. Snow, i le *O Afafine i Lo’u Malo*, 116.

Tusigāmanatu Konafesi Oketopa

“O le mea ua fai atu ai au le Alii, ua ou fai atu ai lava; . . . pe fai atu i lo’u lava leo po o le leo o a’u auauna, ua tusa lava ia” (MFF 1:38).

A o e iloiloaina le konafesi aoao ia Oketopa 2011, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoa-soani ai ia te oe e suesue ma faaaoga aoaoga talu ai nei a perofeta soifua ma aporetolo.



TALA MAI LE KONAFESI

Lototele e Tu Na o Oe

Ou te talitonu o lo’u aafiaga muamua lava i le mauaina o le lototele i ou talitonuga na tupu a o ou tautua ai i le Neivi a le Iunaite Setete i le faaiuga o le Taua Lona Lua a le Lalolagi. . . .

Ou te manatua pea le Aso Sa ina ua uma le vaiaso muamua [o le uluai toluapiga faigata]. Sa matou maua ai se talafou fiafia mai le ofisa sinia. A o matou tutu sa’o ai ma faamalō i le malae o aoaoga i se savili mālū o Kalefonia, sa matou faalogo i lana faatonuga: ‘O le aso lenei e o uma ai tagata i le lotu—tagata uma lava, vagana ai a’u. O le a ou ala e malololē! Ona ia alaga mai lea, ‘Outou uma o Katoliko, potopoto i le Camp Decatur—ma aua nei outou foi mai seia ta le itula e tolu. Savavali i luma!’ Sa o ese atu se vaega tele o tagata. Ona toe alaga mai foi lea o le isi ana faatonuga, ‘O outou na o le au Iutaia, tou te potopoto i le Camp Henry—ma aua nei outou foi mai seia ta le itula e tolu. Savavali i luma!’ Sa savavali ese atu sina vaega tolaaiti o latou. Ona ia fai mai lea, ‘Outou uma na e totoe o Porotesano, tou te potopoto i le falefaafiafia o le Camp Farragut—ma aua nei toe foi mai seia ta le itula e tolu. Savavali i luma!’

“O lena lava taimi na oo mai ai le manatu i lo’u mafaufau, ‘Monson, e le o oe o se Katoliko; e le o

I lena taimi faatoa ou iloa ai e i ai isi tagata o loo tutu i o’u tua atu i le malae o aoaoga.



oe o se Iutaia; e le o oe o se Porotesano. O oe o se Mamona, ia tu ai pea iina!’ Ou te faamautinoa atu ia te outou sa ou lagona atoa le tuua na o a’u. Sa lototele ma naunautai, ioe—ae sa tuuatoatasi.

“Ona ou faalogo atu lea i upu e sili ona mālū faato’a ou faalogo ai lava ua fai mai e se ofisa sinia. Sa ia tilo-tilo mai ia te au ma fesili mai, ‘A o le a le igoa e faaigoa ai outou alii?’ I lena taimi faatoa ou iloa ai e i ai isi tagata o loo tutu i o’u tua atu i le malae o aoaoga. Toe ititi lava matou tali faatasi atu uma, ‘Mamona!’ E faigata ona faamatalaina le olioli sa faatumulia ai lo’u loto ina ua ou falii atu ma vaaia sina vaega toaititi o isi seila.

“Sa valu le ulu o le ofisa sinia i se faailoga o le le maotonu ona fai mai lea, ‘Ia, o e sue se mea tou te potopoto ai. Ma aua nei foi mai seia ta le itula e tolu. Savavali i luma!’ . . .

“E ui lava sa ese se taunuuga o le aafiaga mai le mea sa ou faamoemoe i ai, ae sa ou loto lava e tu atu na o au, i le mea sa talafeagai ai.

“Talu mai lena aso, na i ai taimi sa leai ai se tasi na tu i o’u tua atu ma o lea sa ou tu ai na o au. Ou te matua faafetai lava aua sa ou faia le faaiuga i se taimi ua leva ia tumau malosi ma le faamaoni, ia saunia i taimi uma ma sauni e puipui la’u tapuaiga.”

Peresitene Thomas S. Monson, “Ia Lototele e Tu Na o Oe,” *Liahona*, Nov. 2011, 61–62.

O fesili e manatunatu loloto i ai:

- O le a le aafiaga e i ai i isi ona o lo tatou tutu ma le malolosi?
- Pe mafai ona e manatua se taimi na tofotofoina ai lou lototele ma ou talitonuga maumaututu? Na faapefea ona e tali atu i ai?
- O le a se mea e mafai ona tatou faia e saunia ai i tatou lava e tutu atu ma le malolosi?

Mafaufau e tusi ou mafaufauga i se api talaaga pe talanoaina foi ma isi.



O isi punaao e faatatau i lenei autu: Taiala i Tiususiga Paia, “Lototele, Lototoa”; Thomas S. Monson, “O Le Valaau mo le Lototoa,” *Liahona*, Me 2004, 54–57; Suesue e ala i Autu i le LDS.org, “Peer Pressure”; *Mo Le Malosi o le Aulavou*, “Ia Agai i Luma ma le Faatuatua.”

Ina ia faitau, matamata, pe faalogologo foi i lauga o le konafesi aoao, asiasi ane i le conference.lds.org.

Alu ma Fai

Na aoao mai Elder L. Tom Perry o le Korama a Aposetolo e Toasefululua e faapea, ina ia faalauteleina se malamalamaaga i le Ekalesia, e tatau ona tatou:

Mai le "O Le Alofa Atoatoa e Faateaeeseina ai le Fefe," *Liahona*, Nov. 2011, 42–43.



1. "Lotototoa i a tatou tautinoga e uiga ia Iesu Keriso. Tatou te mananao i isi ia iloa tatou te talitonu o Ia o le tamalii e sili ona taua i le talafaasolopito o tagata uma."

2. "Avea ma se faataitaiga amiotonu i isi... E tatau ona avea o tatou olaga ma faataitaiga o le lelei ma uiga mama, a o tatou taumafai e mulimuli i Ana faataitaiga i le lalolagi."

3. "Talanoa e uiga i le Ekalesia. I le gasologa o o tatou olaga i aso uma, ua faamauiaina lava i tatou i le tele o avanoa e faasoa atu ai i isi mea ua tatou talitonu i ai."

Folafolaga Faaperofeta

Eleai se aso ua alu ou te le fesootai atu ai i lo'u Tama i le Lagi e ala i le tatalo. O se sootaga ou te faamemelo i ai—o le a ou leiloa moni pe a aunoa ma lea sootaga. Afai e le o i ai ia te oe i le taimi nei sea sootaga ma lou Tama i le Lagi, ou te aioi atu ia te oe ia galue agai i lena sini. A o e faia lena mea, o le a e aiā ai i Ana musumusuga ma le taitaiga i lou olaga—o mea e manaomia mo i tatou uma taitoatasi pe afai tatou te fia ola faaleagaga i taimi o la tatou malaga iinei i le lalolagi. O ia musumusuga ma taitaiga o ni meaalofa Na te foai fua mai ia i tatou pe afai tatou te saili atu i ai."

Peresitene Thomas S. Monson, "Tutu i Nofoaga Paia," *Liahona*, Nov. 2011, 84.

FAATUMU LE AVANOA

1. "O le suesue ma le agaga tatalo o le _____ o le a fausia ai le faatuatua i le Atua le Tama, i Lona Alo Pele, ma i Lana talalelei. O le a fausia ai lou faatuatua i perofeta a le Atua, o anamua ma ona po nei. E mafai ona e latalata atili ai i le Atua nai lo se isi lava tusi. E mafai ona suia ai se olaga mo le lelei." (Henry B. Eyring, "O Se Molimau," *Liahona*, Nov. 2011, 70.)
2. "O Se _____ e oo ina avea ma se uo tumau e le faavaivaia i le gasologa o taimi." (Richard G. Scott, "O Le Mana o Tusitusiga Paia," *Liahona*, Nov. 2011, 6.)
3. "Mo i latou e manatu o luitau o latou fetaiai e le talafeagai, o le _____ ua totogiina ia mea uma e le talafeagai o le olaga." (Quentin L. Cook, "O Pese e Le Mafai Ona Latou Usuina," *Liahona*, Nov. 2011, 106.)
4. "A ia i tatou le _____, ua tatou naunau e auauna atu ma fesoasoani i isi pe a faigata, ma e aunoa ma se mafaufau i se tau i pe faalauiloa. (Silvia H. Allred, "E Le Uma le Alofa," *Liahona*, Nov. 2011, 115.)

Tait: 1. o le Trust a Mamona; 2. mau e taulotoina; 3. Togiola; 4. alofa mama.

OLE ALA A LE ALII E TAITAI AI

Saunia e Craig Merrill Faatonu, Polokalama
Matuaofaiva o le Pulega o Pisinisi i le BYU

*A o tatou auauuna ma taitai i le
ala ua faatonuina mai e le Alii,
po o le a lava lo tatou valaauga,
o le a tatou faamanuiaina isi
ma faamanuiaina foi i tatou.*

I na ua tofia Uso Sione ma lona atalii o ni faiaoga o aiga i le auuiga o Viliamu, sa amata ona la faia ni asiasiga faalemasina. Na ala atu i na asiasiga, na iloa ai e Time, o se afafine o le aiga, sa alolofa i laua [faiaoga o aiga] ia te ia. Sa tele ni ana fesili sa i ai e uiga i le talalelei ma sa fiafia i a latou talanoaga ma i laua.

I se tasi taumafanafana a o taumafai Time ia iloa pe na i ai sana molimau, sa talosagaina ai Uso Sione, ma se isi alii na umia le Perisitua Mekisateko, e auai atu i le tolauapiga a Tamaitai Talavou. Sa fai mai mulimuli ane Time i le taua ia te ia o le i ai o lona faiaoga o aiga iina. Sa ia ta'u atu i lona aiga sa ia maua se molimau i le alofa o le Faaola mo ia, ina ua tuuina atu e Uso Sione ma le isi alii e umia le perisitua, ina ua ia talosagaina, sona faamanuiaga faaleperisitua i le tolauapiga.

O ona faiaoga o aiga na avea, i le agaga moni lava, o ni uo i le auuiga o Viliamu. Na taua la la'ua uunaiga ia Time ma ona matua—ma i le Alii.

Taitaiga ma Valaauga

I le lalolagi i aso nei, e masani ona fua le tuputupu ae patino o se tagata i tulaga tofi e faateleina pea i galuega, pe e ala i le siitaga o totogi lea e faailoa ai le faateleina o mea e ausia e le

tagata lava ia. E masani ona tatou vaai i tulaga tofi e iloagofie o se faailoaga o le tagata o se tagata fai saofaga taua. E le o se mea la e faateia ai le toatele o tagata e tauivi ia iloa le auala e sili ona lelei e fua ai lo latou tuputupu ae i mea faaleagaga.

Ua ou faalogo i le toatele o le Au Paia o Aso e Gata Ai o fesiligia o latou lava tulaga ona e le'i valaauina i latou i ni tofiga faaleautaitai i le Ekalesia. Ae pe o fuaina lelei ea lo tatou alualu i luma i valaauga faaleautaitai?

O le mea moni, o le taitaiga e le manaomia ai se valaauga. O nisi o tagata o e faaogaina uunaiga faagaetia ma faamalosiua e faavae ai taitaiga moni, e faia lea ma le leai o se valaauga po o se tofiga. O loo aoao mai i le Mataupu Faavae ma Feagaiga 121 nisi o lesona taua e uiga i le tulaga faaletaitaiga:

“Ua tatou aoao e ala i mea faanoanoa e tutupu mai e faapea o le natura ma le uiga o le toetiiti lava o tagata uma, o le vave lava latou te maua ai sina pule itiiti, e pei lava ona latou faaogaina o le puleaga amioletonu.

“O lena e toatele ai e e valaaulia, ae toaitiiti e ua filifilia.

“E leai se mana po o se aafiaga e mafai pe tatau ona faatumauina ona o

le perisitua, nao i le faatauanau, i le tali-tiga, i le agamaualalo ma le agamalu, ma le alofa faamaoni;

“I le agalelei, ma le malamalama manino, lea o le a faalatele tele ai le agaga e aunoa ma le pepelo, ma aunoa ma le faa'ole'ole” (fuaiupu 39–42).

E masani ona fenunia'i le taitaiga ma le ta'u atu i tagata o le mea e fai. O lena mea e mafai ona oo atu ai i puleaga amioletonu. O le a le talafeagai le faapea atu, “E tatau ona e faia le mea ou te fai atu ai aua ua ou (umia le perisitua pe ua valaauina e ala i le perisitua) fai atu ai.” O se lesona taua i le vaega e 121 e faapea, o se taitai moni e le tuuina atu le taitaiga ma faamoemoe ia mulimulitaia ona o le tofiga. Ae, o le taitaiga faaleperisitua e faatatau i le valaaulia. O se valaaulia agalelei, e faavae i le malamalama mama ma le alofa moni, o le a avea ma se faaosofiaga sili atu nai lo o le “Ona ua ou fai atu ai.”

E moni o taitai o e matele i le tuuina atu o faatonuga e tele ni mea e mafai ona faia ai. Peitai latou te le o taitai i le ala ua faaalai mai e le Alii. Ma latou te le o atiina ae le malosi e faalagolago ai le tagata ia te ia lava ma le talitonuga lea e tatau ona i ai ia i latou o loo latou taitaia.



Taitaiga Moni

Ia matau o se valaauga po o se tulaga e pule ai e le o lisiina i fuaiupu e 41 po o le 42 o se tasi o auala talafeagai e faaoga ai le pule po o faamalosiuga. Ae, o le pule ma faamalosiuga a se taitai moni e faaogaina e ala i le faatauana, tali-tiga, agamaualalo, agamalu, ma le alofa faamaoni, agalelei, ma le malamalama manino. O uiga nei o le taitaiga moni e mafai ona faaalua e tagata uma, e tusa lava po o le a le valaauga po o le tulaga.

O valaauga faaletaitai e pei uma lava o ni pa'u e i autafa o se uila. O pa'u i autafa o se uila e mafai ai e se tamaitiiti ona aoao i auala e faapaleni ai ma tietie ai ma le to'a lelei. O se valaauga faaletaitai e tuu ai tagata i se tulaga e aoao ai ia alofa, ia onosai, ma faatauana atu e ala i le malamalama manino ma le agalelei. E mafai foi ona latou iloa o soo se taumafaiga lava e faamalosi se amioga, e o faatasi ma le aveesea ai o le Agaga ma faaititia ai le ta'uaogaina.

A uma ona faamalolo i tatou, o le a tatou iloa ai pe na tatou tuputupu ae ma aoaoina a o tatou i ai i lo tatou valaauga. Pe na tatou aoao ea ia alofa ma auuana atu i isi e aunoa ma le valaauga e uuna'i ai? Pe na tatou aoaoina ea ia auuana atu ma le mana o se faatosinaga mo le lelei ona o tagata ua avea ai i tatou?

O le a valaau mai pea lava pea le Alii ia i tatou i o tatou olaga. Na te silafia o tatou loto. O le a Ia valaau mai ia i tatou pe a Ia manaomia o tatou tomai faapitoa, atamai, po o le mataala i le Agaga. O le a Ia valaau ia i tatou e tusa ai ma lo tatou naunautai e faalogo i Lona siufofoga ma alofa atu e pei ona Ia alofa mai.

A tatou iloa ona avea ma se faatosinaga mo le lelei i le ala a le Alii, o le a avea i tatou ma tagata o e siitia isi aua o tagata na e i ai i tatou. O le a le avea valaauga ma pogai atu mo a tatou faatosinga lelei. Ae, pe a talosagaina ai, o le a tatou tautua lelei i mea e tofia i ai i tatou i le Ekalesia.

O LE AVEA MA SE SOO FAAMAONI

“O taitai uma o le Ekalesia ua valaauina e fesoasoani i isi tagata ia avea ma ‘soo moni o . . . Iesu Keriso’ (Moronae 7:48). . . .

“O le ala sili e mafai ai e taitai ona aoao atu isi e avea ma ‘soo moni’ o a latou faaitaiga faaletagata lava ia. O lenei mamanu—o le avea ma se soo faamaoni ina ia fesoasoani ai i isi e avea ma soo faamaoni—o le faamoemoega lea i tua atu o valaauga uma i le Ekalesia.”

Tusitaulima 2: Taitaiina o le Ekalesia (2010), 3.1.

Pe tatou te auuana atu i le Aoga Sa po o polokalama a le autalavou, o se faiaoga o aiga po o se faiaoga asi, po o se epikopo foi po o se peresitene o le Aualofa, o la tatou auuana i isi o le a avea o se faaliga o lo tatou alofa i le Faola. A o tatou auuana atu ma taitai i le ala ua Ia faasino mai, po o le a lava lo tatou valaauga, o le a faapea ona tatou faamanuia atu ma faamanuina ai foi. ■

○ Faiaoga Asiasi

NA TAITAIINA ATU AU IA IESU KERISO

Saunia e Jayne P. Bowers

“Ua fetalai faatolu atu [le Alii] ia [Peteru], Pe e te alofa mai ia te au? Ua fai mai [Peteru] ia te ia, Le Alii e, ua e silafia mea uma; ua e silafia ua ou alofa lava ia te oe. Ona fetalai atu lea o Iesu ia te ia, Ia e leoleo i a’u mamoe” (Ioane 21:17).



O FAAMANUIAGA O FAIAOGA ASIASI

“E toatele ni tamaitai ua lipoti mai e faapea, o le pogai na latou toe foi mai ai i le Ekalesia, ona o se faiaoga asiasi faamaoni sa alu atu pea lava pea i masina taitasi ma auuana atu ia i latou, laveai mai i latou, ma alofagia i latou, ma faamanuiaina i latou. . . .

“I nisi taimi o le faamanuiaga e aupito taua i lau asiasiga o le tau lava o le faalogo. O le faalogo e aumaia ai le mafanafana, malamalama, ma le faamalologa. E i ai foi se taimi atonu e manaomia ai le afe i luga o lima o lou laei ae e alu atu e galue i totonu o le fale pe fesoasoani e faana se tamaitiiti o tagi.”

Barbara Thompson, fesoasoani lua i le au peresitene aoao o le Aualofa, “Ia Outou Alolofa Atu i Isi, ma Faia Ai se Eseeesega,” *Liahona*, Nov. 2010, 120.

I le faaiuga o le vaitau o le 1970, sa fai mai ai sa’u uo ma te o i le Aualofa. “O le a lena mea?” o la’u fesili lea. Sa na o le fai mai lava o la’u uo, “Sau e vaai.” Oka! sa ou maofa i le taimi muamua lava.

O se taimi mulimuli ane o lena taumafanafana, na sau ai Leane i lo’u fale ma fai mai o ia o lo’u faiaoga asiasi. Sa foliga o se mea na ese ma manaia i le taimi lava e tasi, ae maise lava o le taimi lea sa le o au o se tagata o le Ekalesia. Ae o lenei ua ia faaavanoaina le taimi mai ana fuafuaga pisi e faasoa mai ai se mafaufauga faaleagaga ma vaai pe na i ai se mea e mafai ona fesoasoani mai ai ia te a’u. Sa ou iloaina mai lona agaga sa faamaoni o ia. E le o galo lava ia te au ia Leane ma savali sa ia faasoina mai ia te au.

Na mavae atu ni nai tausaga, ma na siitia mai Faranisisi i le matou uarota. O le mea moni, sa le o se “matou” uarota mo’i aua sa le o au o se tagata o le ekalesia, ae sa ou mafaufau i ai faapena. O le taimi lenei ua toalua la’u fanau teine laiti, ma sa mafai ona ou iloa le faamanuiaina o o laua olaga e ausilali a le Ekalesia. Na tusa lava pe timu pe la, sa asiasi mai lava ia

Faranisisi o lo’u faiaoga fou o aiga, ma se lesona, se ata, se tala, po o se lima fesoasoani. Ou te manatua ina ua sau Faranisisi i se tasi o aoauli pisi. O le vaai mai na le mafai ona ou nofo i lalo e talanoa, o lea na saeu ai e Faranisisi la’u kuka i luga o le ogaumu a o ou taulimaina manaoga o la’u fanau teine.

Na mavae tausaga ma sa ou siitia ese. E ui i lo’u le manao e tuua au uo o le Ekalesia, ae sa vave ona ou maua se isi vaega o uso ma ni molimau malolosi ma ni lototele i le Aualofa i “la’u” uarota fou. Sa tuuina mai e se faiaoga o le Aualofa ia i matou se lisi ua teuteuina o mea e fai ma uunaia i matou e tusi ai le “Ia agalelei” i le pito i luga o a matou lisi i aso taitasi. Sa matou manatu ma ni uso sa nonofo i ou tafatafa o se manatu matagofie tele lea, ae maise lava ona e lagolagoina ai le mautauave a le Aualofa “E le uma le alofa” (Moronae 7:46).

Ona ou faitau lea i se tala e uiga i se tamaitai paionia. A o laitiiti lena tamaitai, sa talosagaina e le perofeta lona aiga e fesoasoani e faato’a se nuu o le Au Paia o Aso e Gata Ai i se eria taumamao. Sa



O A NI AUALA E FAAMANU- IAINA AI FAIAOGA ASIASI I A LATOU AUAUNAGA?

Na fesoasoani Barbara Thompson e tali lenei fesili i lana lauga i le fonotaga aoao a le Aualofa “Ia Outou Alolofa Atu i Isi, ma Faia Ai se Eseesega” (*Liahona*, Nov. 2010, 120):

“A ou alu ou te asiasi, o taimi uma lava e lelei ai o’u lagona. Sa siitia, alofaina, ma faamanuiaina ai a’u, e masani lava e sili atu nai lo le uso sa ou asia. E faateleina lo’u alofa. E faateleina lo’u naunau e auauna atu. Ma e mafai ona ou iloa o se auala matagofie tele lenei ua fuafuaina e le Tama Faalelagi tatou te vaavaaia ai ma tausia ai le tasi ma le isi.”

la mafaufau e tusi lau molimau e uiga i faiaoga asiasi po o faiaoga o aiga i lau api o talaaga.

tupu se mala ina ua maliu se tasi o nai ona tei. Sa matuai faavauvau lona tina, ma sa oo le faanoanoa tele i le aiga.

O se tasi aso sa vaavaai atu ai lenei teineitiiti i fafo o le faamalama. I le mamao sa oo i ai lana vaai, sa siomia le fale faatauvaa o le aiga i le kiona. A o sioa atu le teineitiiti i le tafailagi, sa ia vaaia ni tagata se toalua o tauasa agai mai i le fale. Sa o mai, sa agai malie mai, ma na faafuasei ona iloa e le teineitiiti i laua—o i laua o faiaoga asiasi a lona tina.

O lena tala na musuia ai a’u. Sa ou papatiso ia Me 1983. O se faamamaluga le avea o au ma se faiaoga asiasi. Ou te fiafia tele e fegalegaleai ma tamaitai e toatele o e ua fai ma faaitaiga o “tamatai amiolelei” o e “silisili lona tau i penina” (Faataoto 31:10). E matagofie naua le faatasi ai ma tamaitai o e o loo taumafai foi ia agalelei, ia alofa le tasi i le isi, ma aumaia isi ia Keriso. ■

E faasoa atu e faiaoga asiasi se savali o le talalelei ma o nisi taimi o se lima fesoasoani. E faamalolosia uso latou te asia e ala i le fegalegaleai ma tamaitai o e o loo taumafai ia agalelei, ia alofa le tasi i le isi, ma ia aumaia isi ia Keriso.

Mo faamatalaga faaopoopo, tagai i le Julie B. Beck, “‘O Afafine i Lo’u Malo’: O Le Talaaga ma le Galuega a le Aualofa,” *Liahona*, Nov. 2010, 112; ma Henry B. Eyring, “O Le Talatuu Mausali o le Aualofa,” *Liahona*, Nov. 2009, 121.

FESOASOANI I TAMAITI IA FIAFIA I LE TUSI A MAMONA

*Ua matou iloa le aoga o nei
meafaigaluega i le aoaoina
o le ma fanau mai le Tusi
a Mamona.*

Saunia e Clyde J. Williams

Matagaluega Faamaopopo

Ao ma tausia ma lo'u toalua le ma aiga, sa ma naunau lava e faamautu i loto o le ma fanau e toalima se fiafia i le Tusi a Mamona. E pei o tagata kamuta, na ma iloa ai o ni meafaigaluega eseese o le a le gata ina aoga ae e taua foi i le aoaoina o le ma fanau ia fiafia i tusitusiga paia. Sa oo foi ina ma iloaina o le i ai o meafaigaluega po o auala e aoao ai le ma fanau o se isi auala lena, ae o le iloa o le ala e faaoga ai o le isi lea auala.

Ma le isi, sa ma iloaina sa manaomia ona ma aoao i le auala e aoao ai le ma fanau e faaoga le Tusi a Mamona i o latou olaga ma iloa lona taua i le lalolagi o loo latou ola ai. O le mafai ona ma faaogaina o auala eseese e fesoasoani ai i le ma fanau sa faalagolago muamua lea ma le sili i lo maua malamalamaaga patino i tusitusiga paia, ma a maua molimau i lo latou moni, ma lo maua naunau i ai.

Aoaoina o Fanau Laiti Ifo

Talu ai o le gagana o tusitusiga paia e le taatele tele ma o le vaogagana a se tamaitiiti e tapulaa,

o lea e fai ai ma luitau le aoaoina o tamaiti ia fiafia i le Tusi a Mamona. A o laiti le ma fanau, sa puupuu lava se taimi e nonofo lelei ai ma faalogologo, ma sa pupuu foi taimi o a matou suesuega i tusitusiga paia. Sa masani ona ma faaogaina ia tusi faitau o tusitusiga paia e i ai ata mo suesuega faaleaiga o tusitusiga paia.


Ina ia faamalositia mataupu faavae sa faitauina ma aoaoina e le ma fanau i suesuega o tusitusiga paia, sa masani ai ona ou faaogaina tala o tusitusiga paia o ni tala e faamatala pe a sauni le fanau e momoe. I ni tausaga mulimuli ane, sa faasoa mai e lo'u afafine le taua o lena faiga. Fai mai o ia, "Ou te manatu o tala sa faamatalaina soo na avea ma tala na sili ona matou fiafia i ai. Sa e nofo i talaane o o matou moega ma faasoa mai tala mai tusitusiga paia. Sa matou fiafia lava i ai ma fai atu ai e toe faamatala ma saga faamatala pea, aua e oo lava i na taimi o laiti na mafai lava ona matou lagona le agaga o le savali latou te auina mai ma iloa o tagata sa e faamatala mai ia i matou sa totoa ma faamaoni. Sa matou fia pei o i latou."

Fetuunaia o Lesona i Manaoga o o Tatou Aiga

Ioe, a o faasolo ina matutua le ma fanau, sa matou faitau sao mai le Tusi a Mamona ma isi tusitusiga paia. Sa matou taumafai ma le faamaoni e faitau mai tusitusiga paia i taeao uma, e ui lava o nisi o le fanau sa pulupulu i palanikeke ma mata sa le'i feala lelei. Ae ui i lea, ua latou lipoti mai i le taimi nei, sa latou faalogologo, manatua, ma totoina ni fatu mo le lumanai.

Sa ma faamamafaina foi tusitusiga paia i le taimi o afiafi faaleaiga. Mo se faataitaiga, sa masani ona ma faaafia ai gaioiga e pei o le faatino ma taumate se tala: e faatino e tagata o le aiga se tala mai tusitusiga paia, ae taumate mai e isi tagata o le aiga le tala. Sa fiafia foi le ma fanau e taalo i le "O Ai A'u?"—o se taaloga lea ma te tuuina atu ia i latou se faasologa o faaiteite seia oo ina latou mateia le tagata sa matou sueina mai le Tusi a Mamona. A o faasolo ina matutua le ma fanau, sa latou auai i le saunia ma le tuuina mai o lesona.

A o ma fetuunaia a matou afiafi faaleaiga i



manaoga o lo matou aiga na i ai i le taimi lea, sa matou faaaogaina ai tala ma aoaoga mai le Tusi a Mamona e fesoasoani ai e aoaoga atu ia mataupu faavae. Mo se faataitaiga, sa matou aumaia ni lesona e uiga i amioga lelei ma le aloese i ponokalafi mai le fautuaga a Alema i lona atalii o Korianetona i le Alema 39. O se lesona lelei i le aloese mai i le tataina o pe'a i o tatou tino na maua mai i le tala i le au sa Amiliki i le Alema 3.

Sa ou saunia lesona i le taulimaina faalelei o

Sa masani ona ma faaaogaina tala o tusitusiga paia o ni tala e faamatala pe a sauni le fanau e momoe.

finauga a tamaiti e faavae lea i olaga o Nifae (tagai i le 1 Nifae 7:20–21; 16:4–5), Iakopo (tagai i le 2 Nifae 2:1–3), ma Korianetona (tagai i le Alema 39:1, 10). O le tala faatupu manatu e uiga ia Alema ma Amoleka i le Alema 14:12–28 o loo aoaoga mai ai le onosai i mafatiaga. O se tasi o mataupu faavae taua sa matou aoaoina i nei mataupu ma le tele o isi mataupu, o le ia mautinoa lea matou te talanoaina ma le ma fanau a o lei avea moni ma se popolega po o se faafitauli i o latou olaga.

Fai Atu Fesili

E faaopoopo atu i le faitauina o tusitusiga paia faatasi ma le ma fanau, sa ma iloina sa taua le fai atu o fesili o le a fesoasoani latou te iloa ai le taua o mea na latou faitauina. O le faigata o nei fesili e eseese lava e faalagolago i lo latou matutua, ae o le manatu ia aoaoga i latou ia vaavaai mo aoaoga ma faatatauga ma fesoasoani ia latou iloa le tele o mea o loo i ai e maua mai i le Tusi a Mamona.

Mo se faataitaiga, sa ou fesili i ai pe aisea na latou manatu ai na fai mai Nifae sa ia “vaai i puapuaga e tele i le gasologa o [ona] aso” ae o le laina na sosoo ai, na ia fai mai ai se mea na foliga mai na feteenai ai: e faapea sa “alofagia tele [o ia] e le Alii” (1 Nifae 1:1). O le matou talanoaga, sa iloa ai e le ma fanau e ui ina sa laveaiina e le Alii ia Nifae mai ona puapuaga, ae sa Ia tuuina atu foi ia Nifae se malamalamaaga sili atu o Ana mealilo (tagai i le 1 Nifae 1:1, 20).

E sili atu ona aoaoga tamaiti ma le autalavou pe a tatou fesoasoani ia latou iloa upumoni mo i latou lava. A o latou faia, o le a latou lagonaina le musuia ia fiafia ma faaoga le Tusi a Mamona i o latou olaga atoa ma o le a lagona le saunia e fesoasoani atu i isi ia faapena foi ona fai.

Na oo ina iloa e le ma fanau na ma iloa o le Tusi a Mamona o loo i ai ni tala moni o ni tagata moni. Sa oo ina latou vaaia mea na ma vaaia, iloa mea na ma iloina, ma lagona o ma'ua lagona e uiga i le Tusi a Mamona. O lenei mea na faamalolosa ai a latou molimau, fesoasoani ia latou fiafia i le Tusi a Mamona, ma taitai atu ai i latou e taumafai e fai lea lava mea mo a latou lava fanau. ■



Sueina o Tali

I LE TUSI A MAMONA

Saunia e Sara D. Smith

O la tatou faigamalaga i le olaga e mafai ona luitauina, peitai e lei auina mai i tatou iinei e lo tatou Tama Faalelagi alofa ina ia tatou taulimaina na o i tatou ia faigata o le olaga. O le tasi o fesoasoani sili na Ia tuuina mai ia i tatou o le Tusi a Mamona. E le gata ina aoao mai ai le atoaga o le talalelei ae e taiala ai foi i tatou i faafitauli tatou te oo i ai. A o tatou suesue i le Tusi a Mamona, o le a fesoasoani le Agaga i le sueina o tali i o tatou faafitauli ma fesili.

Na molimau mai Elder M. Russell Ballard o le Korama a Aposetolo e Toasefululua:

“O Le Tusi a Mamona, e sili atu i isi tusi uma lava i lo’u iloa, o se puna sili lea ua tatou maua mo tali i faafitauli o le olaga. . . .

“E fia ea taimi ua oo ai le filemu i le olaga o i latou o e tauivi ma faafitauli moni o le lalolagi pe a latou faitauina le Tusi a Mamona! O faatusa o le taitaiga faaleagaga lena e sulua mai le tusi, e le mafaitauina.”¹

O tala o loo i lalo, ua faasoa mai ai e le au paia auala na latou maua ai i le Tusi a Mamona ia tali na latou sailia.

O Le Oo i se Liliuga o le Loto

E ui ina sa ia iloa le talalelei a o laititi, mulimuli ane na se ese Greg Larsen (ua suia le igoa) o Kalefonia, ISA. Sa amata ona aafia i fualaaau oona ma solitulafono ma e lei leva ae oo i le falepuipui. Sa manao o ia e toe suia lona olaga ae sa ia le mautinoa pe faapefea.

Sa tusia e Greg, “Sa aoaoina e alii mai le uarota i le lotoifale le Aoga Sa i le falepuipui. O se tasi o i latou na fai mai ia te au, o le a lelei atu le olaga pe a ou faitau i le Tusi a

Mamona. Ma o le mea lena sa ou faia.

“Ina ua ou aluese mai le falepuipui, sa ou toe alu i le lotu, ae sa ou lagonaina lava le manao e toe foi i tua i au amioga tuai. A o faaaauu ona ou faitau i le Tusi a Mamona, sa ou aoao ai e uiga i le nuu o le Tupu o Lamona e i le Alema 19:33, ua ‘liua o latou loto; ua le toe i ai ia te i latou se manao e fai mea leaga.’ Sa amata ona ou tatalo mo lenei liua o le loto.”

Na maua e Greg le tali i lana tatalo i le Helamana 15:7, lea o loo aoao mai ai o le “faatuatua ma le salamo lea ua aumai ai se liliuga o le loto.”

“A o ou faitauina na upu, na maligi ou loimata. Sa molimau mai le Agaga e alofa lo’u Tama Faalelagi ia te au ma o le a fesoasoani mai ia te au. Sa ou lagonaina afai e lava lo’u faatuatua e talanoa atu ai i lo’u epikopo, o le a lava lea. Ina ua lafoai au agasala i aao o le Faaola, sa ou mauaina se liliuga moni o le loto.”

Mauaina o Lona Ala

Sa sau Laura Swenson o Idaho, ISA, i le fale i se tasi aso ma le le fiafia ma le tagi. Sa le’i faaiipoipo o ia, ma o ana fuafuaga mo le kolisi ma le galuega sa ia moemiti i ai talalau-tasi. Sa ia tusia, “sa ou mafaufau pe sa i ai se mea na ou agai i ai.”

“Sa musuia au ou te liliu atu i le Tusi a Mamona. I fuaiupu muamua e fa o le 1 Nifae 18, sa ou maua ai se tali i ou popolega. O nei fuaiupu o loo faamatala mai ai le vaa na fauina e Nifae e ave atu ai lona aiga i le nuu o le folafolaga. Sa o se ‘gaosiga uiga eseese’ ma sa le’i fauina ‘i ala a tagata’; ae, sa fauina



“Sa ou aoao e uiga i le nuu o le Tupu o Lamona e i le Alema 19:33, ua ‘liua o latou loto; ua le toe i ai ia te i latou se manao e fai mea leaga.’ Sa amata ona ou tatalo mo lenei liliuga o le loto.”



FESOASOANI I FAAFITAULI FAALETAGATA LAVA IA

“[O Le Tusi a Mamona] e mafai ona fesoa-soani i faafitauli faaletagata i se auala moni lava. Pe e te manao e tuuese se mausa leaga? Pe e te manao e faaleleia ia fesootaiga i totonu o lou aiga? Pe e te manao e faateleina lou tulaga faaleagaga? Faitau le Tusi a Mamona!”

Elder Russell M. Nelson o le Korama a Aposetolo e Toasefululua, “O Se Molimau o le Tusi a Mamona” *Liahona*, Ian. 2000, 85.

‘i le ala na faaali mai e le Alii’ (fuaiupu 1–2). Sa masani ona talanoa Nifae ma le Alii a o fauina le vaa. Ina ua uma le vaa, sa ‘lelei, ma . . . o lona gaosiga sa matua lelei’ (fuaiupu 4).

“Sa ou iloina o la’u lava faigamalaga sa o se ‘gaosiga uiga eseese.’ Sa le fetau ma mamana a le lalolagi ae o le a ou tau atu ai i le mea e tatau ona ou alu i ai pe afai ou te sailia le taitaiga a le Alii. O nei fuaiupu sa o se sulu o le malamalama i se taimi pogisa. Sa lei uma ou faafitauli i se taimi vave, ae na ou maua le vaaiga sa ou manaomia. Ua ou i ai nei i se galuega faamanuiaina lea ou te lei mafaufauina.”

Mauaina o se Isi Molimau

A o talavou, sa mafaufau ai Adrián Paz Zambrano o Honetura pe aisea ua ta’ua ai e le Tusi Paia na o le eria faataamilo i Ierusalem ma manatunatu ai pe na asiasi Iesu Keriso i isi atunuu.

Na tusia e Adrián, “O ni tausaga mulimuli ane, na o mai ai ni faifeautalai se toalua O Le Ekalesia a Iesu Keriso o le Au Paia o Aso e Gata Ai i lo’u fale. Sa la faaali mai ia te au le Tusi a Mamona ma valaaulia au e faitau i le 3 Nifae, lea o loo tau mai ai le asiasi atu o Keriso i le atu Amerika.

“A o ou faitau, sa ou manatuaina au fesili sa i ai a o ou talavou. Sa ou mauaina ia tali. Ona o le Tusi a Mamona, na ou iloa ai sa

asiasi atu Iesu Keriso i le atu Amerika ina ua mavae Lona Toetu. Sa tumu a’u i le fiafia ona ua ou iloina e alofa le Atua i Ana fanau uma lava e tusa lava po o fea e nonofo ai ae po o a foi tulaga.”

Sa tatalo faatasi Adrián ma lona toalua ia iloa pe moni le Ekalesia, ma sa maua e i laua uma se molimau. Sa papatisoina ma faamauina i laua, ma i le tasi tausaga mulimuli ane, na faamauina ai lo laua aiga i le malumalu.

Tausiga mo Lona Aiga

I le 30 o tausaga, na ma’i ai Eric James o Mekisiko Fou, ISA i se faamai o le fatugao. I le avefa ai ma se tamā talavou, sa matuai faanoanoa o ia ma mafaufau pe mata o le a mafai ona ia tausia lona aiga.

Sa faitau o ia i le Tusi a Mamona ma sa mafaufau foi faapena Nifae ina ua gau lana aufana na faia i le sila na sili ona lelei. Ae ina ua uma ona [ia] faia se aufana mai se laau, sa faapea ona toe mafai e Nifae ona fafaga lona aiga. (Tagai i le 1 Nifae 16:18–23, 30–32.)

Fai mai Eric, “O le tala a Nifae sa faatumulia ai lo’u agaga i se malamalama matagofie. O le tino maloloina sa ou fiafia ai seia oo mai i lona taimi sa pei lava o le aufana sila a Nifae. Ina ua faaletonu lo’u ola maloloina, sa pei lava ua gau la’u aufana. Ae na ou iloina na faamanuiaina au e le Alii i se aufana laau i le ala o se taotoga e sui ai [lo’u] fatuga’o. O lenei suiga o le fatuga’o o le a aumai ai ia te au le malosi e tausii ai lo’u aiga. O lenei mea na aumaia ia te au le faamoemoe. Ua toeitiiti 10 tausaga mulimuli ane, o loo faaauau pea ona ou tausii lo’u aiga ma auauna atu i le Alii i le mea sili ou te mafaia.”

Aoaina o le Fanau i le Usiisitai

A o laiti lana fanau, sa liliu atu Juan Jose Resanovich o Atenitina i le Tusi a Mamona, pe a i ai ni ana fesili i le ala e aoao ai ma tausii ai lana fanau. Sa ia tusia, “Sa ma sue-sueina ma lo’u toalua ia ona itulau mo musumusuga mo le ma fanau, ma ma te

maua ai i taimi uma ia tali.”

Sa aoaoina e le au Resanoviches le la fanau i le usiusitai i le faasino atu o i latou i le faataitaiga a Nifae i le 1 Nifae 3:5–6:

“Ua muimui ou uso, fai mai o se mea faigata ua ou faatonuina ai i laua; ae faauta ou te lei faatonuina ai i laua, ae o se poloaiga mai le Alii.

“O lea ia e alu ai, lo’u atalii e, ma o le alofagia oe e le Alii, ona ua e le muimui.”

Sa tusia e Juan, “Sa ma aoaoina le ma fanau sa faaaloalo Nifae i ona matua faalelalogi ma mea a le Atua. Sa matou faia se sini o se aiga, o le a matou maua uiga o Nifae o le faaaloalo ma le usiusitai.

“Sa faamisiona uma le ma fanau. Ma te lei tauanauina i latou e auauna atu. Sa avea i latou ma ni tamaiti aooa lelei, uo lelei, ma ni fanau lelei. E tele lava mea e ao ona faaleleia atili e lo matou aiga, ae o le Tusi a Mamona o se fesoasoani maoae lea i le ausiana o a matou sini.”

Sao mai Maea ua Fai ma Vaisu

A o tauivi ai ma se vaisu o meaa, sa tatalo Susan Lunt o Iuta, ISA mo se fesoasoani. Sa liliu atu o ia i le Tusi a Mamona ma faitau ai sa laveaia Nifae mai maea na saisai ai e ona uso ia ona lima ma vae:

“Le Alii e, e tusa ma lo’u faatuatua ia te oe, sei e laveaia au . . . ; ioe, foai mai ia te au le malosi ia mafai ai ona ou motusia o nei maea ua noatia ai au.

“Ma sa oo ina . . . matala ese maea”
(1 Nifae 7:17–18).

Sa tusia e Susan, “O lenei mau sa faamatalaina tonu lava ou lagona—saisaitia i maea o mea ua fai ma vaisu. Na vave ona matala ese maea faaletino a Nifae ina ua ia ole atu mo le laveaiga. O au maea sa le faaletino ma ou te lei faatoilaloina mea na fai ma au vaisu i se taimi puupuu, ae a o ou faitau i na upu, sa ou lagonaina le suia o se mea i totonu o au. Na pei sa ou lagonaina le matala ese o maea mai lo’u loto, mafaufau, ma le tino, ma sa ou

iloaina e mafai ona ou faatoilaloina mea na fai ma a’u vaisu.”

Ua tele se alualu i luma ua faia e Susan ma, ona o le musumusuga sa ia maua i le Tusi a Mamona, na mafai ai ona ia motusia isi mausa na saisaitia ai o ia, e aofia ai le ita, manatu faapito, ma le faamaualuga. Sa ia faamatala mai, “Ua ou iloa o le Tusi a Mamona o le afioga lea a le Atua, ma o le tali i soo se fesili o le olaga e mafai ona maua i totonu o itulau o lena tusi.” ■

FAAMATALAGA

1. M. Russell Ballard, i le “Matou Te Faaopoopo Atu Foi La Matou Molimau,” *Liahona*, Tes. 1989, 13.

TALI O LE TUSI A MAMONA

- O le a le isi mea e sosoo ai e tatau ona ou faia i lo’u olaga? (Tagai i le 1 Nifae 4:6; Alema 37:36.)
- E mafai faapefea ona ou faaleleia atili la’u faaipoipoga? (Tagai i le 1 Nifae 5:1–9.)
- Aisea e tatau ai ona i ai sa’u api o talaaga? (Tagai i le lakopo 1:2–4; Alema 37:2–4; Helamana 3:13–15.)
- E mafai faapefea ona avea a’u ma se uo lelei atu? (Tagai i le Alema 15:18.)
- E mafai faapefea ona ou faataunuaina lo’u valaauga? (Tagai i le Alema 17:2–12.)
- O le a se mea e tatau ona ou tatalo atu ai? (Tagai i le Alema 34:17–27.)
- E mafai faapefea ona fesoasoani le Togiola ia ou salamo ma suia? (Tagai i le Alema 36.)
- E faapefea ona ou tali atu i se tagata e agaleaga mai? (Tagai i le Alema 60–62.)
- E mafai faapefea ona ou puipuia lo’u aiga mai mea leaga o le lalolagi? (Tagai i le Helamana 5:12; Moronae 8:2–3.)
- Aisea e tatau ai ona ou alu i le lotu? (Tagai i le Moronae 6:5–9.)

Fautuaga mo suesuega: Fai se lisi o au lava fesili ma vaavaai mo tali a o e suesue ma le agaga tatalo i tusitusiga paia.

*O le masani i se mea e mafai ona
taitai atu ai i tatou i le “saga faa-
itiitia ai lo latou ofo i se faailoga
po o se mea ofoofogia mai le lagi”*



Saunia e Adam C. Olson

Mekasini a le Ekalesia



TOE MAUAINA

O SE MEA OFOFOGIA O LE LALOLAGI . . . ma le Aloese i le Matautia o le Musuā Faaleagaga

O le fuafaatatau a Ciro Villavicencio e faapea i ona tausaga muamua e tolu na avea ai ma se taitai o maimoaga taamilo i le itu o Peru Cusco, sa ia taitaia pe toeitiiti 400 o malaga maimoa i Machu Picchu, o le “aai na leiloa” lauiloa o Incas. Ae, e ui i le mavae ai o le tele o ana asiasiga, o lenei nofoaga—sa aofia i ni lisi eseese o mea ofoofogia o le lalolagi—sa lei aveese ai lava lona maoae ia te ia.

“E i ai lava i taimi uma se mea fou e aoaoina,” o lana tala lea. O le faaluina o ni itula i le aveina o se vaega o tagata asiasi i le Machu Picchu e le o se mea e le masani ai mo Ciro. Peitai, ua ia vaaia le faigofie ona aveesea o lena ofoofogia. O nisi o ana uo e aveina se maimoaga taamilo atoa i le 45 minute. “Ua leai so latou fiafia i ai,” o lana tala lea.

O Ciro, o se tasi o le Uarota a Chasqui ma o se fautua maualuga o le Siteki a Cusco Peru Inti Raymi, e talitonu o le malamalama i le le fiafia

o ana uo e mafai ona fesoasoani i tagata o le Ekalesia e faateleina ai lo latou fiafia i se isi mea ofoofogia a le lalolagi—o le mea e aupito sili ona taua—o le “galuega ofoofogia ma le mea e ofo ai” o le talalelei toefuataina a Iesu Keriso (2 Nifae 25:17).

O Le Matautia o le Leiloa o le Ofoofogia

Na lafoaia i le faaiuga o le vaitaimi o le 1500 e tagata Incas ma sa le'i mauaina foi e le au faatoilalo atunuu, o lenei nuu tuufua ma le maualuga i Peruvian Andes sa leiloa i tagata uma ae vagana ai ni tagata toalaiti. I le oo mai o le seneturi 20, o lona mauaina e le lalolagi i fafo na aumaia ai le anoano o tagata suesue ma tagata tafafao mai.

I le mavae ai o le tele o tausaga o suesuega, “sa manatu ai nisi tagata ua latou mauaina mea uma e tatau ona maua i Machu Picchu,” o le tala lea a Ciro. “A mafaufau tagata e faapea ua uma ona maua ia mea uma pe ua uma ona faia mea uma,

ATA NA PIENIA E ADAM C. OLSON, VAGANA UA FAAMATALAINA



Po o le a lava le umi na suesueina ai e tagata suesue ia Machu Picchu, sa tauia lava i latou i mea fou e maua ma le atamai faaopoopo.

ua latou togi le solo pe ua faaititia foi le taua o le aitema po o le taumafaiga.”

Ua popole foi Ciro ona o lena lotomalie e mafai foi ona tupu i le Ekalesia. Ua ia vaaia le auala e mafai ai e le taimi ma le masani i se mea ona taitai atu nisi o le au paia i le “faaititia ifo lava i lalo lo latou ofo i se faailoga po o se mea ofoofogia mai le lagi, sa o ina [amata] ona latou maaa i o latou loto, ma tauaso i o latou mafaufau, ma [amata] ona le talitonu i mea uma [sa] latou faalogo ma vaai i ai” (3 Nifae 2:1).

O lenei leiloa o le ofoofogia e mafai ona tuua ai le au paia e lilifa atu i pepelo a Satani, e pei o le: E le manaomia ona e faalogo i lena failauga; ua uma ona e iloa na mea uma. E te le tau alu i le Aoga Sa; sa e faalogo muamua i le lesona lena. E te le tau suesue i au tusitusiga paia i le aso; e leai se mea fou o i ai iina.

“Sa faapena [ona] toe maua ai e Satani loto o tagata” (3 Nifae 2:2).

O le oo i ni aafiaga matagofie ma faaletonu i le naunau mo le aoaoina o le talalelei e le o se mea e le masani ona tupu. Peitai o i latou o e faatagaina se faafifilemu i le aoaoina faaleagaga ma oo atu ai ina avea ma se sitaile o le olaga, ua i ai i le matautia o le

aveesea mai “e oo lava i mea ua latou maua” i le malamalama faaleagaga (2 Nifae 28:30; tagai foi i le Mataio 25:14–30).

Toefaaolaolaina o le Ofoofogia

O le malamalama i upumoni e tolu na fesoasoani ia Ciro e tumau ai lona aoaoina e ui i le malosi o le musuā:

1. O loo tele mea e tatau ona ou iloa.

I le taimi o le malosi o le suesue i le talalelei a o i ai i lana misiona ma ao avea ma se faiaoga i le inisitituti, na iloa ai e Ciro e i ai lava i taimi uma ni mea se tele e aoaoina, pe o se mataupu faavae fou po o se faatatauga fou o se mataupu faavae ua uma ona ia iloa. Ae o le mea e sili ona taua, o le malamalama faaleagaga fou e masani lava o se mea na manaomia ona ia iloa e manumalo ai i soo se luitau sa feagai ma ia—pe o le a feagai ma ia.

Fai mai o ia, “O se itu o le faigofie ona aoaoina, o le manatuaina lea e i ai lava i taimi uma se mea ou te le iloa lea atonu e moomia ona ou iloa.”

2. Ou te manaomia le fesoasoani a le Agaga Paia e iloa ai le mea ou te manaomia.

A e le iloa le mea e tatau ona e iloa, e te manaomia se faiaoga atamai (tagai i le Ioane 14:26). Pe a suesue toatasi Ciro i tusitusiga paia pe faatasi foi ma lona toalua pe a o auai i vasega ma fonotaga, e le aunoa ona faamanatu atu ia te ia, e le afaina pe ua faafia ona ia faitauina se fuaiupu faapitoa pe faalogo foi i se aoaoga faapitoa.

“O le Agaga e mafai ona aoao mai ia te au mea ou te lei mafaufau lava i ai,” o lana tala lea. “O le Agaga Paia o le faiaoga lea.”

3. O le aoao e manaomia ai sa’u taumafaiga.

O le aoao o se faatinoga o loo faia pea ae le o se faatinoga ua uma.¹ E manaomia ai le naunau, gauai atu ma le totoa, auai, ma le faaaogaina o mataupu faavae na aoaoina (tagai i le Alema 32:27).

“E tatau ona fai ma o’u lava tiute le aoaoina,” o le tala lea a Ciro. “O le a le faamalosi au e le Tama Faalelagi e aoao soo se mea.”

Tauia o Mea Ofoofogia

Mo Ciro, o loo tumau pea ona avea Machu Picchu o se mea ofoofogia o le lalolagi

aua, po o le a lava le umi na susesueina ai e tagata susesue, sa tauia lava i latou i mea fou e maua ma le atamai faaopoopo.

E tusa lava pe ua seneturi talu ona fai susesuega, ae na maua i ni nai tausaga ua tea atu, e tagata e susesuea aganuu e ala i mea e eli mai i le elelee, se fanuatanu, maamora, faapea ma nisi fausaga o faapaologa, o ia mea uma ua faaopoopoina i mea ua iloa e uiga ia Machu Picchu ma Incas.

E faapena le tulaga i le susesueina o le talalelei a Iesu Keriso. “E i ai lava i taimi uma se mea fou e maua i le talalelei mo i latou e taumafai,” o le tala lea a Ciro.

E pei foi ona faaopoopo atu mea fou na maua i Machu Picchu i le malamalama ua uma ona i ai, ma maua ai e tagata susesue se malamalamaaga e sili atu ona atoatoa, “o ia o le e le faamaaaina lona loto, o ia lea e tuuina mai i ai le vaega tele o le afioga, seia oo ina tuuina mai ia te ia, ia ona iloa mealilo a le Atua, seia oo ina ia iloaina atoatoa” (Alema 12:10; tagai foi i le MF&F 50:24).

Fai mai Ciro, “O le talalelei o se vaipuna e le mate o le vai ola lea e manaomia lava ona tatou toe foi atu i ai e le aunoa.”

O Le Galuega Ofoofogia ma Mea e Ofo ai

A o tilotilo ae Ciro mai se papa laugatasi i le maualuga o Machu Picchu, sa feoai ae ni vaega eseese o tagata maimoa faataamilo i fale anamua. Mo Ciro o le faalavelave o le le fiafia o nisi o ana uo, ona o se mea tiga e le gata ia i latou ae o i latou foi o e ono maua lea aafiaga ofoofogia e ala atu ia i latou.

O le faatumauina o le ola o le ofoofogia o le talalelei o le a faamanuiaina ai e le gata i le tagata lava ia ae o i latou

foi o latou fegalegaleai. Fai mai Ciro, “O le suiga e faia e le talalelei i olaga o tagata o se mea e ofo ai, ma o i latou ua oo i ai lena suiga e mafai ona ave



i latou lava ma se mea e ofo ai i olaga o isi.” ■

FAAMATALAGA

1. Tagai i le David A. Bednar, “Saili e Aoa e Ala i le Faatuatua,” *Liahona*, Sete. 2007, 60.



Sueina o le Faaosofia e Faitau ai Tusitusiga Paia

Saunia e Wilfer Montes Leon

Etatau ona tatou tatalo mo le faaosofia e faitau tausitusiga paia, faapea foi mo le taitaiga a le Agaga Paia. E tatau ona tatou fiafia i tusitusiga paia; o lona uiga, fiafia i le afioga a le Atua ma lagona le alofa e ofoina mai mo i tatou e ala i savali e tuuina mai mo i tatou. E le tatau ona tatou faia ia na ona faapasi o mataitusi i la tatou vaai, aua o le faamoemoe, ia uluitino lo tatou alolofa i lenei talalelei ofoofogia.

O taimi uma e te susesue ai i tusitusiga paia, o le a e atili aoao ai, ma ala mai ai ona e iloa le finagalo o lo tatou Tama Faalelagi. E masani ona Ia tali mai ia tatou tatalo e ala i tusitusiga faavae o le Ekalesia. Pe a tatou lagonaina le toafilemu ma maua mafaufauga musuia, e mafai ona tatou iloa e oo mai mai lo tatou Tama Faalelagi e ala i le Agaga Paia (tagai i le MF&F 8:1–3).



Saunia e
Elder D. Todd
Christofferson

O Le Korama a Aposetolo
e Toasefululua



O Le Iloaina o le Aao o le Atua

I O TATOU FAAMANUIAGA I ASO TAITASI

*O le ole atu mo le meaai ma le mauaina o meaai i aso
uma i aao o le Atua, e i ai se vaega taua i le aao e faalagolago
ia te Ia ma le onosaia o luitau o le olaga.*

Sa tusia e Luka se tasi o soo o le Alii na fesili atu ia te Ia, “Le Alii e, ia e aao mai ia te i matou i tatalo, e faapei o Ioane foi ona aao i ona soo” (Luka 11:1). Ona tuuina atu lea e Iesu se mamamu mo le tatalo ua lauiloa o le Tatalo a le Alii (tagai i le Luka 11:2–4; tagai foi i le Mataio 6:9–13).

O loo aofia i le Tatalo a le Alii le talosaga “Ia e foai mai ia te i matou i le aso nei a matou mea e ai e tatau ma le aso” (Mataio 6:11; tagai foi i le Luka 11:3). E tofu uma i tatou ma manaoga i aso uma lea tatou te liliu atu ai i lo tatou Tama Faalelagi. Mo nisi, o se meaai moni lava—o meaai e manaomia e tausii ai le ola i lena aso. E mafai foi ona aveia o se malosi faaleagaga ma faaletino e feagai ai ma se isi aso se tasi o gasegase masani po o se togafitiga tiga ma le faifai umi. I isi tulaga atonu o se manaoga e tau le faaletino, e pei o se mea e faatatau i tiute po o gaioiga a se tagata i lena aso—o le aao atu o se lesona po o le

faiga o se suega, mo se faataitaiga.

Ua aao mai e Iesu i tatou, o Ona soo, e tatau ona tatou vaai atu i le Atua i aso taitasi mo meaai—le fesoasoani ma le tausiga—tatou te manaomia i lena aso faapitoa. O le valaaulia a le Alii e saili atu a tatou meaai i aso uma i aao o lo tatou Tama Faalelagi ua talanoa mai ai e uiga i se Atua agalelei, e silafia e oo lava i manaoga laiti o Lana fanau i aso taitasi ma e naunau e fesoasoani mai ia i latou, taitoatasi. O loo fai mai o Ia e mafai ona tatou ole atu ma le faatuatua i lena Tamalii “o lē foai tele mai i tagata uma ma le lē toe tautaua; ona foaiina mai ai lea ia te ia” (Iakopo 1:5). O lena mea, e moni lava, e matuai faafiafia loto, peitai e i ai se mea o faatino iinei, e sili atu ona taua nai lo na o se fesoasoani e ola ai mai lea aso i lea aso. A o tatou sailia ma maua meaai faalelagi i aso taitasi, e tuputupu ae lo tatou faatuatua ma le talitonu i le Atua ma Lona Alo.

Na aoao mai e Iesu i tatou, o Ona soo, e tatau ona tatou vaai atu i le Atua i aso taitasi mo meaai—o le fesoasoani ma le tausiga—tatou te manaomia i lena aso faapitoa.

O Le Vaai Atu i le Atua i Aso Uma

I le tuanai ai o la latou malaga umi tele mai Aikupito, sa faaaluina e ituaiga o Isaraelu tausaga e 40 i le vao a o lei oo atu i le nuu o le folafolaga. O lenei vaega toatele o tagata e silia ma le miliona o tagata na tatau ona fafagaina. E mautinoa lava o lena fuainumera i se nofoaga se tasi e le umi ona ola i le taaloga o le tutuli [manu], ma lo latou ituaiga olaga, o le taimi ua malaga o le taimi ua faato'a ni fanua i se taimi sa le fetau mo le tausiga o ni togalaau po o ni lafumanu i soo se aofaiga e tofu ai. Sa foia e Ieova le luitau i le tuuina mai faavavega o a latou meaai mai le lagi i aso uma—o le manai. Na ala mai ia Mose, sa faatonuina ai e le Alii ia tagata e faaputu lava na o manai e lava ai aso taitasi mo lena aso, vagana ai le aso na sosoo ma le Sapati, lea sa tatau ai ona latou faaputuina ia lava mo aso e lua.

E ui lava i faatonuga patino a Mose, ae sa taumafai lava isi e ao ia tele atu nai lo le mea na lava ai mo le aso e tasi ae teu mea e totoe:

“Ona fai atu lea o Mose ia i latou, aua nei tuu e se tagata sina toe mea seia aulia le taeao.

“A e lei faalogo i latou ia Mose; ua tuu e nisi tagata toe mea i le taeao, i le ua tupu ai ilo, ua elosia” (Esoto 16:19–20).

Peitai, e pei ona folafolaina, ina ua latou faaputuina e faaluaina le tele o le manai e masani ai i aso taitasi, i le aso lona ono, sa lei leaga (tagai i le Esoto 16:24–26). Peitai, o nisi lava foi sa le mafai ona talitonu e aunoa ma le vaai i ai, ma sa latou o atu e sue ma faaputu manai i le Sapati, ae “lei maua se mea e i latou” (tagai i le Esoto 16:27–29).

O le tuuina mai o le tausiga i aso uma e tasi le aso i le taimi, sa taumafai ai Ieova e aoao atu le faatuatua i se nuu na silia ma se vaitaimi o le 400 tausaga na latou le maua ai le faatuatua o o latou tama. Sa Ia aoaoina i

latou e faalagolago ia te Ia. O le mea moni, sa tatau i le fanauga a Isaraelu ona savavali faatasi ma Ia i aso taitasi ma faatuatua o le a Ia foai mai ni meaai e lava mo le aso e sosoo ai *i le* aso e sosoo ai ma faapena ai lava. O lena faiga e le mafai ai ona taumamao o Ia mai o latou mafaufau ma loto.

O le taimi lava na oo ai ituaiga o Isaraelu i se tulaga e mafai ona latou tausai ai i latou lava, sa manaomia loa ona latou faia o lena mea. E faapena foi, a o tatou ole atu i le Atua mo a tatou meaai o le aso—mo le fesoasoani i le taimi e le mafai ai ona tatou tausai i tatou lava—e ao pea ona tatou faamalolosi i le faia ma le aumaia o mea e mafai ona oo i ai lo tatou malosi.

Faatuatua i le Alii

O se taimi a o lei valaauina au o se Pulega Aoao, sa ou feagai ai ma se luitau patino faaletamaoiga lea sa faaauau ai mo ni nai tausaga. Sa mou ma tafe atu i le ogaoga ma le manaomia vave o se fesoasoani, ae sa le'i aluese ai. Na i ai taimi na taufaamatauina ai e lenei luitau le manuia o lo'u aiga, ma sa ou faapea matou te ono feagai ma se faaletonu tautupe. Sa ou tatalo mo se laveaiga faavavega e faasaoina ai i matou. E ui ina sa ou faia lena tatalo i le tele o taimi ma le faamaoni tele ma le manao faatauana, o le tali i le iuga o le lei. Mulimuli ane, sa ou aoao ai e tatalo e pei ona sa faia e le Faaola: “Ae aua le faia lo'u loto, a o lou finagalo” (Luka 22:42). Sa ou sailia le fesoasoani a le Alii i laa laiti taitasi i le aluga o le ala i se tautinoga mulimuli.

Sa i ai taimi sa uma lelei ai lava a'u punaoa, sa leai se mea ma leai se tasi e liliu atu i ai mo se fesoasoani e tali i le manaoga faavave na tulai mai. Faatasi ai ma le leai o se isi lava auala, na sili atu ma le faatasi ona ou faapau i luma o lo'u Tama Faalelagi, ma faatauana atu ma loimata mo Lana fesoasoani. Ma sa fesoasoani mai o Ia. O nisi taimi sa le sili atu lava nai lo na o se lagona o le filemu, o se lagona o le faamautinoaga o le

a sologa lelei mea uma. Atonu o le a ou le iloa pe faapefea po o le a foi le ala, ae sa Ia tuuina mai ia te au ia ou iloa lena mea, tuusao pe le tuusao foi, o le a Ia tatalaina se ala. E ono suia tulaga, e ono oo mai i le mafaufau se manatu fou ma le aoga, e ono oso mai se tupe maua sa lei faamoemoeina po o isi punaoa i le taimi tonu lava lea. I nisi o itu, sa i ai lava se tali.

E ui ina sa ou pagatia i lena taimi, ou te faafetai i le taimi nei ona sa leai se tali vave i lo'u faafitauli. O le mea moni e faapea sa faamalosi au e liliu atu i le Atua mo le fesoaosani na toetoe lava o aso uma mo se vai-taimi faaumiumi, ua aoaoina ai au i le auala e tatau ona tatalo moni atu ai ma maua mai ai tali i tatalo, ma aoao ai au i se auala lelei ia ou faatuatua i le Atua. Sa oo ina ou iloa lo'u Faaola ma lo'u Tama Faalelagi i se auala ma

se maualuga lea na semanu e le tupu pe ana o se isi auala, pe semanu foi e umi atili ai se taimi ou te [sailia ai se fofo]. Ua ou aoaoina o meaai i aso uma o se oloa faapelepele. Ua ou aoaoina o le manai i aso nei e mafai ona mo'i e pei lava o le manai faaletino i le talaaga faaletusi paia. Ua ou aoaoina e faatuatua i le Atua ma lo'u loto atoa. Ua ou aoaoina e savavali faatasi ma Ia i lea aso ma lea aso.

Galulue i Faafitauli

O le ole atu i le Atua mo a tatou meaai mo lea aso ma lea aso, nai lo a tatou meaai o

O le tuuina mai o le tausiga i aso taitasi, e tasi le aso i le taimi, sa taumafai ai Ieova e aoao atu le faatuatua i se nuu lea na silia ma se vai-taimi o le 400 tausaga na latou le maua ai le faatuatua o o latou tama. Sa Ia aoaoina i latou e faalagolago ia te Ia.



le vaiaso, masina, po o le tausaga o se auala foi tatou te taulai tonu atu ai i faafitauli laiti e faigofie atu ona taulima. O le taulimaina o se faafitauli tele, atonu e manaomia ai ona tatou galulue i ai i ni faiga laiti i aso taitasi. O nisi taimi e pau lava mea e mafai ona tatou taulimaina o se aso e tasi—pe na o se vaega foi o le aso e tasi—i le taimi.

I le vaitaimi o le 1950 sa manuia ai lo'u tina mai se taotoga tele o le kanesa, lea na sosoo ai ma le tele o togafitiga tiga e fai i le leisa. Sa ia manatua sa aoaoina o ia e lona tina i lona taimi i se mea sa fesoasoani ia te ia mai lava i lona vaitaimi:

Tatou te manaomia foi se vaega o le meaai faalelagi i aso taitasi ina ia avea ai i tatou ma tagata e tatau ona avea ai. O le salamo, faaleleia atili, ma iu ai ina ausia “le fua o le ua matua e tatau ma le tumu o Keriso” o se faagasologa o le laasaga ma lea laasaga.

“Sa matuai ou ma’i tigaina ma vaivai, ma sa ou fai atu ia te ia i se tasi o aso, ‘Se, Tina, e le mafai ona ou onosaia le isi 16 o na togafitiga.’

“Sa fai mai o ia, ‘Pe mafai ona e alu nei?’

“‘Io.’


“‘Ia, lau pele, e na o le pau lava lena o le mea e tatau ona e faia nei.’

“Sa fesoasoani ia te au i le tele o taimi pe a ou manatua e taulima le aso e tasi po o le mea e tasi i le taimi.”

E mafai e le Agaga ona taiala i tatou i le taimi e tilotilo atu ai i luma ma le taimi e tatau ai ona tatou taulimaina na o lenei aso e tasi, i lenei taimi e tasi.

Ausia o Mea Tatou te Gafatia

O le ole atu ma le mauaina o meaai i aso taitasi i aao o le Atua, e i ai se sao taua i le



aoao e faatuatua ia te Ia ma i le onosaia o luitau o le olaga. Tatou te manaomia foi se vaega o le meaai faalelagi i aso taitasi ina ia avea ai i tatou ma tagata e tatau ona avea ai. O le salamo, alualu i luma, ma iu ai ina ausia “le fua o le ua matua e tatau ma le tumu o Keriso” (Efeso 4:13) o se faagasologa o le laasaga ma lea laasaga. O le faaafia ai o amioga fou ma le aoga i o tatou uiga po o le faatoilaloina o amioga le lelei po o mausa e masani ona faauigaina o se taumafaiga i le taimi nei ma sosoo ai ma le isi a taeao ma le isi, atonu mo ni aso se tele, po o ni masina ma ni tausaga, seia oo ina tatou ausia le manumalo. Ae e mafai ona tatou faia aua e mafai ona tatou talosaga atu i le Atua mo a tatou meaai o le aso, mo le fesoasoani tatou te manaomia i aso taitasi.

Na saunoa Peresitene N. Eldon Tanner (1898–1982), Fesoasoani Muamua i le Au Peresitene Sili, e faapea: “A o tatou manatunatu i le taua o le faia o se faaiuga e faia ia sili atu ona lelei, ia tatou filifili e pulea lelei i tatou lava ia filifili ma le faaeteete sini ua tatou faia, ina ia mafaufau i le faamoemoga ua faia ai ia mea, ma le mea mulimuli ia faia tautinoga ina ia tausia ma ia aua nei faatagaina se mea e taofia i tatou. Ia tatou faamanatu ia i tatou lava i le amataga o aso taitasi e mafai ona tatou tausia se sini mo lena lava aso.”¹

Talu ai nei na aoao mai ai Elder David A. Bednar o le Korama a Aposetolo e Toasefulu-lua e faapea, o le tumau i le faia o faatinoga faigofie i aso taitasi e pei o tatalo faaleaiga, suesueina o tusitusiga paia, ma afiafi faaleaiga e taua i le fausia o aiga manuia. Fai mai o ia, “O lo tatou faia pea e le aunoa o nai mea iti faigofie, e mafai ona tulai mai ai taunuuga faaleagaga maoae.”²

Na tuuina mai e Peresitene Ezra Taft Benson (1899–1994), le fautuaga lenei a o saunoa e uiga i le salamo: “E tatau ona tatou faaeteete, a o tatou saili ia avea atili i tatou [faapei o Keriso], ina ia aua nei o tatou

atuatuvale ma lē maua le faamoemoe. O le avea faapei o Keriso o se taumafaiga e faia i le olaga atoa, ma e masani ona aafia ai le tuputupu ae ma le suia lena e oo mai lemu ma faifai malie.”³

Sailia o le Fesoasoani a le Alii i le Auauna Atu

Ia manatua e le gata ina tatau ona tatou vaai i totonu pe a tatou sailia se fuataga o aso taitasi o meaai faalelagi. Afai tatou te fia faapei atili o le Matai, o Le na “le sau ina ia auauna tagata ia te ia, a e peitai ia auauna o ia” (Mareko 10:45), o le a tatou sailia Lana fesoasoani i le auauna atu i isi i lea aso ma lea aso.

Ua sili atu le soifua ai o Peresitene Thomas S. Monson i lenei mataupu faavae nai lo se isi lava tagata ou te iloa. E i ai pea lava i lona loto se tatalo ia faaali mai e le Atua ni manaoga ma ni auala mo ia e fesoasoani ai ia i latou o siomia o ia i soo se aso po o se taimi o le aso. O se tasi o faataitaiga mai lona taimi a o avea ma se epikopo ua faaalua ai le mea moni e faapea, o nisi taimi e oo lava i se taumafaiga laitiiti e mafai, faatasi ai ma galuega a le Agaga, ona maua mai ai ni fua matagofie.

“O se tasi o i latou na aapa atu i ai [Peresitene Monson] o Harold Gallacher. Sa malolosi lona toalua ma lana fanau i le Ekalesia, ae sa le malosi Harold. Sa talosaga atu lona afafine o Saronia ia Epikopo Monson pe mafai ona ia ‘faia se mea’ e toe toaga mai ai lona tama. I le avea ai ma se epikopo, sa ia lagonaina le uunaia o ia i se tasi aso e alu atu ia Harold. Sa o se aso vevela o le taumafanafana na tuitui atu ai o ia i le faitotoa valavala a Harold. Sa mafai ona iloa atu e le epikopo o saofai mai Harold i lona nofoa, o loo ula lana tapaa ma faitau le nusipepa. ‘O ai lea?’ na fesili lē fiafia mai ai Harold, e aunoa ma le ea ae i luga.

Afai tatou te fia faapei atili o le Matai, o Le na “le sau ina ia auauna tagata ia te ia, a e peitai ia auauna mai o ia,” o le a tatou sailia Lana fesoasoani i le auauna atu i isi i lea aso ma lea aso.

“O lou epikopo,’ na tali atu ai Tom. ‘Ua ou sau ta te faamasani ma fautua atu tou te o atu ma lou aiga i a tatou fonotaga.’

“Leai, ou te pisi tele,’ o le tali inoino mai lea. Sa le’i tepa ae lava o ia i luga. Sa faafetai atu i ai Tom mo lona faalogo mai ma aluese loa mai le faasitepu o le faitotoa. Sa siitia ese le aiga e aunoa ma le auai atu o Harold i sauniga.

“O ni tausaga mulimuli ane . . . na telefoni atu ai Uso Gallacher i le ofisa o Elder Thomas S. Monson ma talosaga mo se avanoa la te feiloai ai.


“. . . Ina ua feiloai le toalua lea i se taimi mulimuli ane, sa la feipoai. Na fai atu

Harold, ‘Ua ou sau e faatoese atu ona o lo’u le alu ese mai i lo’u nofoa ma avatu oe i totonu o le fale i lena aso o le taumafanafana i le tele o tausaga ua alu.’ Sa fesili atu Elder Monson ia te ia pe [ua] ia toaga i le Lotu. Sa tali atu Harold ma ataata: ‘Ua avea nei au ma fesoasoani lua i le au epikopo o le matou uarota. O lau valaaulia ou te sau i le lotu, ma la’u tali le lelei, sa faatalutaluā ia te au, o lea na ou naunau ai loa e fai se mea e uiga i ai.’”⁴

Faia o Filifiliga i Aso Taitasi

O le mafaufau i a tatou meaa i o le aso tatou te nofouta ai i vaega auilili o o tatou olaga,

“O a’u le areto ola na alu ifo mai le lagi: pe a ai se tasi i lenei areto ona ola ai lea o ia e faavavau: o le areto foi ou te avatua, o lo’u tino lea, ou te avatua ma ola o le lalolagi.”



i le taua o mea laiti e alu ai o tatou aso. Ua aoao mai aafiaga e faapea, i se faaipoipoga, mo se faaitaitaiga, o le faifai pea o le agalelei faigofie, fesoasoani, ma le gauai atu e sili atu mea latou te faia i le faaolaolaina o le alofa ma le fafagaina o se mafutaga nai lo o se faatinoga maoae pe taugata e seasea ona faia.

E faapena foi, i filifiliga i aso uma, e mafai ona tatou puipuia ni faatosinaga matautia mai le ofi mai i o tatou olaga ma avea ai ma vaega o tagata tatou te i ai. I se talanoga faasamasamanoa sa ma faia ma Elder Neal A. Maxwell (1926–2004) i ni tausaga ua mavae, sa ma matauina ai e mafai e se tasi ona aloese mai le tele o ponokalafi ma ata ponokalafi i le na o le faia o filifiliga sao. Mo le tele lava o itu, e na o se loto pulea ia le alu ai i nofoaga e maua ai ponokalafi—faaletino pe faaeletonika. Ae ui i lea, matou te iloa, ona ua matuai taatele, e mafai ai e ponokalafi ona osofaia faafuasei se tagata sa faia ni ana lava fuafuaga. “Ioe,” o le manatu lea o Elder Maxwell, “ae e mafai ona ia vave teenaina. E le tatau ona ia valaauliaina e sau i totonu ma ofo atu i ai se nofoa e saofai ai.”

E faapena foi i isi faatosinaga ma mausa faataumaoui. O lo tatou gauai atu i aso taitasi ina ia aloese i le taimi muamua lava o na mea e mafai ona puipuia ai i tatou mai le alafa’i mai i se aso o i luma ma le iloaina ona o le le mataala, ua mauaa ai se mea leaga po o ni vaivaiga i o tatou loto.

O le mea moni, e le tele ni mea i se aso e faapea e matuai leai lava se aoga. E oo lava i mea masani ma le fai faafia e itiiti ae o ni mea taua, ma o le aluga o taimi o le a atiina ae ai le amio pulea ma uiga ma le faatula-gaga e manaomia e malamalama ai i a tatou fuafuaga ma miti. O le mea lea, a o e ole atu i le tatalo mo au mea e ai o le aso, ia mafaufau ma le totoai o ou manaoga—i mea atonu e te le o maua ma mea e tatau ona puipui mai ai oe. A o e sauni e moe, mafaufau i mea na faamanuiaina ma mea e lei faamanuiaina o le aso, ma mea o le a faaleleia teisi ai le aso o

le a sosoo ai. Ma faafetai i lou Tama Faalelagi mo le manai na Ia tuuina i lou ala e tasi ai oe i le aso. O lou tomanatu o le a faateleina ai lou faatuatua ia te Ia a o e vaaia Lona aao o fesoasoani atu ia te oe e onosaia ai nisi o mea ma sui ai isi mea. O le a mafai ona e olioli i se isi aso se tasi, i se isi laasaga se tasi agai atu i le ola e faavavau.

Manatuina o le Areto o le Ola

O le mea e sili i na mea uma, ia manatua ua i ai o Ia o le sa avea ma ituaiga ma faailoga o le manai, o le Togiola.

“O a’u o le areto o le ola.

“Na aai e o outou tama le manai i le vao, a ua oti i latou.

“O lenei le areto ua alu ifo mai le lagi, ai se ai ai ona le oti lea o ia.

“O a’u le areto ola na alu ifo mai le lagi: pe a ai se tasi i lenei areto ona ola ai lea o ia e faavavau: o le areto foi ou te avatua, o lo’u tino lea, ou te avatua ma ola o le lalolagi” (Ioane 6:48–51).

Ou te molimau atu i le soifua moni o le Areto o le Ola, o Iesu Keriso, ma le mana e le iu ma le o’oo’o o Lana Togiola. O le iuga, o Lana Togiola ma Lona alofa tunoa o la tatou mea e ai o le aso. E tatau ona tatou sailia o Ia i aso uma, e fai Lona finagalo i aso taitasi, ia tasi ai ma Ia e pei ona tasi o Ia ma le Tama (tagai i le Ioane 17:20–23). A o tatou faia faapea, tau ina foai mai e lo tatou Tama Faalelagi a tatou mea e ai o le aso. ■


Mai se faeasaita a le Ofisa o Aoga a le Ekalesia na tuuina atu i le aso 9 o Ianuari, 2011. Mo le anotusi atoa i le Igilisi, asiati i le speeches.byu.edu.

FAAMATALAGA

1. N. Eldon Tanner, “O Le Aso O Le A Ou . . .,” *Liahona*, Mat. 2003, 27–28.
2. David A. Bednar, “Ia Matua Maelega ma Mafaufau i le Aiga,” *Liahona*, Nov. 2009, 20.
3. Ezra Taft Benson, “O Se Liua Maoae o le Loto,” *Liahona*, Mat. 1990, 7.
4. Heidi S. Swinton, *To the Rescue: The Biography of Thomas S. Monson* (2010), 160–61.

O le iuga, o Lana Togiola ma le alofa tunoa o la tatou mea e ai o le aso.





SA SOIFUA E PEI ONA IA AOA O MAI

O aafiaga mai le soifuaga o Peresitene Siaso Alapati Samita ua faaalua ai, e le gata ina talitonu o ia i le talalelei—ae sa soifua ai foi.

Saunia e Ted Barnes

Matagaluega o Mataupu Aoaina

I le taufaaiiuga o se aso pisi, sa saofai ai John A. Widtsoe i lona ofisa, “ua le lavā ina ua maea galuega o le aso.” Sa feagai o ia ma se faafitauli o le feinau, ma sa ia lagonaina le mamafatu o ona tiutetauave. “Sa ou vaivai,” o lana tala lea.

“O le taimi foi lea sa tuitui mai ai le faitotoa, ma savali mai i totonu Siaso Alapati Samita. Fai mai o ia, ‘O lea o le a ou alu i le fale ua maea au galuega o le aso. Sa ou mafafau ia te oe ma faafitauli e tatau ona e foia. Sa ou sau e faamafanafana atu ma faamanuia atu ia te oe.’

“... O le a le galo lava ia te au. Sa ma talanoa mo sina taimi; ona ma faamavae ai lea, ae alu i le fale. Sa faagaetia lo’u loto. Ou te le’i toe vaivai.”


O le toe ta’ua ai o lenei aafiaga i le tele o tausaga mulimuli ane i le ave ai ma se sui o le Korama a Aposetolo e Toasefululua, na saunoa ai Elder Widtsoe (1872–1952): “O le soifuaga lena o Siaso Alapati Samita. . . . Na ia ofoina mai lona lava taimi, o lona lava malosi.”¹

O Siaso Alapati Samita (1870–1951), o le na auuna atu o le Peresitene lona valu o le Ekalesia, mai le 1945 i le 1951, na talitonu afai e i ai moni sa tatou molimau o le talalelei a Iesu Keriso, o le a faaalua lea i o tatou olaga—ae maise lava i le ala tatou te taulimaina ai le tasi ma le isi. Sa ia aoao mai “O se olaga sa’o ma le tumau ai, o le molimau aupito malosi lena o le a mafai ona tatou tuuina atu i le moni o lenei galuega.”²

I le *Aoaoga a Peresitene o le Ekalesia: Siaso Alapati Samita*, o le mataupu aoaina a le au Perisitua Mekisateko ma le Aualofa mo le 2012, o loo faaalua mamana ai le molimau a Peresitene Samita—e ala i ana aoaoga ma e ala i tala mai lona soifuaga. O nisi nei o faataitaiga o nei tala ma aoaoga.

O Le Mana o le Agalelei

I se tasi aso vevela o le taumafanafana, sa fai ai e nisi o le auaigaluega ni galuega lipea i le auala i fafo mai o le maota o Peresitene Samita. A o faateleina le galuega ma faasolo vevela atili le la, sa amata ona faaaoaga e le auaigaluega ni upu masoa ma le mataga. E le’i leva ae



oo atu se tasi o tuaoi ma otegia le aufaigaluega ona o a latou gagana masoa, ma tau atu i ai o loo nofo latalata atu Siosa Alapati Samita. Sa le'i ano i ai le aufaigaluega ma atili ai ona fai upu masoa.

O le taimi lea, sa i ai Peresitene Samita i totonu o lona umukuka e tapena se sioki vaitipolo. Sa ia aveina atu i fafo i se ipu mafolafola lautele ma ni ipuina mataetae ma fai atu i le aufaigaluega, "Au uo e, ua matua vevela tele ma ua outou lelavava. O le a le mea tou te le mapu mai ai i lalo o o'u laau ia ma taumafa ai se vaimalu?"

I le lotomaulalo ma le agaga faafetai, sa taliaina ai e le aufaigaluega lana ofo, ma ina ua uma la latou malologa na taliaina ma le fiafia, sa latou faamaeaina loa la latou galuega i le faaaloalo ma le ffilemu.³

O aafiaga e pei o lenei e faaalua ai le talitonuga mau-maututu o Siosa Alapati Samita e faapea, e mafai ona "faafetaia"ia a tatou faafitauli i le agaga o le alofa ma le agalelei i tagata uma."⁴ "E i ai i latou o le a faia ni mea sese," na ia saunoa ai. "Ua i ai nisi o i tatou ua se ese, ae o i latou o fanau a lo tatou Alii ma e alofa o ia ia i latou. Ua Ia tuuina mai ia te oe ma au le aia tatau e o atu ai ia i latou i le agalelei ma le alofa ma le onosai ma se mana o ia faamanuia, saili ia toe aumaia i latou mai a latou mea sese o loo latou faia. E le o sa'u aia le faamasino. . . . Peitai, o lo'u avanoa, pe afai ou te vaai ua latou faia mea sese, pe afai e mafai, ona toe faaliliu mai i latou i le ala e tau atu i le ola e faavavau i le malo Selesitila."⁵

"Oka se olioli, oka se mafanafana, oka se faamalieina e mafai ona faaopoopo i olaga o o tatou tuaoi ma uo e ala i le agalelei. Ta fia mana o tusi faamatamatatele lona upu ma faaagiagia i le ea. O le agalelei o le mana ua tuuina mai e le Atua ia i tatou e tatala ai loto maa ma faamalie ai agaga faamaualuga."⁶

Faasoaina atu o le Talalelei

Na manatu Peresitene Samita o le faasoaina atu o le talalelei ia "agalelei a'ia'i."⁷ Sa ia taliaina ma olioli i mea lelei sa ia maua i nisi o ekalesia, ae sa ia iloaina o le

talalelei toefuataina o loo i ai se mea tulaga ese ma taua e ofoina atu i tagata.

I se tasi taimi a o auauna atu o se peresitene o le misiona, sa fai atu se tagata ia te ia, "Ia, mai mea uma e mafai ona ou aaoaina, e tutusa lava le lelei o la outou ekalesia e pei foi o isi ekalesia."

"Sa ou manatu ai faapea lava ia o se tala lelei lea ua fai mai," o le saunoaga lea a Peresitene Samita. "Ae sa ou fai atu ia te ia: 'Afai e leai se taua tele o le Ekalesia lea ou te sui ai i le fanau a tagata nai lo se isi ekalesia, o lona uiga ua sese a'u i lo'u tiute o loo fai nei.'"⁸

O se tasi o mafuaaga e matuai taua ai la tatou savali, na aao mai ai Peresitene Samita, o le mea moni e faapea "o le Au Paia o Aso e Gata Ai ua na o i latou na o loo tauaveina le pule a lo tatou Tama Faalelagi e faatautaia ai sauniga o le Talalelei. Ua manaomia i tatou e le lalolagi."⁹

Ona o lenei mea, sa finagalo ai Peresitene Samita ia lagona e le Au Paia o Aso e Gata Ai "se mana o o'oo'o ma le naunautai e faasoaina atu i fanau uma a lo tatou Tama ia mea lelei ua ia faaee mai ma le agalelei i o tatou luga."¹⁰

Fai mai a ia, "Ou te manatu o nisi taimi e le lava lo tatou lagonaina o le taua o [le talalelei], tatou te le o aaoaina atu ma le faamaoni a'ia'i o loo manaomia."¹¹

Sa matauina e se uo lelei le auala na faataitai ai e Peresitene Samita le "mana naunautai" i le faasoaina atu o le talalelei: "E tele ni taimi sa ou maua ai le avanoa e faimalaga ai i le nofoaafi ma Peresitene Samita. O taimi taitasi sa ou matauina ai e alu lelei loa le malaga a le nofoaafi, ona tago loa lea i nai tamai tusi o le talalelei mai lana ato, tuu i lana taga, ona agai atu loa lea i le pasese, ona ou faalogo atu ai lea i se taimi puupuu o faamatala le tala o le faavaeina o le Ekalesia e le Perofeta o Iosefa Samita pe faamatala le malaga umi a le Au Paia mai Navu ma o latou tofotofoga ma faigata, a o laasia mai lafanua valevalenoa o Iuta, pe faamatala foi ni mataupu faavae o le talalelei i sana uo fou. Ona sosoo mai ai lea o lea talanoaga ma lea talanoaga ma se tasi o le pasese pe a uma se isi, seia iu lava ina taunuu le malaga. I le taimi atoa na ou mafuta ai

ia Peresitene Samita, lea e silia ma le fasefulu tausaga, sa ou aoaoina ai po o fea lava e alu i ai o ia, e muamua lava, o ia o se faifeautalai mo le Ekalesia a Iesu Keriso o le Au Paia o Aso e Gata Ai.”¹²

Aoaoina o a Tatou Fanau

Sa tauaveina ma le faamaoni e Siaoisi Alapati Samita ma lona faletua o Lusi, le tiute paia o le “tausi o a [laua] fanau i le malamalama ma le upumoni” (MF&F 93:40). Sa faamatala e lo la afafine o Edith se tasi taimi na faaoga ai e lona tama se avanoa e aoao mai ai. Sa alu atu i se taavale laupasese i le latou fale mai se aoga piano, ma sa le aveina e le avetaavale lona pasese. “Sa pasi loa o ia mai ia te a’u,” sa ia faamatala ai, “ma sa ou taunuu i le mea ou te alu i ai o la lava e uu la’u tupe i lo’u lima, ma o le mea moni na ou fiafia ua ou tietie fua.

“. . . Sa ou tamoe fiafia atu i lo’u Tama ma ta’u atu i ai lo’u laki. Sa faalogologo mai o ia ma le onosai i la’u tala. Sa amata ona ou mafaufau ua matua manuia lava a’u. . . .

“Ina ua uma la’u tala, sa fai mai Tama, ‘Ae, talofa e isi o’u afafine, tusa pe le iloa e le ave-taavale lena mea, ua e iloa ma ou iloa ma iloa foi e le Tama Faalelagi. O lea, e toatolu lava i tatou e tatau ona faamalieina i le vaai ua e totogia atoa le tau o le mea na e maua.’”

Sa toe alu Edith i le tulimanu o le auala ma totogi lona pasese. Sa ia faamatala mai mulimuli ane, “Ou te matuai faafetai mo se Tama sa lava lona atamai e faasino mai ai lo’u sese, aua ana faapea e faagalogalo, semanu ua ou manatu sa ia faamaonia.”¹³

Sa aoaoina e Peresitene Samita tagata o le Ekalesia e faapea, o le alofa ua i ai le mana e musuia ai fanau e ola amiotonu: “Aoa o outou fanau e tausi le tulafono o le amio mama. Siomia i latou e lima o lo outou alofa, ina ia leai so latou manao e faatino faaosoosoga i mea leaga o loo



O loo faaali atu e Peresitene Samita le Tusi a Mamona ia Many Turquoises (agavale) ma Manuelito Begay.

siomia ai i latou i itu uma.”¹⁴

“O lo tatou tiute—e tatau ona ou fai atu o lo tatou avanoa ma lo tatou tiute le ave ia lava se taimi e siosiomia ai a tatou fanau i ni malupuipuiga ma ia matua alolofa ia i latou, ina ia tatou maua ai lo latou alofa o le a latou fiafia ai e faalogo mai i a tatou fautuaga ma apoapoaga.”¹⁵

Aiga e Faavavau

Sa faaiipoipoina Siaoisi Alapati ma Lusi Samita i le pe tusa ma le 40 tausaga, ae amata loa ona tauivi mo se taimi umi ia Lusi ma le faaletonu o lona soifua maloloina. E ui ina sa popole o ia mo [Lusi] ma taumafai e faamafanafana o ia i le tele na ia mafai ai, ae o tiute o Peresitene Samita o se Pulega Aoao sa masani ona manaomia ai lona aluese mai le aiga. I se tasi aso ina ua maea le saunoaga a Peresitene Samita i le falelauasiga, sa tuuina atu e se tasi ia te ia se laupepa o ta’u atu ai, ia toe foi loa lava i le fale. Sa ia tusia mulimuli ane i lana api o talaaga:

“Sa ou tuua loa lava le falesa peitai, sa manavaina e si o’u toalua Faapelepele lana toe manava ae ou te lei taunuu mai i le fale. Sa tuua e ia lenei olaga a’o ou lauga i le falelauasiga. Ua matuai tuulafoaiina lava a’u e aunoa ma se fesoasoani tuuto ma o le a ou matua misia lava o ia.”

“E ui ina faanoanoa tele lo matou aiga,” na ia tusia, “na faamafanafanaina i matou i le

Na manatu Peresitene Samita o le faasoaina atu o le talalelei ia “agalelei a’ia’i” aua “o le Au Paia o Aso e Gata Ai na o le pau ia o tagata o loo i ai le pule a lo tatou Tama Faalelagi e galuhue ai i sauniga o le Talalelei. E manao-mia i tatou e le lalolagi.”

mautinoa o le a i ai se toetuufaatasiga ma le tina, pe afai e tumau lo matou faamaoni. . . . E ese le agalelei o le Alii ma sa Ia aveesea lagona uma o le oti, lea ou te matua faafetai ai lava.”¹⁶

Na maua mai e Peresitene Samita le malosi ma le mafanafana mai lana molimau i le ata o le faaolataga, ma sauniga o le malumalu e faamau ai aiga e faavavau. Sa ia aoao mai:

“O le mautinoa e faapea e faaauau lava i le lagi a tatou sootaga o loo fai iinei o ni matua ma fanau, o ni tane ma ava, ma o le amataga lenei o se malo sili ma le mamalu sa fuafua e lo tatou Tama o le a fai mo tatou tofi i le isi itu, e faatumulia ai i tatou i le faamoemoe ma le olioli.


“Afai tatou te mafaufau, e pei ona manatu ai le toatele, ua maliu lo’u toalua faapelepele, ma ua maliliu foi o’u matua pele, ma ua mou atu e faavavau mai lo’u olaga ma o le a ou le toe vaai lava i ai, ona aveesea ai lea o se tasi o o’u fiafiaga aupito sili o le olaga: o le mafaufau e toe feiloai ma i latou, ma latou faafeiloai mai ma lo latou naunau alofa, ma faafetai atu ia i latou mai le ta’ele o se loto faafetai mo mea uma sa latou faia mo au.”¹⁷

“A oo ina tatou iloaina o le oti ua na o se tasi o laasaga e ui ai fanau a le Atua mo le faavavau, ma e tusa ai ma lana fuafuaga, o le a aveesea ai le tiga o le oti ma tatou vaavaai atu ai i le moni o le ola e faavavau. E toatele aiga ua faatofa atu mo se taimi lē tumau ia i latou e alolofa i ai. A tulai mai le maliu, e faapopole ai i tatou pe afai tatou te faatagaina, ona oo mai ai lea o le faanoanoa tele i o tatou olaga. Ae afai e mafai ona matala o tatou mata faaleagaga ma mafai ona tatou vaai, ou te talitonu o le a faamafanafanaina i tatou i le mea o le a tatou vaai i ai. E lei tuua i tatou e le Alii e aunoa ma se faamoemoe. Nai lo lena, ua ia tuuina mai ia i tatou faamautinoaga uma o le fiafia e faavavau, pe afai tatou te taliaina lana fautuaga ma le apoapoaiiga a o i ai i lenei olaga faitino.

“E le o se miti faivavale lenei. O mea moni ia.”¹⁸

Alofa ma le Auauna Atu

O Peresitene Samita atonu sa sili ona lauiloa mo le alofa sa ia faaalua i isi. Sa talitonu o ia o le alofa e tatau



Luga: Peresitene Samita ma lona atalii o Siasia Alapati Samita le Itiiti. Luga ae: O se lomiga o le mekasini o le Time i le 1947 lea na faaalua ai se tusiga e uiga ia Peresitene Samita ma le Ekalesia.

ona avea ma ute o le talalelei. Sa ia ta'u atu i le Au Paia, "Afai e lei totoina e le talalelei a Iesu Keriso lena lagona o le alofa i o outou loto mo o outou uso a tagata, e pei ona tuuina atu ia te outou, ona ou fia fai atu lea, tou te le'i olioli lava i le faataunuuga atoatoa o lena meaalofo ofoofogia na oo mai i le lalolagi ina ua faatulagaina lenei Ekalesia."¹⁹

I le avea ai ma Peresitene o le Ekalesia, sa faamanuiaina ai e Peresitene Samita ia olaga o le faitau afe o tagata e ala i taumafaiga faaelefele i le lalolagi atoa ma isi taumafaiga. E ui i lea, sa ia maua lava le taimi e faatino ai auaunaga laiti, ma sili atu ona patino. Sa tusia e se tasi o ana uo, o Elder Richard L. Evans (1906–71) o le Korama a Aposetolo e Toasefululua: "E le o se mea fou le vaai o ia, a o lei amataina pe i le mae'a ai foi o galuega i le ofisa, o savali atu i faapaologa o maota gasegase, e asiasi atu i lea potu ma lea potu, e faamanuia, e faamalosi, ma faafiafaia atu, ma o lona tu faafuase'i atu i na nofoaga e matua talisapaia ma le lotofaafetai le mafanafana ma le faamalosi o lona susū atu. . . . O lona uiga masani o le alu atu i soo se mea na te lagonaina e mafai ona ia tuuina atu ai le fesoasoani ma le faamalosiuga."²⁰

Sa faaso mai e Peresitene Thomas S. Monson le faataitaiga lenei o le alofa o Peresitene Samita: "I se tasi taeo malulu, sa la'ueseina ai e le au faamama auala [i le Aai o Sate Lekil] ni poloka aisa tetele mai alavai. Sa fesoasoani le au leipa le tumau o e sa matua manaomia lava ni galuega, i le aufaigaluega masani. Sa i ai se tasi sa na o sona ofu mafanafana manifinifi sa fai, ma sa mafatia i le malulu. Sa tu atu se alii fuaitino lelei, ma lana soesa ua tafi lelei, i le aufaigaluega ma fesili atu i lea alii, 'E te manaomia nisi ofu mafanafana nai lo lena mitiafu i se taeo faape nei. O fea lou ofutele?' Sa tali atu le tagata e leai sona ofutele. Ona tatala lea e le alii na malaga ane lona lava ofutele, ma tuu atu i

le tamaloa ma faapea atu, 'O lou ofutele lea. E mamafa ma o le a e mafanafana ai. Ou te faigaluega i le isi ituala.' O le auala o le Malu-malu i Saute. O le Samaria agalelei na savali atu i le Maota o le Pulega a le Ekalesia i lana galuega o aso taitasi, ma ua aunoa ma lona ofutele, o Peresitene Siasoi Alapati Samita O Le Ekalesia a Iesu Keriso o le Au Paia o Aso e Gata Ai. O lana faatinoga o le agalelei limafoai na faaalai ai lona loto alofa. O ia moni lava o le leoleo o lona uso."²¹

O Faamatalaga o le Olaga i Aso Taitasi

Pe o le faasoaina atu o lona talitonuga i uso a pasese i le nofoaafi, pe o le tuuina atu i se tagata maalili e faigaluega i le auala o lona ofutele, e masani lava ona tuuina atu e Peresitene Siasoi Alapati Samita lana molimau e ala i ana gaoioiga faapea ma ana aoaoga. O se autu lauiloa ua soo ai le *Aoaoga a Peresitene o le Ekalesia: Siasoi Alapati Samita* e faapea, o le talalelei a Iesu Keriso e tatau ona i ai se aafiaga mamana i o tatou olaga.

E pei ona ta'ua e se tasi o tagata matau e uiga ia Peresitene Samita: "O lana tapuaiga e le o se aoaoga faavae e teu faamalulu. E le o se taumatematega. E sili atu lona uiga ia te ia nai lo na o se fuafuaga matagofie e faamemelo i ai. E sili atu i le na o se filosofia o le olaga. I se tasi o ona manatu i mea e ao ona faatino, o le tapuaiga o le agaga lea e ola ai se tagata, lea na te faia ai ni mea, pe tau lava o le fai atu o se upu alofa po o le avatu o se ipu vai malulu. E tatau lava ona faaalai lana tapuaiga i ana galuega. E tatau lava ona faaauau atu i auiliiliga o le olaga i aso taitasi."²²

Peresitene J. Reuben Clark Jr. (1871–1961), na aoteleina e se tasi o ona fesoasoani i le Au Peresitene Sili, le soifuaga o Peresitene Samita i upu nei: "O ia o se tasi o nai tagata toalaiti e mafai ona e faapea atu, sa soifua o ia e pei ona sa ia aoao mai."²³ ■

FAAMATALAGA

1. John A. Widtsoe, i le Conference Report, Ape. 1951, 99; tagai foi i le *Aoaoga a Peresitene o le Ekalesia: Siasoi Alapati Samita* (2011), xlii–.
2. *Aoaoga: Siasoi Alapati Samita*, 9.
3. Tagai i le *Aoaoga: Siasoi Alapati Samita*, 229.
4. *Aoaoga: Siasoi Alapati Samita*, 229.
5. *Aoaoga: Siasoi Alapati Samita*, 233.
6. *Aoaoga: Siasoi Alapati Samita*, 234.
7. *Aoaoga: Siasoi Alapati Samita*, 127.
8. *Aoaoga: Siasoi Alapati Samita*, 156.
9. *Aoaoga: Siasoi Alapati Samita*, 128.
10. *Aoaoga: Siasoi Alapati Samita*, 132.
11. *Aoaoga: Siasoi Alapati Samita*, 154.
12. Preston Nibley, i le *Aoaoga: Siasoi Alapati Samita*, 125.
13. Tagai i le *Aoaoga: Siasoi Alapati Samita*, 241.
14. *Aoaoga: Siasoi Alapati Samita*, 246.
15. *Aoaoga: Siasoi Alapati Samita*, 234.
16. Tagai i le *Aoaoga: Siasoi Alapati Samita*, xxix.
17. *Aoaoga: Siasoi Alapati Samita*, 85–86.
18. *Aoaoga: Siasoi Alapati Samita*, 79–.
19. *Aoaoga: Siasoi Alapati Samita*, 14–15.
20. Richard L. Evans, i le *Aoaoga: Siasoi Alapati Samita*, 11–13.
21. Thomas S. Monson, i le *Aoaoga: Siasoi Alapati Samita*, 13.
22. Bryant S. Hinckley, i le *Aoaoga: Siasoi Alapati Samita*, 2–3.
23. J. Reuben Clark Jr., i le *Aoaoga: Siasoi Alapati Samita*, 3.

MAAUILA MA MATAGI MAATIATI

I se tasi aso ina ua uma la'u sifi i le Malumalu o Idaho Falls Idaho, sa ou ofo atu ai e momoli ni uso se toalua i le la taavale, sa pe i le auala i le itu i sasae o Idaho Falls, Idaho, ISA. Sa tutu atu i ai se ulugalii agalelei i lena aso malulu maatiati o Tesema ma aumai ia Uso Thompson ma Uso Clark i le mamao na totoe e oo mai ai i le malumalu.

Sa manatu lava Uso Thompson sa manaomia e lana taavale se maa fou. Sa ou aveina o ia e faatau mai se maa fou i se faleoloa o mea tautavaale na latalata ane, ma ona sa i ai a'u meafai-galuega i la'u taavale, o lea sa ou tali atu ai o le a ou suiina.

O le mea na laki ai, sa aumai sa'u pea totinilima fou ma lo'u ofumafanafana o le taumalulu. Sa ou susueina le tapuni o le afi o le taavale, ma ou sauni e aveese le maa ua pe ae sui atu i ai le maa fou.

Ina ia sui le maa, na tatau ona ou talaia ma aveese nisi o vaega o le taavale, e aofia ai le tanevai mo le fufuluina o le tioata tele pito i luma. E le'i leva ae ou iloa ai, na le fetau a'u meafaigaluega i nati uma ae o nisi o faovilivili sa matuai le minoi lava. Sa ou faaaogaina ni meafaigaluega eseese ma taumafai i ni tulaga eseese, ae sa leai se mea na minoi. O le fua o le malulu o fafo sa tusa ma le 5 tikeri Farenehaite (-15°C), ma o loli tetele foi na fepasiai mai na afua ai ni savili malolosi sa matuai maatiati le malulu. Sa ou oo i se tulaga o le leai o se mea e toe mafaia ona o le maalili, ma le le fiafia.

Sa ou liliu atu i le fesoasoani e tasi na maua. Sa ou tatalo faatauanau, ma faamatala atu ou manaoga i le Tama

Faalelagi ma ole atu pe mafai ona Ia faamatagatagaina nati ma faovilivili pe fesoasoani mai foi ia ou maua se auala e fai ai. O le uma ai o la'u tatalo, sa ou toe aumaia ai se palaea ma faa'iloa i se faovilivili mau. Ua leva lava ona matagataga! Sa ou faailoa atu ma le filemu ma le naunautai le faafetai, a o ou aveeseina mai le faovilivili ma faaauau ai le galuega.

E lei umi ae ou tau i se nati faaoso ita, ma le ū e mamao i totonu o le taavale. O le toe taia foi, sa ou tatalo faatauanau atili ai mo se fesoasoani, ma sa faia ma le faateleina o lo'u faatuatua. O le taimi lenei, sa ou lagonaina le faatonuina o a'u e aveese

muamua nisi o nati sa maualalo teisi atu ona mimilo ai lea o le taofi o le maa, o lea sa ou faia ai. Sa faigofie ona minoi le nati na mau. I se taimi e le'i umi, na ou aumaia ai i fafo le maa tuai.

Sa ou tuuina le maa fou i totonu ma faatasi ai ma ni tamailima na malo taa, sa ou toe tuufaatasia ai vaega uma i le lelei sa ou mafaia. Ona ou toe faapipiina lea o uaea eletise. Sa ki e Uso Thompson le taalvae ma se ataata tele a o ola le afi o le taavale. Sa ou tapunia ma le agaga faafetai le tapuni o le afi o le taavale. Pe tusa ma se itula sa ou i ai i fafo, ma sa matuai malo taa o'u vae a o o'u taulaalaa



*Sa ou faaaogaina ni meafai-
galuega eseese ma taumafai i
ni tulaga eseese, ae sa leai se
mea na minoi. Sa ou oo i se
tulaga o le leai o se mea e toe
mafaia ona o le maalili, ma le
le fiafia.*

O SE MEATOTINO TAUA

Sa masani ona ou faigaluega i se nofoaga autu e tau atu i ai telefoni mo le tautuaina o tagata faatau, lea sa matuai faigata ai i le au faigaluega ona fegalegaleai le tasi ma le isi. Sa tonu i le matou supavaisa e fai se aiga o le aoauli i se tasi o Aso Toonai ma le matou vaega atoa ina ia maua ai se avanoa e faamasani ai. Sa ia faatonuina i matou e aumai se mea faitino sa taua ia i matou ma faamatala atu pe aisea na taua ai.

A o ou mafaufau i lana talosaga, sa ou iloaina o se avanoa lenei e aoao ai le matou aufaigaluega e uiga i le talalelei. Talu ai o mea tau lotu o se autu maaleale, na ou iloaina ai e tatau ona ou faaeteete i le mea faitino na ou aveina ma le auala ou te faamatalaina atu ai lona taua ia te a'u.

Ina ua oo i le aso o le aiga i le aoauli, sa matou fiafia uma lava e faamasani lelei le tasi i le isi. Ina ua uma le aiga, sa amata loa e le matou supavaisa le gaioiga e ala i le faaali mai o lana mea faitino faatauaina—o se tusiata o lona aiga. Sa ia faamatala mai e uiga i faigata na ia oo i ai ina ua tetea ma lona toalua, ma le aveia ma se tina nofotoatasi ma le amataina o se olaga fou.

Ina ua maea nisi faaaliga o mea faitino, sa oo loa i lo'u taimi. Sa ou ta'u atu i le matou aufaigaluega o la'u mea faitino o se mea sa ou sau ma au i aso uma lava: o la'u mama FMT. Sa ou tau atu ia i latou o mataitusi na faauigaina i le "Filifili Mea Tonu" ma o le mama e faamanatu mai ai ia te au ia ou usitai e le aunoa i poloaiga a le Atua. Sa fesili mai nisi o tagata e uiga i le Ekalesia ma talitonuga o le Au Paia o Aso e Gata Ai, o lea na ou maua ai se avanoa e tau atu ai le taua o aiga i le fuafuaga a lo tatou Tama Faalelagi mo Lana fanau, ma o aiga e mafai

ona faavavau, ma o loo i ai so tatou Faaola na tuuina mai Lona soifua mo i tatou. Sa ou faasoaina atu foi nisi o aafiaga mai la'u misiona. A o ou tau-tala, sa ou lagonaina le Agaga, ma sa faapena foi i le matou au faigaluega.

Ina ua uma lona aso, na fesili mai nisi i isi fesili e uiga i le talalelei, ma sa ou valaauliaina nisi o i latou i le lotu. Mulimuli ane, na suia la'u galuega ma ou te le'i iloaina lava pe na i ai nisi o i latou sa mananao e iloa atili le talalelei, ae na ou lagonaina le fiafia i le iloa sa ou ta'u atu ia i latou ua i ai i luga o le fogaeleele le Ekalesia moni a Iesu Keriso ma o loo i ai se fuafuaga o le fiafia a le Tama Faalelagi mo Lana fanau.

I le aveia ai ma tagata O Le Ekalesia a Iesu Keriso o le Au Paia o Aso e Gata Ai, ua ia i tatou se tiutetauave e faasoa atu le talalelei. E ala atu i mea laiti ma faatauvaa e pei o se mama FMT, e mafai ai ona tatou aoao atu ni lesona maoae e ono aoga mo le faa-olataga o o tatou uso ma tuagane. ■ Rafael Barrios, Santa Fe, Atenitina

Talu ai o mea tau lotu o se autu maaleale, na ou iloaina ai e tatau ona ou faaeteete i le mea faitino ou te faasoaina atu.



faamalo atu i totonu o la'u taavale.

Sa ou mulimuli atu i le taavale a Uso Thompson ma Uso Clark e tau i le latou fale ina ia mautinoa ua tau-nuu saogalemu. A o aveina le taavale, sa ou lagonaina le manaia o le ea faamafanafana o la'u taavale, ma sa faasolosolo malie lava le mafanafana o o'u vae. Sa matuai ou faafetai i le Tama Faalelagi mo Lana fesoasoani. I lo'u toe foi mai sa faagaetia au i le iloa sa Ia taliina talosaga a nei uso e ala i le auina atu o au e fai ma Ana auauna. I Lana ala matagofie sa Ia tali atu ai i o laua manaoga ma toefaa-mausaliina ai lo'u faatuatua. ■

C. Lee Bendixsen, Idaho, ISA

Ina ua ou saofai i le nofoa, ma le lofituina i lagona ootia, sa sau le ma atalii e lua tausaga i le palanikeke e leai se mea o i ai ma musumususu atu, “Talofa, tuafafine pepe. Ou te alofa ia te oe.”



FAITAU LAU TUSI A MAMONA

Sa tatau ona faatumulia i maua i le olioli, peitai sa mamafa o ma loto ma sa aunoa ma ni mea i o maua lima. Sa fanau mai Debra Caelia Carter i le aso na tuupoina e fanau ai, 26 Aperila, 2010, peitai e fanau mai o ia ua maluu.

A o ma savavali atu i totonu o lo matou fale, sa ou uuina le palanikeke laitiiti piniki sa ou faaaogaina e sii ma luelue ai Debra i le falemai. Ina ua ou saofai i le nofoa, ma le lofituina i lagona ootia, sa sau lo ma atalii e lua tausaga i le palanikeke e leai se mea o i ai ma musumususu atu, “Talofa, tuafafine pepe. Ou te alofa ia te oe.

Na tafe ifo ou loimata, ma sa ou faliu ese. A o ou faia, sa tau atu lau vaai i upu o se pepa lautele o i ai se savali mai le mekasini o le *Uo* na tau-tau i le puipui: “E na o si tatalo lava le

mamao ese o lo tatou Tama Faalelagi, ae o le Agaga Paia e na o si musumususu lava lona mamao ese.”¹

Sa amata ona sasaa atu lo’u loto i le Atua i se tatalo filemu, ma le faatauanau. A o ou faia, sa ou lagonaina le musumususu mai o le Agaga Paia, “Toe faitau lau Tusi a Mamona.” Na faatoa uma lava ona ou faitauina, ae sa matilatila le lagona ma manino le uunaiga.

Sa ou usupo ane lava i le taeao na sosoo ai, ma amata loa ona ou faitauina le Tusi a Mamona. Sa ou faaaogaina penitala ma peni maka e faailoga ai fuaitau uma lava e uiga i le faatuatua, tatalo, faamoemoe, uiga o Iesu Keriso, talai atu o le talalelei, ma le faalogo i le siufofoga o le Alii. Sa ou iloina e tatau ona ou faia mea na faia e Nifae, Enosa, Moronae, ma

isi perofeta o le Tusi a Mamona ina ua latou puapuagatia i tofotofoga. Ma e ao ona ou faia ma lena lava alofa e tasi mo le Faaola lea na faatumulia ai o latou olaga i taimi o faigata.

I le aluga o nei itula o suesuega patino o tusitusiga paia i aso taitasi, sa ou lagonaina ai aao o le Alii o siomia au i Lona alofa, ma na ou lagonaina le mana o Lana taulaga togiola mo tagata uma. Sa fetalai mai le Agaga ia te a’u, na siomia au i se tofilemu, ma na oo mai tali i au tatalo faatauanau. O le mafaufau loloto i upu na ou faitauina na ou maua ai le malosi a o ou faanoanoa.

I se tasi aso, sa faatumulia ai au e le Agaga i le olioli a ou faitau i upu nei:

“Ua ou alofa i fanau laiti i se alofa ua atoatoa; ma ua tutusa i latou uma ma ua tofusua i le olataga. . . .

“Fanau laiti . . . ua ola uma i latou ia te Ia [Atua] ona o lona alofa mutimutivale. . . .

“Aua faauta, *ua ola fanau laiti uma ia Keriso*” (Moronae 8:17, 19, 22; faamamafa faaopopo).

Sa ou lagonaina e pei lava ua ou vaai atu i si au tama o loo *ola* ia Keriso—o ataata ma fiafia ma opoina i Ona aao. Mai lava i lena taimi na ou lagonaina ai le malosi e tumau mausali ai, ma na ou lagonaina se faamoemoe fou ua mumu i totonu o lo’u agaga mo lo’u aiga. Na ou iloina afai matou te pipiimau i le Togiola, i tusitusiga paia, i saunoaga a perofeta soifua, ma le tasi ma le isi e ala i a matou feagaiga o le malumalu, o le a toe faatasia i matou o se aiga e faavavau.

Ou te fiafia i le Tusi a Mamona, o loo molimau manino mai ia Iesu Keriso, ma mea na Ia faia ma o loo faia mo i tatou, ma mea e ao ona tatou faia ia avea ai e faapei o Ia. O le Tusi a Mamona e aumaia le

malamalama i lo'u olaga ma faatumulia ai lo'u loto i le faamoemoe ia Keriso. ■

Jewelene Carter, Virginia, ISA

FAAMATALAGA

1. Mai ia Elaine S. Dalton, "I Aso Uma, i Mea Uma, ma Nuu Uma," *Liahona*, Me 2008, 118.

O SEEVAE O TAMĀ

Oni nai tausaga ua mavae a o fesoasoani ou matua i le Aualofa e ilo nisi o lavalava, seevae, ma isi aitema e foai atu i e lima vaivai, sa matauina e lo'u tamā se pea seevae sa lelei ona tausia i le ogatotonu o se tasi o faaputuga. O le taimi lena, sa ia lagonaina ai se uunaiga malosi e tuu ma ia nei seevae.

Sa ata lo'u tina ma fai atu, "O le pea seevae lenei e faatoluina le laiti mo oe. E le taitai a ofi!"

Ae peitai, sa tauanau malosi atu pea lo'u tama. I le uma ai o nisi o tausuga mai uso [o le Aualofa], sa iu loa ina latou faatagaina e tuu ma ia na seevae.

O le taimi lava sa taunuu atu ai o ia i le fale, sa ia faamamaina, faatumu i nusipepa, ma teu i totonu o se atigipusa i le pito i luga o lana kapoti lavalava. Sa faatonuina i matou ia aua nei o matou fetagofi i le atigipusa. E lima tausaga na taatia ai lava i lena nofoaga.

I se tasi aso na siitia mai ai se aiga fou i le fale na matou tuaoi. E toalua ni tamaiti ma se pepe e ono masina le matua. Sa vave ona ma faauo atu ma lo'u uso i le la fanau teine e toalua, o e na matou tupulaga. Sa ma faasoa atu i a maua uo fou mea na matou aoaoina i le lotu, ma sa ma valaauliaina i laua i le Peraimeri. Sa fiafia ma naunau i laua e aoao atili i mea na ma faamatala atu i ai.

Ina ua foi mai mai le Peraimeri, sa le'i uma lo laua talanoa i o la'ua matua e uiga i le Ekalesia. Ona valaaulia ai lea e o maua matua le aiga atoa e faalogologo i lesona a faifeautalai ma o mai i le lotu. Sa latou taliaina ma le fiafia. Sa latou fiafia i lesona, ma sa matou fiafia foi e o faatasi ma i latou i le lotu.

Peitai ina ua oo i le Aso Toonai, sa foliga lotovaivai le la fanau teine. Ina ua ma fesili atu pe o le a le mea na faaletonu, sa fai mai i laua, ua le toe mananao o laua matua e o i le lotu.

Sa ma faanoanoa ma fai atu ia Tama e talanoa i o laua matua. Ina ua ia ta'u atu i ai faamanuiaga o le o i le lotu, sa tali mai le tama, "Ioe, ua ou iloa uma lava mea na. Ae o le faafitauli ou te le'i seeina lava se isi ituaiga seevae e ese mai i o'u seevae taalo mo se taimi umi tele, ae ou te iloa e

tatau ona matou o atu i sauniga Lotu i ni lavalava lelei."

O le taimi lea, na tepa mai ai lo'u tama i lo'u tina. Sa ia iloa ina lelei le mea e tatau ona fai. E fetau lelei lava seevae o loo i le atigipusa i le pito i luga o le kapoti lavalava a Tama i le tama o a ma uo, ma sa o atu uma le aiga i le lotu. Sa o se Aso Sa matagofie mo i latou ma mo i matou foi. E lei leva ae ave a i latou ma tagata o le Ekalesia, ma o le taimi nei o i latou o se aiga matagofie e faavavau.

Ou te iloa na maua e lo'u tama le taitaiga mai le Agaga Paia e teu na seevae. O se taunuuga, ua ou taumafai lava e le aunoa e saili Lana taitaiga i le vaavaai lea mo aiga ua saunia e faalogo i le talalelei. Ou te iloa ua Ia saunia ni aiga, ma ou te iloa e tatau ona tatou sailia i latou ma aumai ia Keriso. ■

Priscilla Costa Xavier, São Paulo, Pasila

Sa lagona e lo'u tama se uunaiga malosi e tuu ia seevae e ui ina sa ata lo'u tina ma faapea atu, "O lenei pea seevae e faatoluina le laiti mo oe."



TILOTILO I LUGA

*O le luitau mo i tatou uma o
le, aua nei tilotilo i autafa e
vaai po o faapefea ona matau
mai e isi tagata o tatou olaga,
ae ia tilotilo i luga e vaai pe
o faapefea ona silasila mai le
Tama Faalelagi ia i tatou.*

**Saunia e Elder
Carl B. Cook**

O Le Fitugafulu



I le avea ai ma se alii talavou, sa valaauina au e auauna atu i se misiona i Hamburg, Siamani. I le Misiona e Aoao ai Gagana—o le nofoaga muamua lena ua suia nei i le nofoaga autu e aoaoina ai faifeautalai—sa ou tauivi lava i le aoaoina o le gagana. A o mavae atu le vaiaso muamua sosoo ai ma le vaiaso lona lua, sa ou matauina ai, sa sili atu le vave o le alualu i luma o isi faifeautalai o la'u itu nai lo a'u. A o latou faasolosolo atu i mataupu faavae e faigata atu, sa o se mala paga a'u *dies, ders*, ma *das* es.

Sa amata ona ou popole—ma lotovaivai. E mafai faapefea ona ou faia se misiona faamanuiaina pe afai e le mafai ona ou fesootai atu i tagata na tofia a'u e aoao?

Sa ou tatalo mo le fesoasoani ma saili se faamanuiaga faaleperisitua, lea na tuuina mai ai se faamalosiuga. Ae sa faaauau pea ona ou suesue ma tauivi, ma sa i ai se tasi aso sa sili ai lava ona ou le mautonu ma popole nai lo se isi lava aso. A o ma savavali atu ma la'u soa i le auala savali o le faletele, sa ou tu i se kapoti

laitiiti a le teufale. Sa ou fai atu i lau soa e faatali laitiiti mai mo a'u. Sa ou mei atu i totonu o lena potu itiiti ma tootuli i luga o se pulumu e solo ai le fola. Sa amata ona ou augani atu i le Tama Faalelagi mo se toomaga.

Na tali mai le Alii i lena tatalo. Sa ou lagonaina le oo mai o le manatu lenei i lo'u mafaufau: "Ou te lei valaauina oe ia e atamai i le gagana Siamani. Sa ou valaauina oe ia e auauna atu ma lou loto atoa, manatu atoa, ma le malosi atoa."

O le taimi lava lena na ou faapea ai, "*E mafai ona ou faia le mea lena. E mafai ona ou auauna atu ma lo'u loto atoa, manatu atoa, ma le malosi atoa. Afai o le mea lena ua valaauina au e le Alii e fai, e mafai ona ou faia le mea lena.*" Sa ou tulai ae ma le lagonaina o le matuai toafilemu.


Mai lava i lena taimi, na sui ai la'u fua faatatau. Ou te lei toe faatusatusaina lo'u alualu i luma ma lo'u

faamanuiaina i au soa po o isi tagata o la'u itu. Nai lo lena, sa ou taulai atu i le ala na manatu le Alii sa ou taumafai ai. Nai lo le tilotilo i autafa e faatusatusa a'u lava i isi, sa amata ona ou tilotilo i luga, i se faaupuga faapena, ia iloa po o le a *Lona* finagalo e uiga i au taumafaiga.

Ou te lei iloa pe na ou aoaoina le gagana i se televave atu pe lelei atu foi mai lena taimi, ae ou te le'i toe lagonaina le popole lea sa ou lagonaina muamua. Sa ou iloa le mea na finagalo le Alii ou te faia, ma sa gafatia ona ou faia.

Sa amata ona ou tatalo i le Tama Faalelagi i le taeao, ma ta'u atu ia te Ia ou te le iloa aluga o le aso ae o le a ou faia le mea sili ou te mafaia. "O le a lava le mea e mafai ona ou aoaoina, faataga mai a'u ou te aoaoina," sa ou tatalo, "ae po o le a lava, o le a ou tuuina atu i Lau Afio le mea sili ou te mafaia i lenei aso."

A oo i le po ou te toe tatalo foi ma lipoti atu i mea na ou suesueina ma mea na ou faia. Sa ou faasoa atu i lo'u Tama Faalelagi ou tauiviga



faapea foi ma mea na ou manuia ai. Na amata ona ou liliu atu ia te Ia—ae le o isi po o au lava foi—e faamaonia ai lo’u alualu i luma.

O lena lesona sa ou aoaoina i totonu o se kapoti itiiti e teu ai pulumu i le silia ma le 35 tausaga ua mavae, na tumau lava ia te au i lo’u olaga atoa, i le taimi atoa i nisi o valaauga ma tofiga. Soo se taimi lava na talosagaina ai au e fai se mea lea e foliga mai e sili atu faamoemoega nai lo lo’u agavaa e fai ai, ou te manatua lava lena aafiaga ma ou fai ifo ia te a’u lava, “Faatali. O ai na valaauina oe? O ai o loo e tautuaina? O ai o loo e taumafai e faamalie?”

O le lalolagi o loo tatou ola ai ua i ai ituaiga uma o fuafaataata—o le tele lava e i fafo atu o i tatou. Ou te manatu o na ituaiga fuafaataata e mafai ona sili ona ogaoga i le autalavou. E te alu i le aoga ma maua se togi, ae o lena mea e tele ina le taua ai isi mea e te oo i ai i isi au vasega po o lou aiga po o tulaga o lou olaga. O nisi taimi e faamasinoina ai i tatou i o tatou foliga vaaia pe e ala i le taavale tatou te feoai ai. Tatou te ono faavaeina o tatou lagona o le taua o le tagata lava ia i le pe toafia uo o loo tusitusi i a tatou itulau i saite o fegalegaleaiga i upegafesootai. Tatou te popole i manatu o isi e uiga i le tagata o loo tatou tafafao faamasani po o a manatu o tagata pe a tatou faaipoipo ae lei uma a tatou aoga. E faigofie lava ona tatou paulia i le taumafai e faamalie isi, ae e le mafai ona tatou faatuatuaina na ituaiga fuafaataata mai fafo atu; e mafai ona televave tele le lalolagi e viia pe faitioina i tatou.

Ou te manatu o le luitau mo i tatou uma lava—ae atonu e faapitua lava mo le autalavou matutua—o le

taumafai e aua le tilotilo i autafa e vaai po o faapefea ona matau mai o tatou olaga e isi tagata ae ia tilotilo i luga e vaai pe o faapefea ona matau mai i tatou e le Tama Faalelagi. E le silasila o Ia i foliga i fafo ae o totonu o le loto (tagai i le 1 Samuelu 16:7). Ma ua Ia silafia, e sili atu nai lo se isi lava tagata, mea o loo manaomia e i tatou taitoatasi.

E faapefea la ona tatou “tilotilo i luga”? O nisi nei o mataupu faavae e mafai ona fesoasoani atu.

Ia Maua le Malosi Faaleagaga

E mafai ona tatou maua le malosi faaleagaga tatou te manaomia i le faia o filifiliga e ala i le amataina o aso taitasi i se tatalo faaletagata lava ia ma le suesue i tusitusiga paia. O lena tatalo e mafai ona aofia ai se talosaga ina ia mataala i le fuafuaga a le Atua mo i tatou. E ui atonu tatou te le iloa le fuafuaga atoa, ae e mafai ona tatou ole atu ia tatou mataala i le vaega o le fuafuaga o le a oo mai i lena aso. A tatou mataala, o le a tatou vaaia fua o a tatou filifiliga e mulimuli ia te Ia. O le a mafai ona tatou galulue i musumusuga tatou te maua. Ma o le a mafai ona tatou faia mea e faigata ona fai, mo mafuaaga tatau, po o le a lava le mea e manaomia ai.

Ia Tumau Faamaoni i le Taitaiga E te Maua

E mafai ona tatou “tilotilo i luga” e ala i le tumau faamaoni i le taitaiga ua tatou maua mai i se Tama Faalelagi alofa, e ala i faaaliga faaletagata lava ia. O isi taimi e faalotovaivai ai i tatou e isi tagata mai le faia o mea ua tatou lagonaina, ma e tusa lava pe lelei o latou faamoemoega, e tatau lava ona tatou faamaoni i mea na tatou lagonaina.

***E mafai ona tatou
“tilotilo i luga” e ala i
le tumau faamaoni i le
taitaiga ua tatou maua
mai se Tama Faalelagi
alofa, e ala i faaaliga mo
le tagata lava ia.***





TEPA AE I LE LAGI

“O le tepa ae i le lagi e tatau ona avea ma a tatou taumafaiga o le olaga atoa. O nisi o tagata vaea e u atu o latou tua i le potu o le Atua ae mulimuli i faatosinaga o sitali fesuisui, o faatosinaga o le lauiloa pepelo, ma le fiafia i le taimi lava lea. O a latou amioga e pei lava o le aafiaga mataga o Esau, lea na faatauina atu lona tofi o le ulumatua i se areto ma atasema tunu.

“Ma o a la taunuuga o amioga faapena? Ou te molimau atu ia te outou i le aso, o le liliu ese mai le Atua e aumaia ai feagaiga malepelepe, miti nutililii, ma faamoemoega le taulau. O pala o oneone mimiti faapena ou te aioi atu ia te outou ia aloese mai ai. O outou o se tofi tamalii. O le ola e faavavau i le malo o lo tatou Tama o lau sini lea.

“O se sini faapena e le ausia i se taumafaiga maoae e tasi, ae peitai, o le taunuuga o le amiotonu i le olaga atoa, o le faateleina o filifiliga potu, o le mausali o le faamoemoe ma amioga faatamalii.

“O le siomia ai i le fememeai o o tatou vaitaimi, o le feteenai o manatu, ma le le mautonu o le olaga i aso taitasi, o le faatuatua mausali e avea lea ma taula i o tatou olaga.”

Peresitene Thomas S. Monson, “Guideposts for Life’s Journey” (Brigham Young University devotional address, 13 Nov., 2007), 3, speeches.byu.edu.

O i maua ma lo’u toalua, e i ai lo ma afafine o loo faamisiona i Sepania. O lona afafine sa faaaluina ona tausaga o aoaoga maualuga i Niu Sila, a o avea ai au ma se peresitene o le misiona. Ina ua 21 ona tausaga, sa fai mai o ia, “Tama, Tina, ou te manatu e tatau ona fai sau misiona.” Ioe, sa ma fiafia i lenei faaiuga amiotonu, ae o le iloaina sa o se ositaulaga mo ia le alu ese atu mai ana uo ma aiga i le taimi o lona olaga talavou, sa ou fai atu ai ia te ia, “Ua uma ona fai lau misiona.”

Sa ataata o ia ma fai mai, “E leai, Tama, o *oe* ua uma. O lea ua *ou* fia alu e auauna atu i le Alii.”

“Ua lelei,” sa ou ataata ai. “Ia e faia lona misiona. Ia e mulimuli i lona musumusuga e auauna atu.”

O le taimi nei, ua ou matuai fiafia lava ona e le gata ina auauna atu o ia i lona Tama Faalelagi ma Lana fanau i Sepania, ae o loo mulimuli foi o ia i le musumusuga sa ia lagonaina. Sa ia le faatagaina e oo lava ia te a’u—o se matua sa taumafai e fia fesoasoani—e tauanau o ia e fai soo se mea lava e ese mai i lo le mea sa ia lagonaina sa sa’o mo lona olaga ma le fuafuaga a le Tama Faalelagi mo ia.

Aua le Fefe e Faatino

E ui i le taua o le iloa o le fuafuaga a le Tama Faalelagi mo o tatou olaga, ae o nisi taimi tatou te lāvea ai i le fia iloa lea o faamatalaga uma, mai le amataga e oo i le faaiuga, lea e oo ai ina tatou fefefe e faatino. Aua nei outou pauu i lenei mailei. Fai ni filifiliga lelei e faaoga ai lau faamasinoga sili ona lelei ma agai i

luma i lou olaga. E faamanuiaina i tatou a o tatou faia filifiliga.

Aua le fefe e fai filifiliga ona e te fefe i le faia o mea sese. Aua le

fefe e faataitai i mea fou. O le faia o lona mea, o le a e maua ai le fiafia i le aluga o le olaga.

Ia Tu i Lou Tulaga

A o nonofo lo matou aiga i Niu Sila, o nisi taimi sa lofituina ai i matou i le tele o luitau na oo i tagata sailiili, tagata fou liliu mai, faifeautalai, ma isi. Sa tele ina matou tatalo mo ni tali—ma le faamoemoe ia maua *vave mai!*

O i tatou uma lava e manaomia le fesoasoani. Ma o nisi taimi o tali tatou te sailia e vave oo mai. Ae o isi taimi e oo mai i isi auala nai lo le mea na tatou faamoemoeina. Pe oo mai i se taimi mulimuli ane lava nai lo le mea na tatou manatu i ai. Ma e seasea lava, ae e foliga mai, e le oo mai lava.

I tulaga faapena, ia faaoga le uiga o le “tu i lou tulaga” seia oo ina auina mai e le Alii se fesoasoani, e tusa lava pe o le a le umi. O le tu i lou tulaga e le faapea o le tu faasasa’o e le minoi. E pei ona ou ta’ua, aua le fefe e faatino. Ia faaauau pea ona fai o mea lelei. Ia faaauau pea ona usitai i poloaiga. Ia faaauau pea ona tatalo ma suesue ma fai le mea sili e te mafaia seia oo lava ina e maua se taitaiga faaopoopo. Aua nei e tiaia lou tulaga. I Lana lava taimi, o le a faatagaina ai e le Alii ia galulue mea uma mo lou lelei.

Ua atulasi ona faamanuiaina lo’u olaga i le “tilotilo i luga” talu mai lona aafiaga i le Misiona e Aoaoina ai Gagana. E pei ona faamalalama mai e Mamona i le Helamana 3:27, “E alofa mutimutivale le Alii ia te i latou uma o e e valaau atu i lona suafa paia, ma le faamaoni o o latou loto.” Sa ou lagonaina ma maua Lona alofa mutimutivale ma le alofa. Ou te iloa o le a oo mai lona alofa mutimutivale ia i tatou uma pe a tatou talitonu ma valaau atu i Lona suafa. ■

Tuusao i le **Mataupu**


Aisea ua malosi ai le **uunaiga** i alii talavou **e o e fai se misiona?**

Pe le o se filifiliga ea lea
a le tagata lava ia?

O le filifiliga patino a alii talavou taitoatasi e ao ona fai o le, pe alu pe leai e faataunuu lona tiute faaleperisitia o le auauna atu i se misiona. E pei ona sa saunoa Peresitene Thomas S. Monson: “O alii talavou agavaa uma lava, malolosi e tatau ona saunia e auauna atu i se misiona. O le galuega faafaifeautalai o se tiute faaleperisitia—o se matafaioi ua faamoemoeina e le Alii mai ia i tatou ua tele naua mea ua tuuina mai i ai. Alii talavou, ou te apoapoai atu ia te outou, ia saunia mo le galuega faafaifeautalai.” (“A o Tatou Toe Potopoto Faatasi Ai,” *Liahona*, Nov. 2010, 5–6).

O le saunia mo se misiona o se vaega o le aafiaga o le Perisitua Arona o se alii talavou. O lona tiute lea, ma e tatau ona ia lagonaina le mamafa talafeagai o lena tiute. Ioe, e le tatau ona ia faia se misiona i le na o le faapea o se mea ua faamoemoeina mai ia te ia, pe ona o lona lagonaina o le uunai malosi; e tatau ona ia auauna atu aua na te naunau e faasoa atu le talalelei toefuataina a Iesu Keriso i isi.

Peitai a o tatalo o ia e uiga i le faia o se misiona, e tatau foi ona ia manatua o le mauaina o le perisitua, ua ia taliaina ai le tiutetauave paia e “lapatai atu, faamalalama atu, apoapoai atu, aoao atu, ma valaau atu i tagata uma ia o mai ia Keriso” (MF&F 20:59), e aofia ai le auauna atu o se faifeautalai faamisiona. Afai e le mafai e alii talavou ona auauna atu ona o le faaletonu o le soifua maloloina po o se le atoatoa o le malosi, e tuusaunoina i latou ma le mamalu. ■





Pe o i ai ni agelu o le puipuiga?

Pe o i ai se agelu
o le puipuiga ua
tofia mo a'u?

O le faaupuga “agelu o le puipuiga” e le o faaoga ina i tusitusiga paia; ae, o agelu o loo taua e faapea e “auauna” (tagai i le Ominae 1:25; Moronae 7:22–29). “E tautatala agelu i le mana o le Agaga Paia” (2 Nifae 32:3) ma e masani ona soosoo tauau i le misiona a le Agaga Paia e faamafanafana, taiala, puipui ē faamaoni, ma faaali mai pe faamautinoa mai le mea moni. O lea la, o le Agaga Paia lava ia e mafai ona ta’ua o se agelu o le puipuiga.

Na aoao mai Elder Jeffrey R. Holland o le Korama a Apose-tolo e Toasefululua: “Mai lava i le amataga seia oo mai i le auga tisipenisione, sa faaoga lava e le Atua ia agelu . . . e faailoa mai ai Lona alofa ma le popolega mo Ana fanau. . . . Ae pe vaaia pe le vaaia, e latalata mai lava *i taimi uma*” (“O Le Auaunaga a Agelu,” *Liahona*, Nov. 2008, 29).

E le'i faaalua mai e le Alii pe ua tofia se agelu faapitoa se toatasi e vaaia tagata taitoatasi, ae e mafai ona e mautinoa e i ai le puipuiga ma le faamafanafanaga faalelagi. Afai e faaoga

lou faatuatua, o le a e maua le fesoasoani a le Atua, e aofia ai agelu e auina mai e faamallosia ma faamafanafana oe ma tuuina atu ia te oe le lototele e fai ai le mea sao. ■

O le a le tulaga o le Ekalesia i le tulaga faatauatane ma le faatauafafine? Pe talafeagai le faauo atu i tagata e i ai lagona faatauatane/ faatauafafine?

E tetee le Ekalesia i amioga ma uiga faatauatane ma le faatauafafine, ma tatou te aapa atu ma le loto malamalama ma le faaaloalo ia i latou e tosina atu i le itupa lava e tasi.

Afai e te iloa ni tagata e i ai lagona o le tosina atu i lana lava itupa, ia mulimuli i mataupu faavae e te faia i isi au faauoga: “Ia filifili ma le faaeteete au uo. O le a tele ina latou faatosinaina ou mafauauga ma au amioga, e oo lava ina fesoasoani e fuafua le ituaiga tagata o le a avea ai oe. Ia filifili uo e tutusa mea tou te faatauaina, ina ia mafai ai ona outou fefaamalosiaua’i o le tasi i le isi ia ola i ni tulaga mauululuga. O se uo moni na te faamallosiaua oe e te faia le mea silisili. . . . Ia fai faalelei ma agalelei ma faaaloalo i tagata uma” (*Mo Le Malosi o le Autalavou* [tamaitusi, 2001], 12).

Ua aoao mai le Ekalesia o le tulaga feusuai o le tagata ua i ai se faamoemoega i le fuafuaga a le Tama Faalelagi. Ina ia

tatou fiafia ma ia faataunuu lena faamoemoega, ua poloaiina ai i tatou e ola i le tulafono o le legavia. O amioga faatauatane/ faatauafafine e le ogatasi lea ma lena faamoemoega ma e solia ai poloaiga a le Atua.

Ae peitai, afai ua tosina atu se tasi i tagata o lana lava itupa ae na te le faatinoina na lagona, ua le agasala lena tagata. O le tulaga o le Ekalesia mo le ola mama e tutusa lava mo tagata uma, e tusa lava po o le a le itupa e tosina atu i ai se tasi. E le mafai e le Alii po o Lana Ekalesia ona sopoloa le vaai i soo se amioga e solia ai Ana tulafono. E toe faapea atu, tatou te inosia le amioga le mama, ae le o le tagata. ■

Mo ni faamatalaga atili e uiga i lenei autu, faitau i le saunoaga a Elder Jeffrey R. Holland, “Fesoasoani ia i Latou o Loo Tauivi ma le Tosina Atu i Itupa Tutusa,” Liahona, Oke. 2007, 40.



Saunia e Elder
Jeffery R. Holland

O Le Korama a
Aposetolo e Toasefululua

TAUSIA O FEAGAIGA

O SE SAVALI MO
I LATOU O LE A
AUAUNA ATU I SE
MISIONA



O le ki lava i lenei galuega o le tausia o a tatou feagaiga. E leai lava se isi auuala e mafai ai ona tatou maua mai ma faaali atu mana o le faaleatua.

O le a ou talanoa atu ia te outou e uiga i le taua tele o le tausia o feagaiga —o a'u i le tausia o a'u feagaiga, ma outou i le tausia o a outou feagaiga. O se mataupu lenei e tele atu nai lo o se talanoaga o le usiusitai, e ui o le usiusitai e mautinoa lava o sona vaega lea. Ma o se mataupu e sili ona patino.

I se tasi itu, o le mea aupito taua lea e mafai ona tatou talanoaina i le fuafuaga o le talalelei, aua e na o i latou e osia feagaiga ma e tausia feagaiga e mafai ona maua le faamanuiaga tupito o le malo selesitila. Ioe, a tatou talanoa loa e uiga i le tausia o feagaiga, ua

tatou talanoa i le fatu ma le agaga o lo tatou faamoemoega i le olaga nei.

Fausia o le Malo i le Tasi le Feagaiga i le Taimi

O se feagaiga o se maliega e fusia ai faaleagaga, o se tautoga faamaoni i le Atua lo tatou Tama o le a tatou ola ma mafaufau ma galulue i se ala faapitoa—o le ala a Lona Alo, le Alii o Iesu Keriso. A o le isi itu, e folafola mai e le Tama, le Alo, ma le Agaga Paia le matagofie uma o le ola e faavavau.

E mataina ia te a'u le faapea o feagaiga e osia e le tagata lava ia, taitoatasi. E i ai se feagaiga i le taimi o le papatisoga ma le faamauga, lea e amata ai lo tatou ala e agai atu i le ola e faavavau. O na sauniga o loo faatino ina mo tagata taitasi, e taitoatasi, e tusa lava po o le a le toatele e iu ina mauaina.

E i ai se feagaiga i le taimi e maua ai e alii le perisitua. O lena faaeina atu e masani ona tuuina atu i le tagata e toatasi i le taimi.

O feagaiga aupito maualuluga e mafai ona tatou osia e i totonu o le malumalu. O iina tatou te faia ai a tatou tautinoga e sili ona faamaoni i lo tatou Tama oi le Lagi ma o iina foi Na te tatala mai ai ia i tatou le uiga moni atoatoa o Ana folafolaga ia i tatou. E toe faapea atu, o nei aafiaga e taitoatasi, e tusa lava

pe tatou te o atu i le malumalu ina ia faamauina i isi tagata taitasi.

O le auala lena e fausia ai le malo o le Atua—e tasi le tagata i le taimi, e tasi le feagaiga i le taimi, o auala uma i la tatou faigamalaga i le olaga nei e tau atu i le feagaiga tupito o le malumalu paia.

O Le Tiute o Feagaiga o le Malumalu


E matuai taua ona e malamalama o le alu atu i le malumalu mo lou lava faaeega paia, e aofia ai sauniga matagofie e sauniuni ai oe mo lena faaeega paia, o se vaega taua o au tapenaga o le misiona ma lou tuuto i le misiona.

Pe a e alu i le malumalu, o le a amata ona e malamalama ai i le taua o na feagaiga o le malumalu, o le sootaga e le mavavaeeseina i le va o lou faaeega paia iina ma le faamanu-iaina o lau misiona.

E moni, o le upu lava ia o le *faaeega paia* ua faaalai ai le aano moni o lena sootaga taua. O le faaeega paia o se meaalofo. O loo i ai le upu autu e tasi o le *pelega*, o se meaalofo faapitoa lea e amata ai se ulugalii fou i lo laua olaga faaipoipoina. A o avea au ma peresitene o le Iunivesite o Polika Iaga, sa ou faaalaina se vaega o lo'u taimi e taumafai ai e fausia le pelepelega a le iunivesite,

ATA NA TUSIA E MATTHEW REEBER MA CHRISTINA SMITH





o lana pusa o meaalofa mai tagata foai agalelei.

O le mea lena e fai e le Atua mo i tatou i taimi uma tatou te faia ai se feagaiga ma Ia. Na te *faaeina* i tatou. Tatou te folafola atu e faia ni mea faapitoa, e faalagolago lava i le sauniga, ae folafola mai e Ia ni meaalofa faapitoa—meaalofa matagofie, meaalofa e le mafaamatalaina, toetoe lava o ni meaalofa e le mafai ona malamalama i ai. O lea ou te fai atu ai ia te outou e pei ona ou fai ifo ia te au lava—afai tatou te mananao moni ia faamanuiaina i o tatou valaauga, afai tatou te mamanao e maua fesoasoani uma ma avanoa uma ma faamanuiaga uma mai le Tama, afai tatou te mananao e matala mai le faitotoa o le lagi ia i tatou, ina ia mafai ona tatou maua le mana o le faaleatua, e tatau ona tausi a tatou feagaiga!

E te silafia e le mafai ona e faia na o oe lenei galuega. E tatau lava ona tatou maua le fesoasoani mai le lagi; e tatau ona tatou maua *meaalofa* a le Atua. Na Ia aoao mai lenei mea i le amataga lava o le galuega i

lenei tisipenisione. I le aoaoina mai “o le togiolaina o Siona,” na fetalai mai ai le Alii:

“Ina ia mafai ona saunia i latou lava, ma ia mafai ona aoaoina atili atoatoa lo’u nuu, ma maua le poto masani, ma iloa atili atoatoa e faatatau i lo latou tiute, ma mea ua Ou manaomia mai i o latou lima.

“Ma e le mafai ona faatauunuina lenei mea seia faaeina a’u toeaina i le mana mai luga.

“Aua faauta, ua Ou saunia se faaeega ma se faamanuiaga tele ia sasaa mai i luga o i latou, o le tulaga e oo i ai le latou faamaoni ma faaaauu pea i le lotomauualalo i o’u luma” (MF&F 105:10–12).

O lenei galuega e matuai ogaoga lava, ma ua matuai malosi foi le tete e i ai a le fili, o lea tatou te manaomia ai mana uma faalelagi e faaleleia a tatou taumafaiga ma uunai pea i luma le Ekalesia. O le ki i lena mea, mo i tatou o ni tagata taitoatasi o le feagaiga lea tatou te osia i le malumalu—o la tatou folafolaga e usitai ma ositaulaga, ia faapaia mo le Tama, ma Lana folafolaga e faamamanaina i tatou “i se faaeega maoae.”

Feagaiga ma le Galuega a le Alii

Pe o fesoasoani lenei mea ia e iloa ai le taua o a tatou folafolaga patino, faaletagata lava ia, i le vaaiga atoa ma le mamalu o le galuega? E pei o isi mea uma i le ata o le faaolataga, o le faamanuiaina o alii ma tamaitai faifeautalai uma i le lalolagi e iloa lea i le faifeautalai e toatasi i le taimi.

Tatou te le osia ni feagaiga i ni uarota po o ni siteki atoa. Leai, tatou te osia feagaiga o Uso Brown po o Uso Burns, Tuafafine Jones, po o Tuafafine Jensen. O le ki i lenei galuega o le tausia o a tatou feagaiga o tagata taitoatasi.

Ou te le iloa po o le a le misiona o le a e galue ai, ae ou te le talitonu na faia e lo tatou Tama oi le Lagi ni folafolaga faapitoa i lau misiona o se misiona [atoa]. Ou te iloa ua Ia faia ni folafolaga maoae ia te oe lava ia e toatasi.

O le taimi lava e tutu faatasi ai se misiona

atoa e ala i le malosi o le amiosa'o o faifeautalai uma lava, i le tausia taitoatasi o feagaiga e faifeautalai uma, ona mafai lea ona tatou aveesea mauga. O le taimi lava e i ai se lotogatasi ma se mana faapena, o se faaeega paia mai le lagi, e oo mai i faifeautalai taitoatasi uma i le misiona, e leai se mea e mafai ona "taofia le galuega mai lona alualu i luma." O le ala lenei "o le a agai ai i luma le upu moni a le Atua i le manino, mamalu, ma le tutoatasi."¹

Tatou te maua lena talitonuga mautu pe a leai se sooga vaivai i le filifili, pe a leai se ava o iloaina i le ofutau. O le taua faasagatau i le tiapolo ma le leaga, o le auala lea e maua ai manumalo uma o le talalelei—e tasi le feagaiga i le taimi, tasi le tagata i le taimi, tasi le faifeautalai i le taimi.

O le pogai lena na fetalai mai ai le Alii i taitai anamua o le Ekalesia, "Ia outou fusia faatasi ai outou lava ia outou faia ma le paia atoatoa i o'u luma—o le tulaga e oo i ai lo outou faia o lenei mea, o le a faapoopo ai le mamalu i le malo ua outou maua" (MF&F 43:9–10).

O le gagana lena faafeagaiga. O le mea tonu lena tatou te o i le malumalu e fai—ia fusia faatasi i tatou lava i le Alii ma i le tasi ma le isi ma faatasi ai ma lena malosiaga tatou te "galulue ai i le paia uma." O le isi itu, e oo mai ia i tatou ma la tatou galuega le mana ma le mamalu. O le aano tonu lena o le tausia o feagaiga na fetalai mai ai le Alii, "O A'u, o le Alii, e noatia a'u pe a outou faia mea Ou te fai atu ai; ae a outou le faia mea Ou te fai atu ai, e leai se folafolaga mo outou" (MF&F 82:10).

Talitonu mai ia te au. O le ki i lenei galuega o loo i ai lea i le tausia o a tatou feagaiga. E leai lava se isi auala e mafai ona tatou maua ma faaali atu ai mana o le faaleatua. Ua ia te outou le folafolaga a le Alii i lena mataupu.

O le a e alu atu i le malumalu e sauni ai oe mo lau misiona. Tausi au feagaiga na fai ai iina, feagaiga taitasi uma. O ni folafolaga e sili ona patino, sili ona paia e osia e i tatou taitoatasi ma lo tatou Tama oi le Lagi.

O Se Feagaiga e Molimau Atu

A o ou talosagaina lenei mea mai ia te outou, ou te manao ia outou iloa, o le a ou faia foi lena mea. O le a ou tausia foi a'u feagaiga. O se tasi o na feagaiga o le, i le avea ai ma se sui o le Korama a Aposetolo e Toasefululua, o se molimau faapitoa "o le suafa o Keriso i le lalolagi atoa" (MF&F 107:23). I le tausia o la'u feagaiga, e le gata ina ou molimau atu ia te outou i le aso e uiga i le Alii o Iesu Keriso ma o Ia sa faasatauroina, ae o au o se molimau—na valaauiina, faauuina, tofiaina e ave atu lena molimau i le lalolagi. Ou te fiafia lava e auai faatasi ma outou i lena galuega, a'u uo talavou pele.

Ou te iloa o loo soifua le Atua, o Ia o lo tatou Tama moni oi le Lagi, ma o le a Ia tausia Ana folafolaga ia i tatou e faavavau. Ou te iloa o Iesu o le Keriso, le Alo Pele e Toatasi o le Tama i le tino, ma le Faaola o le lalolagi. Ua ou iloa na puapuagatia, maligi Lona toto, ma maliu ina ia tatou maua le ola e faavavau.

Ou te iloa na faaali le Tama ma le Alo i le taulealea perofeta o Iosefa Samita, le perofeta maoae muamua o lenei tisipenisione, o le na maligi foi lona toto o se molimau i lona valaauga, o le faailoga mulimuli o le faamaoni ai ai o se tasi i ana feagaiga. Ou te iloa o na ki faaperofeta ua tuufaasolo ifo i se laina e le motusia i le 15 o isi tamalii seia oo mai i lenei taimi o loo i ai i le vaaiga ma le galuega faaperofeta a Peresitene Thomas S. Monson, o le faitaulaga sili pulefaamalumalu a le Atua i le lalolagi.

E moni lenei galuega. E moni nei tautinoga. Ua ou iloa e tutoatasi mai i se isi lava alii po o se tamaitai soifua na ola. Ua ou iloaina e ala i faaaliga a le Agaga Paia, lea e tuuina mai le taitaiga i lo'u olaga ma le taua i la'u molimau ma auina atu au—faatasi ma outou—e avea ma se molimau faapitoa i le Togiola o le lalolagi. ■

Mai se lauga na tuuina atu i se faasalalauga faasatelite a faifeautalai i le aso 25 o Aperila, 1997.

FAAMATALAGA

1. Joseph Smith, i le *History of the Church*, 4:540.





TAMAITAI TALAVOU, IA TUTULAI MA SUSULU ATU!

SAUNIA E LE AU PERESITENE AOA O TAMAITAI TALAVOU

O le autu o le Mutuale i le tausaga lenei o se valaau mo oe ia avea ma se taitai. O se valaau mo oe ia taulamua i le mama, tausafia, ma le paia. O se valaau e sui le lalolagi!

Ina ua avea oe ma se vaega o le faalapotopotoga a Tamaitai Talavou, na tuuina atu ia te oe se asoa o se

sulu lanu auro ma le paepae e asoaina o se faamanatu e faapea, i le avea ai ma se tamaitai talavou i totonu O Le Ekalesia a Iesu Keriso o le Au Paia o Aso e Gata Ai, o le a e tu atu mo le upumoni ma le

amiotonu ma ia tulai ma faasusulu atu lou malamalama i le lalolagi. O lona uiga o le a e faamaoni i lou faasinomaga paia o se afafine faapelepele o le Atua. O lona uiga o le a e taumafai e tu o se molimau ia te Ia ma le Faaola “i taimi uma ma i mea uma, ma i nofoaga uma” (Mosaea 18:9).

Matou te faamoemoe, o le tausaga

lenei o le a e asoaina ai ma le mitamita lau asoa e faamanatu atu ai ia te oe lava o oe o se faaitaiga ia i latou e siomia oe. O le a e “susulu atu” pe a e **tatalo** i aso uma, **faitau** i le Tusi a Mamona, **usitai** i tulaga faatonuina i le *Mo Le Malosi o le Autalavou*, ma **ataata**. Matou te iloa a e tausia poloaiga ma ola i tulaga faatonuina o loo maua i le *Mo Le Malosi o le Autalavou*, o le a e faasusuluina atu le olioli ma agavaa ai e taialaina [oe] e le Agaga Paia. O lenei taiala o le a mafai ai e outou taitoatasi ona fai filifiliga o le a fesoasoani e te agavaa ai e maua se pepa faataga o le malumalu.

I le avea ai ma se au peresitene aoao o Tamaitai Talavou, matou te molimau atu, a o e faia nei mea, o le a i ai iina le Faaola e faamalamalama lou ala. Ua Ia folafola mai ia te oe, “Ma o le a avea foi a’u ma o outou sulu . . . ; ma o le a ou saunia le ala i o outou luma, e tusa ma lo outou tausiga o a’u poloaiga; . . . ma o le a outou iloa ai o a’u lava ua taitaia outou” (1 Nifae 17:13). ■




AUTU O LE MUTUALE 2012

“Tutulai ia ma susulu atu, ina ia avea lo outou malamalama ma tagavai mo atunuu” (MF&F 115:5).



Luga: O Elaine S. Dalton (ogatotonu), peresitene; Mary N. Cook (tauagavale), fesoasoani muamua; ma Ann M. Dibb (taumatau), fesoasoani lua. **Luga ae:** O David L. Beck (ogatotonu), peresitene; Larry M. Gibson (tauagavale), fesoasoani muamua; ma Adrián Ochoa (taumatau), fesoasoani lua.



IA AVEA MA SE FAATAITAIGA SUSULU

SAUNIA E LE AU PERESITENE AOA O ALII TALAVOU

Alii talavou o le Ekalesia—tiakono, Aaoa, ma ositulaga o le Perisitua Arona matagofie—ua outou tauaveina i o outou luga le suafa o le Faaola; ua outou tauaveina Lona perisitua paia; ua valaauna outou e fai Lana galuega ma faamanuia ai i latou uma e iloa outou. O le taimi lenei mo outou e faataunuu ai o outou tiute o le perisitua ma “susulu atu” o se “tagavai mo atunuu” (MF&F 115:5).

O le taimi lenei ia “faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi” (Mataio 5:16). O Iesu Keriso o le faataitaiga atoatoa lea. Taumafai ia iloa o Ia, mulimuli ia te Ia, ma avea atili e faapei o Ia e ala i le usitaia o Ana polo-aiga ma le tausia o tulaga faatonuina o le Ekalesia e pei ona faamatalaina i le Mo le Malosi o le Autalavou. A o outou faia, o le a avea outou ma malosiaga susulu o le malosi faale-agaga ia i latou e siomia outou.

Na fetalai le Alii, “Ia mama outou o e e tauaveina ipu a le Alii” (MF&F 133:5). O lo outou amio mama o le a mafai ai ona outou susulu atu o se malamalama faapitoa i tagata o o outou uarota po o paranesi, a o outou fai ma sui agavaa o le Faaola

i le tuuina atu o le faamanatuga paia ia i latou i Aso Sa taitasi.

Ia vaavaai ma puemau mai avanoa i aso uma e auauna atu ai i ou aiga, uo, tagata o le korama, ma isi. O le a avea outou ma auauna mataina o le malamalama ia i latou ma e e matauina le leoa outou.

Ia susulu atu i faauoga faamaoni ma agalelei i tagata uma. Faasoa atu faamanuiaga matagofie o gaioiga a le Ekalesia ma aoaoga o le talalelei i a outou uo. Ia lototele ma valaaulia i latou e o mai i le Malamalama ma le Ola o le Lalolagi—o Iesu Keriso lea.

Matou te alolofa ia te outou. Matou te tatalo mo outou. Matou te moli-mau atu e alofa le Alii ia te outou ma e manaomia outou e fesoasoani e fausia Lona malo. O le taimi lenei mo outou e “tutulai ai ma susulu atu” o e ua umia Lana perisitua paia. A o outou faalauteleina lenei perisitua ma faataunuu lou tiute i le Atua, o le a avea lou malamalama “ma tagavai mo atunuu.” ■



IA SUSULU ATU

O loo i ai se malamalama i totonu o i tatou uma taitoatasi. la faasoa atu.

(Tagai i le MF&F 115.5.)



Mataupu Faavae ma Feagaiga 115:5

Ua poloaiina i tatou e le Alii ia tutulai ma susulu atu.

Ou te Fai Atu ia te Outou Uma

I le faaaliga lenei mai le 1838, na tuuina mai ai e le Alii ia faatonuga e uiga i le fausiaina o se malumalu i Sisifo Mamao, Misuri, faapea ai foi ma isi vaega o le faatuina o Siona. Sa Ia tuuina mai foi le igoa o Lana Ekalesia i aso e gata ai: O Le Ekalesia a Iesu Keriso o le Au Paia o Aso e Gata Ai. E ui o lenei faaaliga sa fofogaina atu i taitai o le Ekalesia i na vaitaimi, ae o le poloaiga ia “tutulai ia ma susulu atu” ua faatatau foi ia i tatou uma i aso nei.

- Ia agalelei, lotofoai, ma lotomaulalo.
- Tu atu mo, ma ola i tulaga faatonuina o le Ekalesia.
- Ataata ma faaali atu le olioli o le ola ai i le talalelei.
- Faasoa atu le talalelei i au uo.
- Tuu atu lau molimau e uiga i le upu moni.

Tagavai

Tagavai—o se mea faitino, e masani lava o se fu’a, e tuu i le tumutumu o se pou ma faaogaina o se vaega e faapotopoto ai po o se faailoga. Tagai i le Mataupu Faavae ma Feagaiga 45:9.

“O e tauaveina tagavai e savavali i le pito i luma o se faamoemoega taua. E fai i latou ma sui o mea e lelei ma amiotonu. E masani ona latou tauaveina fu’a po o isi faailoga e faailoa



ai le faasinomaga, faamoemoega, ma le lotogatasi. . . .

“I le avea ai ma tagata e tauaveina Lana tagavai, e tatau ona tatou fesoasoani


i e loto faamaoni ia maua Iesu. Tatou te le faalealeaina ni fu’a. . . . Peitai, i le avea ai ma tagata e tauaveina tagavai mo Iesu le Keriso, tatou te tauaveina ma le lotomalie ma le agaga faafetai Lona suafa paia i o tatou luga. Tatou te auai i Lana galuega e ala i feagaiga.”

Elder Russell M. Nelson o le Korama a Aposetolo e Toasefululua, “Standards of the Lord’s Standard Bearers,” *Ensign*, Aok. 1991, 7.

O le faamatalaga a le faatonu: O lenei itulau e le o se faamalalamamaga atoa o mau na filifilia, ae ua na o se amataga mo au lava suesuega.

Tutulai ia ma Susulu Atu

“O loo i ai se galuega maoae a le Alii



mo outou taitoatasi e fai. ‘Tutulai ia ma susulu atu, ina ia avea lo outou malamalama ma tagavai mo atunuu’ (MF&F

115:5). Na te faatuatuaina outou, ma Na te valaauina ma faalagolago ia te outou e tutulai maualuga a’e ma susulu malamalama ae i nei aso luitauina ae matagofie.”

Peresitene Dieter F. Uchtdorf, Fesoasoani Lua i le Au Peresitene Sili, “Your Right to Choose the Right,” *New Era*, Aok. 2005, 8.

Lou Malamalama

E faapefea ona faasusulu atu lou malamalama? Mafaufau i manatu nei ma tusi i lalo nisi o ou lava manatu i lau api o talaaga.

5. E moni ou te afi atu iā te outou uma: Inā tūtūla’i ia ma susula atu, ina ia faia lo outou malamalama ma ‘tagāvai mo atunuu’;

6. Ina ia faia fo’i ma “olo, ma sulufa’iga mai le afā, ma le ita pe a ‘liligi’ e lē fa’afefiloiā i le lalolagi ‘ata, le fa’apotopotoina fa’atasi i ‘lau’ele’ele o Siona, ma

Atunuu

“Ma o aso nei ua faapotopoto ai le nuu o le Alii ‘mai atunuu’ a o latou faapotopoto i aulotu ma siteki O Le Ekalesia a Iesu Keriso o le Au Paia o Aso e Gata Ai o loo taape i atunuu uma. . . . Ua fetalai mai le Alii ia



fai i tatou ma faailoga o le amiotonu e taitaia ai i latou o loo sailia le saogalemumu ma faamanuiga o Siona.”

Elder D. Todd Christofferson o le Korama a Aposetolo e Toasefululua, “O Mai i Siona,” *Liahona*, Nov. 2008, 37.

NA TALI LE ATUA I TATALO UMA E LUA


Saunia e Carlos Iván Garmendía Pacheco

Ao ou auauna atu o se faifeautalai i Durango, Mekisiko, na luiina le matou misiona e le matou peresitene misiona e faataitai se “vaiaso o le ositaulaga.” Sa ia talosagaina i matou e tuuina atu se taumafaiga faaopoopo nai lo le mea na masani ai e ala i le galulue malosi ma le setiina o sini patino i le aluga o le vaiaso. Sa ma faatuatua ma la’u soa afai ma te ositaulaga i lenei faiga, o le a faamanuia i maua e le Alii, ma o le a ma maua ni tagata se toatele e aoao.

Peitai, i le aluga o le vaiaso o le ositaulaga, sa le’i tele se tulaga manuia. Ma te le’i maua ni aiga e aoao, ma sa ma le fiafia.

I se tasi taeao na sosoo ai mai i lenei vaiaso, sa ma tilotilo ai ma la’u soa i le faafanua o le ma eria. Sa tele tele le ma eria, ae sa ma lagonaina na tatau ona ma o atu i le vaega na aupito mamao ese.

Ina ua ma taunuu atu iina, sa ma tatalo ma ole atu i le Tama Faalelagi po o le fea auala ae o le fea le fale ma te o i ai. Ina ua uma le ma tatalo, sa ma liliu loa e autilo atu i auala uma. Sa ma vaaia se pa e le’i mamao atu ma tuufalo atu ai i luga. Sa ma vaaia ai se tamaitai o saofai ma moeiini ona



mata, ma se salu na uu i ona lima.

Sa fai atu la’u soa, “Talofa!” ma ina ua faalogo mai le tamaitai ia i maua, sa tu ae i luga ma faaaauu lana saluga otaota e pei lava na leai se mea na tupu. Ona ma fai atu lea o i maua o faifeautalai mai le Ekalesia a Iesu Keriso o le Au Paia o Aso e Gata Ai, ma sa ia i maua se savali mo ia. Sa ia faatagaina i maua i totonu o lona fale, ma sa matou faia ai se lesona na sili ona faaleagaga. Sa ma ta’u atu ia te ia e uiga ia Iosefa Samita ma le ala na ia alu atu ai i le togavao e tatalo e saili ai le mea moni, ma o le tali i lana tatalo, na faaali mai ai le Atua le Tama ma Iesu Keriso ia te ia.

Sa faasalavei mai o ia ma fai mai, “E sa’o le mea lenei. Ou te iloa e tali

mai le Atua i a tatou tatalo. A o oulua talanoa mai ia te a’u, sa ou tatalo ma ole atu i le Alii e auina mai se tagata e mafai ona taitaia au i Lona ala, ma sa vave ona oulua oo mai.”

Sa ma lagonaina le Agaga, ma sa ma molimau atu na auina atu e le Alii i maua ia te ia, ma sa ma’ua tatalo foi i le taimi lenei ia iloa po o le fea o ana fanau na manaomia le ma fesosoani. E le’i leva ae papatisoina loa Tuafafine Rufina. I vaiaso na mulimuli ane ai, na papatisoina ai lana fanau, fanau a lana fanau, faapea foi ma nisi o ona tuaoi—o se aofaiga atoa e 20 o tagata liliu mai i lenei vaega o le ma eria. Sa taitaiina atu i maua e le Alii ia Tuafafine Rufina, ma sa avea o ia ma faitotoa i le faasoaina atu o le talalelei i lona aiga ma tuaoi.

Ou te iloa e faamanuiaina i tatou e le Tama Faalelagi pe a tatou ole atu ia te Ia, ae le seiloga e uma ona Ia tofotofoina o tatou faatuatua. Ou te faafetai ona sa mafai ona avea i ma’ua ma la’u soa o ni meafaigaluega i aao o le Alii ma maua mai ai tagata o e na saunia e faalogo i le savali o le talalelei. Ou te iloa e alofa le Atua ia i tatou ma o le a taialaina i tatou pe afai tatou te ole atu. ■

IA FAAMAONI

Saunia e Elder Gérald Caussé

O Le Fitugafulu



ATA NA SAUNIA E DAVID STOKER

I le vaitaimi o le 20 ma ona tupu o o'u tausaga, sa tatau ai ona ou sueina se suega na sili ona faigata ina ia ou sao ai i totonu o se aoga iloga faapisinisi i Farani. Sa ou suesue mo ni itula se tele i aso uma lava mo le lua tausaga. Ae sa ou alu foi i taimi uma lava i le lotu ma le inisituti ma fai ou tiute o le Ekalesia.

O le vaega aupito taua o le suega o le faatalanoaga. Sa fai sa'u faatalanoaga ma se tasi o aoga, ma ina ua latou iloa o a'u o se tagata o le Ekalesia, sa le'i tulaga lelei.

Ona ou sueina lea o le suega i le aoga sa sili ona ou fia alu i ai. Ina ua mavae sina taimi i le faatalanoaga, sa amata ona fesili mai le au faifaatalanoaga e uiga i mea ou te faia i tua mai o itula ou te suesue ai. Sa ou iloaina o se fesili lea ou te sao ai/pe ou te le sao ai foi. Ae sa ou filifili i se taimi vave o le a ou faamaoni i o'u talitonuga.

Sa ou faapea atu, "O a'u o se tagata O Le Ekalesia a Iesu Keriso o le Au Paia o Aso e Gata Ai," ona ou faaaluina lea o le 15 minute e faamatala atu ai a'u mea na fai i le Ekalesia.

Sa faapea mai le faatonu o le aoga, "E te iloa, ua ou fialia ua e tauina mai lenei mea. A o avea au ma se tagata aoga, sa ou aoga i le Iunaite Setete, ma o se tasi o a'u uo lelei lava o se Mamona. O ia o se tamalii maoae, o se tagata sili ona agalelei. Ou te manatu o tagata Mamona o ni tagata lelei tele."

Oka se faamama avega! O a'u o se tasi o tagata muamua i lena tausaga na taliaina i lenei aoga.

E lua ni lesona mai lenei tala. Muamua, e le tatau ona tatou manatu faatauva'a i le aafiaga tatou te faia i isi. Lona lua, e tatau ona tatou faamaoni i taimi uma i o tatou talitonuga. Taumafai e fai le mea sili e te mafaia, ma o le a fesoa-soani ia te oe le Alii e faataunuu mea o totoe. ■

Maa, Aū, ma

“Sa faatasi le Agaga o le Alii ma ia, sa oo ina le mafai ona lavea o ia” (Helamana 16:2).

Saunia e David L. Frischknecht

Matagaluega o Mataupu Aoaoina

E faavae i se tala moni

Ole savali atu i le fale mai le aoga e masani lava ona le manaia tele. O nisi taimi ou te mafaufau ai i la’u meaaoga o le numera o loo ave e fai i le fale, o nisi taimi ou te mafaufau ai i mea sa matou faia i le vasega faamalositino, ae o nisi taimi ou te savali ai e aunoa ma se mea tele ou te mafaufau i ai.

Peitai na ese le aso lenei. Sa le malolo lo’u mafaufau. Sa ou vaaia i luma atu o au ni aualii e toalua o nisi o tamaiti sa matou taaalo faatasi i nisi o taimi, o—Iose ma Makesi—o faia ni polokiona ma faaolioli mai ia te a’u.

“Ei, Tavita, sau ii!” o le ee mai lea a Iose, ma ata. “E i ai se mea ma te fia faaali atu ia te oe.”

Sa ata foi Makesi.

O Iose ma Makesi e tasi le tau-saga e matutua uma ai laua ia te au, ma e malolosi tele a laua toggi. Sa ou iloaina e le o toe umi ae amata ona la tauaia mai ni polokiona agai ia te au. E ui ina e masani lava ona la faia lelei a’u, ae sa ou mafaufau atonu ua la tuuina ni aisa i totonu o polokiona.

Sa amata ona ou mafaufau i ni auala e mafai ona ou taofia ai a laua osofaiga.

Tamoe i le isi ituala e aloese ai ma i laua? Leai, o le a la ula mai ai ma faifai pona mai ia te a’u.

Tamoe saosasaoa ia tea ese ai ma

i laua? Leai, e sili atu lo la saosasaoa nai lo a’u ma o le a vave ona la mauaina au.

Ia faaputu foi sa’u polokiona e osofai atu ai? E le o se manatu lelei lea, pe a mafaufau atu e toalua i laua ae na o a’u. Na lelei foi lo laua tulaga i le tumutumu o le matie, ma sa leai se mea ou te lafi ai i le pito i lalo.

Sa tonu loa ia te au e fai le mea na talafeagai—savali filemu ia tea ese ma i laua ma faatali mo le felele mai o polokiona.

A o ou latalata atu i le matie, na oo mai se manatu i lo’u mafaufau. Sa ou manatuaina Samuelu le Sa Lamana, o le na talaiina atu le tala-lelei a o tu i luga o le pa. Ina ua le fiafia tagata i mea na ia fai atu ai,

Polokiona

sa latou tauai atu maa ma tafana atu aū ia te ia.

Na ou iloaina sa puipuia e le Alii ia Samuelu mai maa ma aū. Atonu e mafai foi ona Ia faia ia le tau ni polokiona ia te a'u.

Sa fai sa'u tatalo i lo'u mafaufau, ma ole atu i le Tama Faalelagi ina ia le tau ni polokiona ia te a'u. Sa ou iloaina sa manaomia ia ou toa ma aua le masalosalo—e pei lava o Samuelu. A o ou taunuu atu i le matie, sa ou lagonaina se lagona mautinoa o le a ou le afaina.

E pei lava ona ou faamoemoeina, na amata ona felelei mai polokiona. Sa latalata

le alamū o nisi o polokiona i lo'u ulu, lea na ou lagonaina lava le savili a o alamu ane. O nisi polokiona na misi i o'u lima, ae o nisi na pauu tonu lava i lalo o o'u vae, ae na leai ma se mea na ou lavea ai. Leai ma se polokiona se tasi!

Sa faaauu lava ona tauai mai e le aualii seia oo ina ou tea ese, ae na ou iloaina sa ou saogalemu. O le taimi na totoe o la'u savaliga i le fale, sa le malie tele—ma sa leai ma se isi mea sa sili ona ou fiafia i ai. Sa puipuia a'u e pei o Samuelu le Sa Lamana. Sa ou iloaina o le tatalo ma le faaalua o le faatuatua i le Alii na faamanuaina ai a'u. ■



“Ou te molimau atu e matua aoga lava le tatalo, pe a tatou ole atu ma le faatuatua ma faatino.”

Elder David A. Bednar o le Korama a Aposetolo e Toasefululua, “Ole Atu ma le Faatuatua,” *Liahona*, Me 2008, 96.

TAUMAFATAGA

o le Tusi a Mamona

Etoatele tamaiti i taimi o le Tusi a Mamona na vaai ia Iesu Keriso ma faalogo i Ana upu. O le faitau mai le Tusi a Mamona i vaiaso taitasi o le tausaga lenei, e mafai ai foi ona outou fiafia e “taumamafa fiafia i le afioga a Keriso” (2 Nifae 31:20).

Fai i se tagata matua e fesoasoani atu e talai pine ae aveese le itulau valivali lenei. O vaiaso taitasi pe a uma ona e faitau, vali uma avanoa i le numera o lena vaiaso. Mo fautuaga e uiga i mea e faitau i vaiaso taitasi, vaai i le itulau e 62. E mafai ona e faitau na o oe pe faitau faatasi ma lou aiga.



ATA NA TUSIA E SCOTT GREER





**Fautuaga mo le Faitauga Faalevaiaso mo le “Taumafataga o le Tusi a Mamona”
(tagai i itulau 60–61)**

VAIASO	FAITAUGA	VAIASO	FAITAUGA
1	Faatomuaga i le Tusi a Mamona.	29	Alema 20:1–28
2	1 Nifae 1:1–3, 18–20; 2:2–4; 3:2–7; 4:1–18	30	Alema 23:6–7, 16–18; 24:1–7, 16–27; 27:2–5, 14, 27–29
3	1 Nifae 8: 2, 5–33	31	Alema 30:6–9, 12–14, 31–32, 35–39, 43–45, 49–50, 55–59
4	1 Nifae 16:9–10, 16–19, 23, 26, 28–32; Alema 37:38–46	32	Alema 31:1, 5–7, 12–21, 37–38; 32:1, 5–6
5	1 Nifae 17:8–11, 16–19, 4 9–55; 18:1–4	33	Alema 32:26–43
6	2 Nifae 2:11–13, 22–27; 4:15–16; 31:5–8, 17–21	34	Alema 37:3, 6, 8–11, 14–15; 43:1–9, 16–17, 43–47; 44:16–20
7	2 Nifae 32:3–9; Iakopo 7:1–20	35	Alema 46:1–5, 11–16, 19–20; 48:7–13, 22–23; 49:25–26, 28
8	Enosa 1:1–13	36	Alema 50:25–36; 51:5–6, 11, 13–16, 20–22
9	Mosaea 1:9–10, 18; 2:1–2, 5–8, 16–19; 3:17, 19; 4:9–10; 5:15	37	Alema 53:10–21; 56:2–11, 43–48, 55–56
10	Mosaea 11:1–2, 20, 27–29; 12:1, 9, 14, 17–19, 35–36; 13:15–24	38	Helamana 2:2–11; 5:4–13
11	Mosaea 17:1–12, 20	39	Helamana 5:20–50
12	Mosaea 18:1–17	40	Helamana 6:18–23; 7:6–13, 26–29; 8:1, 4, 10, 25–28
13	Mosaea 21:1–15, 23–24	41	Helamana 9:1–24
14	Mosaea 21:29–35; 22	42	Helamana 9:25–39; 10:1–6
15	Mosaea 23:1–7, 19–26, 36–39	43	Helamana 13:1–7; 14:2–8; 16:1–3; 3 Nifae 1:4–9
16	Mosaea 24:8–25; 25:1, 14–19	44	3 Nifae 1:10–15, 21–23; 2:1–2; 8:2–7, 23; 9:1–2, 18–22
17	Mosaea 27:6–24; Alema 36:11–12, 16–24	45	3 Nifae 11:1–17, 23–26
18	Mosaea 27:32–37; 28:1–9	46	3 Nifae 17:1–24
19	Alema 1:2–15; 2:1–9	47	3 Nifae 18:1–9, 19–21, 24, 35–39
20	Alema 2:10–18, 29–31; 5:1, 19, 26–27, 33	48	3 Nifae 19:11–26; 20:1; 27:1–8
21	Alema 6:7–8; 7:9–12; 8:1–22	49	3 Nifae 28:1–9; 4 Nifae 1:1, 15, 23–26; Mamona 1:1, 11–17
22	Alema 8:23–32; 9:1–8, 14–15	50	Mamona 2:1–2, 9, 23–24, 26–27; 3:2–3, 16–22
23	Alema 10:27–32; 11:21–46	51	Eteru 1:1, 33; 2:5, 16–25; 3:1, 4–14
24	Alema 12:1–7; 14:1–17	52	Moronae 10:3–23
25	Alema 14:18–29; 15:1–13		
26	Alema 17:1–3, 12–13, 17–39		
27	Alema 18:1–4, 8–35		
28	Alema 18:40–43; 19:1–2, 8–15, 18–19, 22–33		





Ua faasoa mai e Elder M. Russell Ballard o le Korama a Aposetolo e Toasefululua nisi o manatu e uiga i lenei mataupu.

E FAAPEFEA ONA OU AUSIA A'U SINI?

E tatau lava ona i ai lo tatou faatuatua. E tatau lava ona i ai lo tatou faatuatua i le Atua. E tatau lava ona i ai lo tatou faatuatua i le Alii o Iesu Keriso. Oi ma le isi, e matuai manaomia lava le tatau ona i ai o lo tatou faatuatua ia i tatou lava.

A e faatuina se sini ma tautino atu oe lava i le loto pulea e manaomia e ausia ai lena sini, o le a e lafoaia le tele o faafitauli i lou olaga. I faaoga lou malosi e fai ai mea o le a faia ai se eseesega.

Afai e amiotonu au sini, ona fai lea.

E ao ona e atiina ae se manao e faalatele le tomai o le faatutuina o sini taua ma aoga.

E mafai ona e faaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

O LE FAITALIA

O se Meaalofa e Filifili ai mo i Tatou Lava

“**M**anuia lou aso fanau, Iuliana!” na fai atu ai Tama. Sa ia tuuina atu ia Iuliana se atigipusa na afifi i se pepa feilafi ma sa nonoaina i se lipine.

Sa ataata Iuliana. Sa fialia o ia i le mauaina o se meaalofa mai lona tama ma sa le mafai ona tatali lona fia tatalaina o le atigipusa.

E te fialia e pei o Iuliana pe a e maua se meaalofa? Ua tuuina mai e le Tama Faalelagi ia i tatou taitoatasi se meaalofa taua. Ua ta’ua

o le faitalia. O le faitalia o le mafai lea ona tatou faia o a tatou lava filifiliga.

Ae tatou te lei o mai i le lalolagi, sa le’i manao Satani ia i ai se filifiliga a soo se tasi e faia. Sa manao o ia e faamalosi i tatou ia o mai i le lalolagi ma fai le mea e manao o ia tatou te faia. Ae sa silafia e le Tama Faalelagi e taua mo i tatou lo tatou faia o a tatou lava filifiliga. O filifiliga sa’o taitasi tatou te faia, tatou te ola latalata atili atu ai i le Tama Faalelagi ma Iesu Keriso. E finagalo i Laua ia tatou faia filifiliga lelei ina ia mafai ai ona tatou toe foi atu e nonofo faatasi ma i Laua.

O le tausaga lenei i le Peraimeri, o loo tatou aoao ai e uiga i auala e mafai ona faaoga ai o tatou faitalia e FMT—filifili le mea tonu! ■




Pese ma Mau

- “Se Fanau a le Atua,” 2012 *Otootoga mo le Taimi o Fetufaaiga*, 28
- 2 Nifae 2:27



Na o Oe

I se afaifi se tasi, mafaufau e uiga i filifiliga na e faia i le aso. Tusi se ata, tusi se solo, pe fatu se pese e uiga i se filifiliga lelei se tasi sa e faia.



Taaloga FMT

E mafai ona outou taaalo ma le tou aiga i le taaloga lenei e aoao atili ai e uiga i le faitalia. 'Oti ese le fomu taisi, ma faakelu i se pepa malo. Gagau le taisi e pei ona faaalua i luga, faakelu faalelei ia lave, ona faamago lea o lau taisi.

Nonofo faataaliolio ma lou aiga. Tuu atu i se tagata se toatasi e faataavale le taisi ma faitau le itu o loo faasaga i luga. Talanoa e uiga i filifiliga eseese e mafai ona faia i lea tulaga. O le a se mea e tupu i filifiliga taitasi? Pasi le taisi i le isi tagata e sosoo ai e faataavale.

Ua nofo se tamaitiiti fou i ou talaane i totonu o le vasega.

.....
O le a le mea e te faia?

E manao lou uso laitiiti tou te taaalo faatasi ma au uo.

.....
O le a le mea e te faia?

Sa fai atu leromi pe mafai ona kopi i lau meaaoga.

.....
O le a le mea e te faia?

Ua valaaulia oe e Matini i se tifaga i le Aso Sa.
.....
O le a le mea e te faia?

Ua faamata'uina Lea i le aoga.
.....
O le a le mea e te faia?

E le agalelei lou tuagane ia te oe.
.....
O le a le mea e te faia?

O Loo Aoao Mai le Tusi a Mamona e uiga ia Iesu Keriso

Saunia e Diane L. Mangum

O le Feagaiga Tuai o loo ta'u mai ai ia i tatou e uiga ia Iesu Keriso a o le'i afio mai o Ia e nofo i le lalolagi. Sa ta'ua o Ia o Ieova. O loo ta'u mai i le Feagaiga Tuai e uiga i ni tagata na mulimuli ia Ieova.

O le Feagaiga Fou o se tusi o mau o loo ta'u mai ai ia i tatou e uiga i le soifuaga o Iesu i le lalolagi. Sa tusitusi Ona soo e uiga i Lona soifuaga ma Ana aoaoga.

Na oo mai le siufofoga o le Alii i le mafaufau o Enosa ina o tatalo o ia.



O le Tusi a Mamona o loo aoao mai foi e uiga ia Iesu Keriso ma tagata na mulimuli ia te Ia.

O le Tusi a Mamona o loo amata i Ierusalem a i le taimi o le Feagaiga Tuai, pe a ma le 600 tausaga a o le'i fanau mai Iesu. O loo faamatala mai ai le tuua e le perofeta o Liae ma lona aiga ia Ierusalem a ma sa taitaiina atu i latou i se nuu o le folafolaga, e mamao na sopoia ai le vasa i se Lalolagi Fou.

Na aoao mai perofeta o le Tusi a Mamona o le a afio mai Iesu i

Na vaai le uso o lareto ia Iesu Keriso.




le lalolagi. Sa latou aoao mai foi o le salamo ma le mulimuli ia Iesu Keriso o le a aumai ai le fiafia.

Ina ua mavae le faasatauroga ma le toetu o Iesu i Ierusalem, sa asiati atu o Ia i le Lalolagi Fou e aoao atu i tagata. Sa ia aoao atu e uiga i le papatisoga, le faamana-tuga, ma le ala e alolofa atu ai i isi. Sa ia faatulagaina se ekalesia ma ni Aposetolo e toasefululua. Sa ia



Sa vaai Liae ia Iesu Keriso i se miti po o se faaaliga.

Sa aoao atu le Tupu o Peniamina i tagata e uiga i le Togiola a Iesu.



faapotopotoina tamaiti ma faama-nuia i latou, e pei lava ona sa Ia faia i le Feagaiga Fou.

E pei foi o perofeta i le Tusi Paia, na faasoa atu e perofeta o le Tusi a Mamona a latou molimau e uiga ia Iesu Keriso.

O le perofeta mulimuli lava o le Tusi a Mamona o Moronae, o le sa ola pe tusa ma le 400 tausaga talu ona mavae le asiasiga a Iesu i le

Lalolagi Fou. A o le'i maliu o ia, sa tusia e Moronae, o tagata uma lava e faitau i le Tusi a Mamona e mafai ona latou iloa e moni pe afai e tatalo o ia ma le faatuatua. Sa valaulia e Moronae tagata uma e “o mai ia Keriso” (Moronae 10:32).

E mafai foi e tamaiti i aso nei ona tatalo ia maua se molimau e moni le Tusi a Mamona, ma o Iesu Keriso o lo latou Faaola. ■

FAIGĀ UO ILE PASEFIKA

Saunia e Jane Hansen Lassetter

Ina ua o mai nisi o tamaiti aoga faatausima'i mai le Iunivesite o Polika Iaga e o i Toga, sa latou manatu o le a avea ma se mea malie le faauo o tamaiti mai Iuta ma tamaiti Toga.

O lea na talosagaina ai e tamaiti aoga ia tamaiti Peraimeri o le Uarota Iva a Oak Hills i Provo, Iuta e tusi ni ata mo tamaiti i Toga. Sa latou pueina foi ni ata o tamaiti.

Ina ua latou taunuu atu i Toga, sa fesoasoani tamaiti aoga faatausima'i i le taimi o le fetufaaiga i le Uarota a Neiafu Tolu. Sa latou tuuina atu i tamaiti taitasi se ata tusi ma se ata na pue o se tamaiti mai Iuta. Sa fiafia tamaiti e aoao e uiga i a latou uo fou i Iuta.

Sa tusia foi e tamaiti ni ata mo tamaiti i Iuta. O nisi sa tusia ni savali e uiga ia i latou lava ma e uiga i le olaga i Toga. O nisi savali sa tusia i le gagana Peretania, ae o isi i le gagana Toga. Sa tusia e le peresitene o le latou Peraimeri se

faaliliuga faa-Peretania o savali faa-Toga. Sa pueina foi e tamaiti aoga faatausima'i ia ata o tamaiti.

Sa tusia e se tasi o tamaitiiti, "Ou te taalo lakapi, ma e ese le vevela o Toga." Sa tusia e se teineitiiti, "E ese lo'u fiafia i lou ata. E ese lou aulelei. Ou te fiafia e pese, e pei foi o oe." Sa tusi se isi tamaitiiti e uiga i le Peraimeri ma ta'u atu ona alofaaga: "O la'u lesona ananei e faataatau i perofeta. Ou te alofa tele ia te oe!" ■





O Loo I Ai o Ia **Iina**

Saunia e Rosemary M. Wixom

Peresitene Aoao o le Peraimeri

“O lea na sasaa atu ai o matou agaga i le Atua i le tatalo, ina ia faamalosi a ia i matou” (Alema 58:10).

Ao 11 tausaga o se tasi o o ma atalii, sa ala ae ai o ia ma se ulu sa matuai tiga lava. O le taimi muamua sa ou faapea, o loo faifaiaga e alu i le aoga, ae na vave ona ou iloaina sa maualuga lona fiva. Sa ou aveina o ia i le fomai, ma sa lei umi ae matou nanati atu i le falemai. O iina sa iloa ai na maua o ia i le ma'i o le fiva faiai o le maeaalio, ose ma'i matautia.

A o faasolo ina tigaina tele o ia, sa amata ona oso faamai lili. Na fai mai le fomai ou te alu i fafo o le potu. A o ou savali atu i le auala savali, sa ou fefe ma amata ai ona ou tagi. Sa faauouo a'u e

se tamaitai ou te le masani ai. Sa ou tatalo leotele ina ia fesoasoani mai le Tama Faalelagi i lo'u atalii ma ia lelei mea uma. Ou te manatua lo'u lagonaina o se filemu maoae.

Sa faia se taotoga o lo'u atalii ma ni vaiaso se tele na taumafai ai ia malosi lelei. O le taimi nei o loo maloloina o ia, ua faaipoipo, ma o se tamā o se fanau teine aulelei e toalua. O lenei aafiaga o se faataitaiga lea ia te au o le mana o le tatalo.

E i ai se pese a le Peraimeri e ta'ua “O Le Tatalo A Le Tamaitiiti.” O loo i ai se fesili, “Le Tama e, o e i ai iina? Pe o lagona mai tatalo uma?” (*Tusipese a Tamaiti 6-7*).

Ma o le tali moni lava o le: ioe, Na te lagonaina.

Afai e i ai se taimi e te tomanatu ai pe o soifua le Tama Faalelagi, ia ua oo i le taimi e te tootuli ai ma fesili atu, “Le Tama Faalelagi e, pe o E i ai moni iina? Pe na ou i ai ma Lau Afio ae ou te le'i sau i le lalolagi? Pe mafai ona ou toe foi atu e nofo faatasi ma Lau Afio?”

O le a Ia tali mai i au tatalo. O le a Ia faailoa atu ia te oe o loo i ai o Ia iina. E le o tuua na o oe. Tatou te manaomia o ia i itula uma, ma o loo i ai o Ia iina mo i tatou. ■

O Le Ofu Sa'o

Saunia e Sarah Chow

E faavae i se tala moni

"Ia fai oe ma faaaoao i e ua faatuatua" (1 Timoteo 4:12).



4. E ese le fiafia o Ana i teine faifeautalai e toa-lua o loo i lana uarota. Latou te faatalofa i le lotu, e ataata atu i laua pe a ia talotalo atu i ai i le auala, ma latou te tatalo faatasi ma lona aiga pe a la o atu i fafaga.



5. Ina ua oo i le Aso Sa, sa tau le mafai ona faatali Ana e faaali atu i faifeautalai lona ofu fou. Ina ua ia vaai ia i laua i le lotu, sa feliuai faataamilomilo o ia mo i laua.



Ua ou foliga nei faapei o oulua!

6. Ua e foliga uma lava pei o i maua.



Ma e le gata ina e foliga faapei o se faifeautalai; o oe o se faifeautalai!

7. Fai mai lou tina sa e tatalo mo i maua i le vaiaso atoa e pei ona sa ma talosagaina ai oe. Ma vaai foi! Ua ma aumaia i le aso se tasi i le lotu. Sa fesoasoani au tatalo ia i maua.



Faafetai lava, faifeautalai Ana.

E Mafai Ona Avea Au ma Faifeautalai i le Taimi Nei!

Saunia e Hikari Loftus ma Hilary Watkins Lemon


Oloo taumafai Ana e mulimuli i faataitaiga a faifeautalai. Mulimuli i faatonuga o loo i lalo ina ia mafai ona ia faia filifiliga o le a fesoasoani ia te ia e avea ma se faifeautalai i le taimi nei.

O Le A e Manaomia: se maataisi

po o ni fasipepa se ono ua faanumeraina i le 1 e oo i le 6 e tuu i se taga pepa laitiiti; se sene se tasi, pi mago, po o nisi mea faitino laiti mo tagata taitoatasi.

Faiga o le Taaloga: E ilo e tagata taaalo taitasi se mea faitino laitiiti e faaaoaga o se maa o le taaloga. Ia auauai, e togī le maataisi pe se'i

mai se numera mai le taga, ma faame'i lau maa i le aofai o avanoa na e togia pe seiina. Afai e te tu i se avanoa e ta'u mai ai se mea e fai e faifeautalai, ia me'i i luma i se avanoa faaopoopo se tasi. Ia auauai seia taunuu tagata uma i le tini, i le mea o loo faatalitali mai ai faifeautalai!



ATA NA TUSIA E JAKE PARKER

FESOASOANI MO MATUA

Talanoa i a outou fanau e uiga i le faaalua o le faaaloalo mo le Tama Faalelagi ma i latou lava e ala i le faiga faalelei o o latou lavalava. Fesili ia i latou pe o le a so latou manatu, aisea e fai faalelei ai lavalava o faifeautalai.

Mafaufau e faasoa atu a outou moli-mai i a outou fanau e uiga i le galuega faafaifeautalai. E mafai ona outou faasoina atu le tala o lo outou liliu mai, faamatala atu se aafiaga na outou maua i le faiga o le galuega faifeautalai, pe talanoa e uiga i le mafuaaga e taua ai le galuega faafaifeautalai ia te outou.

Sa e faaaloalo i le taimi o le lotu.



Sa e fesoasoani i lou tina i le gaugauina o le tagamea.



Sa e manatua e tatalo mo faifeautalai.



Faafetai mo le avea o oe ma se faifeautalai lelei!



FAAIU

Sa e mafau-fau i le Faaola i le taimi o le faamanatuga.



Tala Fou o le Ekalesia

Mo nisi talafou ma mea e tutupu i le Ekalesia asi asi ane i le news.lds.org.

O Faleautu mo le Autalavou Matutua e Atinae ai le Tupulaga Faia'e

Saunia e Stephanie Jean Johnson

Mekasini a le Ekalesia

O faleautu o le Ekalesia mo le autalavou matutua e le na ona puipuia ai o le tupulaga faia'e mai faaosoosoga o le lalolagi—ae o loo latou saunia foi taitai o le Ekalesia i le taimi nei ma le lumanai e sui le lalolagi.

I le avea ai ma ni faaopoopoga o le polokalama o le inisitituti, o faleautu mo le autalavou matutua—lea o loo tele ina i ai i Europa—o loo ofoina atu ai vasega faalelotu ma faapea foi ona avea ma se nofoaga e mafai ona faatasitasi i ai le autalavou matutua mo gaoioiga eseese e pei o le kukaina o se meaai o le afiafi, faiga o meaaoga, taaalo Ping-Pong ma le faasoaina atu o le talalelei.

Atinaeina o le Ekalesia e ala i le Autalavou Matutua

I le taufaaiuga o le 2003, na amata ai fuafuaga taulamua mo faleautu mo le autalavou matutua i faleautu e fa na tatalaina i Copenhagen, Tenimaka; ma Berlin, Hamburg, ma Leipzig, Siamani. Sa atili uunaia e Elder L. Tom Perry o le Korama a Aposetolo e Toasefululua le faateleina o le taumafaiga taulamua ina ua valaauina e Peresitene Gordon B. Hinckley (1910–2008) o ia e pulefaamalumu i le Eria a Europa Tutotonu i le 2004.

Fai mai Erik Psota, o le faatonu lagolago o loo i ai nei a le eria mo seminare ma inisitituti i Europa, o le toatele o taitai perisitua i le taimi lenei i Europa sa i lalo ifo o le tai 30 tausaga o latou soifua i lona vaitaimi.

“O le musumusuga faaleagaga sa oo atu ia Elder Perry e faapea, o le tuputupu ae o le Ekalesia i Europa o le a auala mai i e e ta'i 18-i le-30 tausaga le matutua, na i ai se aafiaga loloto i le autalavou matutua ma taitai perisitua i tulaga uma i Europa,” o le saunoaga lea a Brother Psota. O loo talafeauga lava le uunaiga na oo ia Elder Perry i le autalavou matutua i aso nei, sa ia faaaau ai, “aua e fesoasoani ai ia latou malamalama i lo latou tiutetauave mo le tuputupu ae o le Ekalesia.”

O le aso, ua silia ma le 140 faleautu i Europa, ma se faaopoopoga e 30 o loo faagasolo. O nei faleautu

uma e saunia ai le tupulaga faia'e e faasalalau atu le talalelei i le lalolagi.

Atinaeina o le Malo ma Faauga i Nouei

O le faleautu o le autalavou matutua i Oslo, Nouei, ua na o le tasi lea o le tele o faleautu o loo aoao ai e le autalavou matutua auala e atinae ai le malo. Mo se faataitaiga o Mathilde Guillaumet, mai Farani. Sa amata ona aoaoina o ia e faifeautalai i le faleautu i Pale i le 2009 ina ua tuanai le valaauliaina o Sister Guillaumet e sana uo e aoao atili e uiga i le talalelei.

Sa papatisoina Sister Guillaumet i le 2010 ona siitia atu ai lea i Nouei mo se tausaga, lea sa faaaau ai pea ona saofaga ia faleautu i le lotoifale mo le autalavou matutua i le tuputupu ae o lana molimau.

“O le faleautu sa pei moni lava o se isi aiga. Sa mautinoa lava le mafanafana nai lo lo'u lava potu i le faleaoga,” o le tala lea a Sister Guillaumet. “Sa avea le ulugalii faamisiona i le faleautu o ni matua—o ni tagata lelei e o atu i ai mo faalaeiauga ma fautuaga. I Pale ma i Oslo, sa mafai ona ou alu atu i ulugalii faamisiona e talanoa i ai e uiga i le talalelei, lea e le mafai ona ou faia i le fale, pe a mafaufau atu e na o a'u le tagata o lo'u aiga e auai i le ekalesia.”

O Sam Basnet, sa papatisoina i le 2009, e na o ia foi le tagata o lona aiga e auai i le ekalesia. O le faia o le galuega faafaifeautalai i le faleautu i Oslo na fesoasoani ia te ia e faasoa atu ai le talalelei i tagata o lona aiga i taimi na toe foi atu ai e asi i latou i Nepal. Sa ia faamatala atu ia te i latou e uiga i le perisitua ma le Tusi a Mamona, ina ua uma ona ia fesoasoani i faifeautalai e aoao isi tagata i nei lava mataupu faavae i Oslo.

“Sa mananao lo'u aiga ia latou maua foi ia lagona sa ou lagonaina,” o le tala lea a Brother Basnet. “Sa latou vaaia le eseese i le va o le 'Sam-i aso la' ma le 'Sam-i aso nei.' O aso la, sa leai so'u faamoemoe. Sa leai se lagona mautinoa



O faleautu mo le autalavou matutua o se nofoaga e faa-tasitasi ai, lea e mafai ai e le tupulaga faia'e ona saunia e uunaia le lalolagi i le savali o le talalelei.

sa ou mauaina. Ina ua uma ona ou papatiso, sa masani ona ou sau i le faleautu ma o mea uma sa maualuluga atu nai lo le taimi muamua.”

E le na o Brother Basnet le tagata na lagonaina le siitia ma le faagaetia e le Agaga i le faleautu. O Benjamin Kerr o Sikotilani sa faaaluina ia taumafanafana e lua e faigaluega ai i Oslo ma na te ta'ua le faleautu o se nofoaga na te manatua ai mea e taua moni.

“O le faleautu o lo'u sulufaiga lea mai le lalolagi,” o le faamatalaga lea a Brother Kerr. “E mautinoa lava lo'u lagonaina ai o le toafilemu, le saogalemu, pe a ou i ai iina. Ou te manatu o nisi o o'u aafiaga e sili ona faamalosiaina na oo mai i le mafai ona ou saofai ai i totonu o le faleautu, ae maise lava i afaifi faaleaiga, ma talanoa e uiga i mea e faatatau moni ia i matou, o mea sa faafaigata ia i matou. O nei aafiaga ua faamanatu mai ai ia te au le taua o mataupu faavae faigofie o le talalelei.”

Atinaeina o le Autalavou Matutua ma Taitai o le Lumanai

E tele atu mea o loo faia e faleautu mo le autalavou matutua nai lo na o le fesoasoani

i le autalavou e faamalolosia a latou uo ma aiga i le talalelei. O loo latou atinaeina ni taitai. E valaauiina ia talavou matutua nofofua e faasolosolo ona auauna atu i aufono faaleautaitai i faleautu ma fuafua ni gaoioiga ma ni vasega eseese.

O se aafiaga faapena na tuuina atu ai ia Barbara Matovu, mai Uganda ae ua avea nei ma se tagatanuu o Nouei, “le avanoa e iloa ai le alofa o le Atua mo Ana fanau uma,” o lana tala lea. “Ua faamalosiaina ai la'u molimau i le faatulagaga o le Ekalesia. Ua aoaoina ai foi au e faapea, o le malo o le Atua e le mafai ona fausia toatasi e se tagata, ae o ni tagata se toataele, i le lotogatasi.”

A o maua e le autalavou matutua ni aoaoga faamasani e mafai ai ona latou auauna atu i le lumanai i valaauga o le Ekalesia, ua latou mauaina foi ni aafiaga o le a fesoasoani ia i latou e avea ai ma ni taitoalua ma ni matua lelei. O le a latou saunia e sui le lalolagi e le gata i le siosiomaga faitele ae faapena foi i totonu o le aiga.

“O mataupu faavae faaleautaitai na aoaoina i se aufono a le autalavou matutua nofofua, o mataupu faavae lava foi ia o le a aoga i le autalavou matutua nofofua pe a avea ma ni matua—onosai, fesoootaiga, tuuina atu o le taitaiga ma le faatagaina o tagata e faaaoaga o latou faitalia e faataunuu ai se galuega, ma mulimuli i musumusuga a le Agaga,” o le saunoaga lea a Gerald Sorensen, o lē, faatasi ai ma lona faletua o Nancy, o loo galulue i le faleautu i Trondheim, Nouei.

O faleautu mo le autalavou matutua o le a faaauau pea ona faasagatau atu i le faateleina o le agasala i le lalolagi e ala i le galulue ia mautinoa e sili atu ona vave le tuputupu ae o taitai o le Ekalesia i le lumanai.

“E o mai le autalavou matutua i faleautu ina ia latou iloa le talalelei e le gata i se auala faale-atamai ae faapea foi i le faatatauina o mataupu faavae o le faasoaina atu o le talalelei ma le auauna atu i a latou uo e le auai i la tatou tapuaiga,” o le saunoaga lea a Brother Psota. “E fesoasoani faleautu i se tupulaga fou ma le saunia lelei e auauna atu i le Alii ma le naunautai ma se vaaiga e faavavau.” ■

Na Auai le Au Paia i Pasila, Malo Aafaatasi i Aso o Auaunaga

Talu lava ona valaaulia e le Au Peresitene Sili ia tagata uma o le Ekalesia ia Aperila na te'a nei, ia auai i se aso o auau-naga i le tausaga a sau, ua faapea ona tali atu i ai le Au Paia i le salafa o le lalolagi. I ni atunuu se lua, o iunite—o le Malo Aafaatasi ma Pasila—na auai i se tauma-faiga tuuafaatasi ma isi tagata o le ekalesia i totonu o o laua atunuu.

Malo Aafaatasi

I le Aso Gafua, 5 Setema, 2011, sa faatasitasi ai le au paia mai siteki e 11 o Egelani, faatasi ai ma le Peresitene o le Eria o Erich W. Kopischke o le Au Fitu-gafulu, mo se galuega faatino o Lima Fesoasoani i Tottenham Marshes.

O le fuafuaga sa faailogaina ai e le gata o le 75 tausaga o le polokalama uelefea a le Ekalesia ae faapea foi le toe faalauiloaina aloaia o le Faatosinaga i le 2011 a Lonetona mo le Faamamaina o le Laumua. E lima itula, na faatasi ai le au paia—ma le ofisa o le pulenuu—i le veleina, faiga o togalaau, tataina o fafie, faagata pupulaa uua ola tetele, ma taalao le ototoa mai le Paka o Lee Valley.

O le aso lava foi lena na auai ai tagata o le au paia i isi eria o Lonetona i galuega faatino o Lima Fesoasoani i Fale e Tausi ai Tamaiti i le Maota i Haven ma le Maota i Richard.

I le Maota i Richard, e toa 18 tagata o le au paia o le Uarota a Stratford sa valiina se avanoa mo

se ofisa, veleina, salaina o laau-iti, salu le malae, ma faaleleia ni meafaigaluega. O le taimi muamua lenei ua fesootai ai le maota e tausai ai tamaiti ma le Ekalesia, o le faamatalaga lea a Charlotte Illera, o le pule o galuega faatino mo le galuega faatino i le Maota i Richard.

“Sa faagaetia au i le ala na fai ai e volenitia la latou galuega ma le naunautai ma le fiafia,” o lana tala lea. “E oo lava i se galuega faigofie e pei o le saluina o se auala sa faia lava i le mea na gata ai le lelei.”

I le aluga o nai masina ua mavae atu, sa faatulagaina ai ma auai tagata o le Ekalesia i Peretania Tele ma Aialani i Matu i nisi o galuega fesoasoani i le atunuu atoa.

E silia ma le 11 siteki mai Egelani na auai faatasi i le aso 5 o Setema, 2011, e faatino ni galuega fesoasoani i ni eria eseese se tolu i totonu ma faataamilo i Lonetona.

ATA MAI FAALALOGA A LINDSEY PHILLIPS



Pasila

I le aso 30 o Iulai, 2011, sa avea taoofu sasama ma se vaaiga taatele i le faitau selau o galuega fesoasoani i Pasila e faamanatu ai le 12 tausaga o Mamona Lima Fesoasoani, o se polokalama a Le Ekalesia a Iesu Keriso o le Au Paia o Aso e Gata Ai, e saili e tuuina atu ni auu-naga i le lotoifale ma toomaga mo faalavelave faafuasei ia i latou e lima vaivai.

O Mamona Lima Fesoasoani (*Mãos que Ajudam*) na afua muamua mai i Pasila o se auala e faamasani ai uo ma tuaoi i taumafaiga o fesoasoani alofa a le Ekalesia. Ua faapea ona avea nei ma se fuafuaga taua faaletausaga.

O le aso o auu-naga i le tausaga lenei sa faatumulia i pesega, taliega, ma le patipati faamālō a o galulue le 120,000 o alii, tamaitai, ma tamaiti i le saluina o auala, faamamaina o aoga, toe fauina o fale, faamata-gofieina o paka, ma le auai i isi galuega fesoasoani i le atunuu aupito tele ma sili ona toatele ona tagata i Amerika Latina. Sa auai faatasi tagata o le Ekalesia ma tagata i le lotoifale e tuuina atu le auu-naga o le a faamanu-iaina ai tagata uma.

I Belo Horizonte, Recife, ma Bahia, e sili atu ma le 6,000 volenitia na faatasitasi e tetele atu i le fiva po o le faama'i e feaveai e namu [dengue fever]. I Rio de Janeiro, sa faamamaina ai e volenitia ia faleaoga a le malo ma fale e vaai ai tamaiti laiti. I Porto Alegre, e 1,500 volenitia,

na faamamaina faleaoga, ae auai isi i aoaoga e faatatau i le puipu-iga mai le faaaogaina o fualaau faasaina.

I le lua masina a o lei oo i le aso o le galuega fesoasoani, e sili ma le 50 volenitia na galulue e ao mai taumafa sa foai mai, lea na tuuina atu i aiga lima vaivai e 175 i São Jose i le aso 30 o Iulai.

Sa foai atu e tagata o le Ekalesia i Blumenau le tusa ma le 300 pauna (136 kg) o taumafa i le *Casa de Apoio às Crianças Portadoras de Mielomeningocele e Neoplasia* (Maota e Fesoasoani i Tamaiti e Afaina Maeaalio ma Gasegase o le Tuma). Na aoao atu foi e volenitia i le faalapopotoga ia mataupu faavae atu mo le teuina o meaai.

“O auala ua matou aoaoina o le a fesoasoani ia i matou e teuina ai meaai i le potu e teu ai a matou meaai, ona o le tele o a matou meaai e faalegaina ona o le susu o le siosiomaga,” o le tala lea a Adriane J. Backes Ruoff o se tagata faigaluega mo tagata lautele. ■

Faamatalaga a le Faatonu:

Faasoa mai lou aafiaga o le Aso o Auu-naga i le LDS.org/service/welfare-75th-anniversary.

FAAFOUGA

O le faafetai mo le ata o loo i le itulau e 73 o le *Liahona* o Oketopa 2011 e tatau ona faitauina “Ata pue na saunia e Megan Tolman.” ■

Faasilasilaina o le Autu o le Mutuale mo le 2012: “Tutulaila ma Susulu Atu”

O le autu o le Mutuale mo le 2012 o le “Tutulaila ma susulu atu, ina ia avea lo outou malamalama ma tagavai mo atunuu” (Mataupu Faavae ma Feagaiga 115:5).

O lenei mau, na tuuina mai o se vaega o se faaaliga i le Perofeta o Iosefa Samita i Sisifo Mamao, Misuri, ISA, i le 1838, sa faatatau i taitai pulefaamalumu o le Ekalesia i lena vaitaimi, ae i le avea ai ma autu o le Mutuale, ua faatatau foi i le autalavou o le vaitausaga 12 i le 18 i le Ekalesia atoa.

E mafai ona faaoga le autu e faatamaoiga ai sauniga amata o le Mutuale, o se autu mo tautalaga a le autalavou mo le sauniga faamanatuga, ma ia tuuina atu ai se taulaiga mo gaoioiga a le autalavou e pei o toluapiga, konafesi a le autalavou, ma faigalotu. E mafai foi ona faaoga e avea ma taulaiga o gaoioiga faapitua faaleaganuu ma isi gaoioiga o siva, musika, ma tala faatino.

Ua fautuaina e taitai o le Ekalesia ia faalauiloa atu e taitai o le autalavou i le lotoifale le autu i se DVD, *Strength of Youth Media 2012: Arise and Shine Forth*, lea o le a auina atu i iunite ia Novema 2011.

O lenei DVD e mafai ona faaaogaina e faaopoopo atu i fonotaga a korama, vasega, ma konafesi a le autalavou, ma isi gaoioiga a le autalavou i le aluga o le tausaga, ma o le a maua i gagana Kenitonisia, Peretania, Farani, Siamani, Italia, Sapani, Korea, Meniterini, Potukale, Rusia, ma le Sipaniolo.

O le a maua isi anomea faaopoopo e lagoonu atu ai i le mekasini o le *Liahona* ma le *New Era* ma i le LDS.org i le amataga o le 2012. ■

Ua Oo Mai le Initoneti i Falelotu i le Lalolagi Atoa

Ua fuafua le Ekalesia ia maua i le 85 pasene o falelotu i le lalolagi atoa le Initoneti e maua-luga lona televave, ma filifili ai pe faaoga se initoneti e leai ni uaea e fetosoai ai.

O le a mafai e le au paia ona maua le saite o galuega a le Ekalesia ma auai i galuega o talafaasolopito o aiga mai o latou falelotu; o le a mafai foi e taitai o le Ekalesia ona vaaia faamau-mauga, auina atu talosaga a faifeautalai, ma auai i faasalalauga faaleaoga mo taitai; ma o le a mafai ona faaoga e faiaoga ia ala o faasalalauga i le initoneti e gaosia e le Ekalesia e faaopoopo atu i a latou lesona. ■

Ua Tuuina Atu e le Ekalesia le Fesoasoani i le Oge i Aferika i Sasae

Faatasi ai ma le silia i le 11.5 miliona tagata i Aferika i Sasae o loo matuai manaomia le fesoasoani i le ogaoga o tulaga o le lamala, ua galulue ai le Ekalesia ma ni faalapotopotoga eseese e ofo atu le toomaga mo le oge e ala i taumafa, vailaau faafomai, sapalai mo le tausiga o le tumama, ma malutaga.

O tagata o le au paia o e fia fesoasoani atu i le taumafaiga e mafai ona foai atu i le tupe mo fesoasoani alofa. ■

Aoaoga Fou mo Faifeautalai i Totonu o le Misiona ua Faalauteleina ai le Poto Masani i le NAF

O se taumafaiga na amataina ia Aokuso 2011 ua aumaia ai se isi 12 vaiaso faaopoopo o aoaoga faamasani i faifeautalai o e ua faatoa tuua le nofoaga autu e aoao ai faifeautalai.

Na faamalamalama mai e Richard Heaton, o le faatonu o le NAF i Provo e faapea, o le aoaoga faamasani i totonu o le misiona e le o se polokalama fou, ae o se faaopoopoga o aoaoga faamasani e maua e faifeautalai i le NAF.

“O Le [tusilesona] o le 12 Vaiaso Muamua o loo faasino atu ai soa taitai ma a latou soa faifeautalai fou i punaoa o loo i le Tala’i La’u Talalelei lea e sili ona latou manaomia i o latou vaiaso muamua e 12,” o lana faamatalaga lea. “O se faafanua o le auala e . . . galulue atoatoa ai o ni auauna a le Atua i le vave e mafai ai.”

E amata faaagaina e toetoe lava o le taimi lena e peresitene o misiona ia mea e faaoga mo le aoaoina o faifeautalai fou ua i le misiona—lea e aofia ai ni pepa o faamatalaga se tolu mo aoaoga faamasani ma ni vaega fou o vitio e suesue ai se soa. ■

Faitau atili i nisi o nei tala—ma le tele o isi tala—i le news.lds.org.



O le Malumalu o San Salvador El Salvador o le malumalu lona 135 a le Ekalesia o loo faagaioia i le lalolagi atoa ae o le malumalu lona fa i Amerika Tutotonu.

Faapaiaina le Malumalu o San Salvador

Sa faapaiaina le Malumalu o San Salvador El Salvador i le Aso Sa, 21 o Aokuso, 2011, e Peresitene Henry B. Eyring, Fesoasoani Muamua i le Au Peresitene Sili. O le malumalu lona fa lea a le Ekalesia i Amerika Tutotonu ma o le malumalu lona 135 lea i le lalolagi atoa.

E tusa ma le 16,000 tagata sa auai i faafiatiaga e lua faaleaganuu i le Aso Toonai, 20 o Aokuso, lea na toe faamatalaina ai le talafaasolopito faaleaganuu tamaoiga o le eria e ala i pese ma siva.

Create.LDS.org Ua Valaaulia ai le Au Paia e Saofagā i Faila Faotiō

Ua valaaulia e le Ekalesia le au paia e auina atu ni musika e sili ona lelei ma isi faila faotiō i le create.lds.org mo le faaagaina i le Leitio Alaleo Mamona ma i isi gaosiga o ala o faasalalauga a le Ekalesia. E mafai ona faitau le au paia i faamatalaga o le valaaulia i le news.lds.org (sue e faaoga ai upu autu “create.lds.org”) ma e mafai ona auina atu faila i le create.lds.org.

Ua Maua i le Initoneti le Oototoga mo le Taimi o Fetufaaiga 2012

Ua faasilasila mai e le au peresitene aoao o le Peraimeri o le autu mo le taimi o fetufaaiga mo le 2012 o le “Filifili le Mea Tonu.” E mafai e au peresitene o Peraimeri ona maua le oototoga i lalo o le **“Primary”** i le vaega **Serving in the Church** o le **LDS.org**.

I tausaga ua mavae, na auina atu ai kopi e 10 o le oototoga i iunite i masina taitasi o lulai, ae ona o le i ai o le initoneti ua le toe faaauina ai le lafoina atu o ia kopi ia lulai, ae o le a otometi lava ona auina atu ia kopi e 3 i iunite taitasi i le oka faaletausaga o mataupu aoaoina. ■

O Se Meafaigaluega Mamana

Sa masani ona ou mauaina le *Liahona*, ae ina ua ou le toe toaga i le lotu, sa seāseā ai ona ou faitauina. I se tasi aso a o ou tapenaina se kapoti sa ou tau atu ai i nisi o kopi tuai lava. A o ou susueina ma matamata i ai, sa ou tosina atu i se tasi o tala. Sa faatatau i se uso o lē sa le toe toaga i le ekalesia mo ni nai tausaga ma sa le'i toe i ai sona faamoemoe e toe foi mai i le lotu. Ae sa tuuina atu e se epikopo musuia se valaauga ia te ia, ma sa ia lafoaia ai ona vaisu leaga ma toe foi mai. O lenei tala sa i ai sona aafiaga loloto ia te au—o le laasaga muamua lea i lo'u toe toaga mai. O lenei la, i ni nai tausaga mulimuli ane, o le *Liahona* o se meafaigaluega mamana i totonu o lo'u aiga. O fautuaga, taiala, ma molimau o loo i totonu o le mekasini e fesoasoani ia i matou i aso uma lava.

Moema Lima Salles Broedel, Pasila

Tala mo Tamaiti—ma Tagata Matutua

O a'u o se tina o se tamaitiiti, ma o po uma a o lei momoe, ou te faitauina ai ia te ia ia tala mo tamaiti mai le *Liahona*. Ua avea foi ma se faamanuiaga mo au, aua ua ou aoao ai e uiga ia lesu Keriso, le Perofeta o Iosefa Samita, faaaloalo, tatalo, ma le tele o isi mea. Ia faifai pea le galuega lelei!

Silvia Ruiz de Muñoz, Ekuatoa

Faamolemole auina mai sou finagalo faaalua po o fautuaga i le liahona@ldschurch.org. E ono faapupuina tala mo le uumi po o le manino. ■

O lenei lomiga e aofia ai tusiga ma gaoioiga e mafai ona faaaoga mo afiifi faaleaiga. O nai faataitaiga nei.

“O Le Iloaina o le Aao o le Atua i o Tatou Faamanuiaga i Aso Taitasi,” itulau e 24: Mafaufau e faitau le Tatalo a le Alii (tagai i le Mataio 6:9–13) ma fesili atu i lou aiga mo ni o latou manatu po o le a le uiga o le “foai mai ia te i matou i le aso nei a matou meaai e tatau mo le aso.” Ona ootoo lea o le vaega muamua o le tusiga, lea o loo talanoaina ai e Elder Christofferson ia “meaai e tatau mo le aso.” Mafaufau e faapoopo atu lau molimau o lesu Keriso o le Areto o le Ola.

“Siaosi Alapati: Sa Soifua e pei ona Ia Aoa Mai,” itulau e 32: Sa talitonu Peresitene Siaosi Alapati Samita “afai e i ai moni sa tatou molimau o le talalelei a lesu Keriso, o le a faaalua lea i o tatou olaga.” Toe faamanatu ma lou aiga le tusiga. Atonu o le a e fesili atu i tagata o le aiga po o le a se mea ua latou aoaoina mai le faataitaiga a Peresitene Samita o le faia o isi tagata ma le agalelei. Fesili atu pe faapefea ona latou faaali atili atu le agalelei.

“Tiloilo i Luga,” itulau e 42: Mafaufau e faasoa atu le aafiaga na oo ia Elder Cook a o avea ma se faifeautalal talavou ona fai lea o se aotelega o vaega o totoe o le tusiga.

Fesili atu i tagata o le aiga pe faapefea ona latou taulai atu i le finagalo o le Tama Faalelagi ia te i latou nai lo manatu o tagata ia i latou. E mafai ona e faaiuina i le faitauina o le 1 Samuēlu 16:7.



“Tausia o Feagaiga,” itulau e 48: Afai o loo sauni se tagata o lou aiga e fai se misiona, atonu e te manao e faitau atoa le tusiga lenei ma saunia se lisi o itu taua na ta'ua e Elder Holland. Ia faamamafa atu le faamatalaga “O le ki lava i le galuega lenei o le tausia o a tatou feagaiga.” Toe faamanatu pe o le a le feagaiga ma fesili atu i tamaiti pe faapefea ona latou saunia i le taimi nei e osia feagaiga.

“O Loo i Ai o la lina,” itulau e 69: Mafaufau e usu le pese “O Le Tatalo a se Tamaitiiti” (*Tusipese a Tamaiti*, 6). Faitau e uiga i le aafiaga o Sister Wixom i le tatalo, ma uunaia tagata o le aiga e faasoa mai o latou lava aafiaga i tatalo faaletagata lava ia. Atonu e te fesili atu, “E mafai ona e mafaufau i se taimi na faamafanafanaina ai oe i le tatalo?” Ia faai i lau molimau i le tatalo. ■

O Se Gaoioiga Malie, o se Savali e Faavavau

A o avea au ma se talavou, sa ou auai ai ma le musuā i afiifi faaleaiga. Sa ou mafaufau faapea, sa i ai au mea e sili atu ona taua e fai.

I se tasi po o le Aso Gafua, ina ua mavae ni nai Afiifi Faaleaiga faigata, sa solo e lo'u tina le laulau o le umukuka ma tuu se tamai pai sieri i luma o i matou taitoatasi. Sa ou ou autilo solo ma le naunautai mo ni tui—ae sa leai se mea! Sa faamalamalama mai e Tina o le a fai le matou tauvaga 'ai pai, ae e le mafai ona matou faaaogaina ni tui po o ni sipuni po o o matou lima. O le tagata e manumalo e maua ni avanoa e gugutu ai.

Sa matou aai i le vave na matou mafaia. E lei leva ae lilo uma le laulau, o matou foliga, e oo lava i o matou lauulu i pai sieri. Ou te le manatua po o ai na manumalo, ae na ou manatua le le mafai ona taofiofi o la'u ata ma sa ou fiafia moni i lo'u aiga. Ou te le'i iloa atoa i lena po, ae o le taimi nei ua ou talisapaia lava le manaia o le i ai o se nofoaga saogalemu ma le alofa e ta'ua o le aiga ma i ai ni tagata e vaaia a'u.

Ou te mautinoa lava sa usu sa matou pese ma fai se lesona i lena po, ma sa tele se taimi na faaalu e lo'u tina e tapena ma faamama ai [le matou fale]. Ae ou te faafetai mo se gaoioiga na aoaoina ai au i se savali e uiga i le taua o aiga lea sa ou manaomia—i lena taimi ma talu mai lena taimi. ■

Heather Mockler Teuscher, Kalefonia, ISA

AOAO MAI LE AU POPOTO

Saunia e George C. Robinson

I le avea ai ma se fomai tipitipi, e masani ona fesiligia a'u pe na faapefea ona ou mauaina o'u tomai. E manatu nisi e ave e se tagata se vasega, matamata i le faiga o se taotoga, ona tuu loa lea o ia e galue. E i ai se faaupuga faaataata i aoaoga faamasani e faapea: e tasi le vaai, tasi le faiga, tasi le aoaoga. Ae peitai, e leai ma se tasi o na faaupuga e moni.

Sa ou mauaina o'u tomai ma le malamalama faapolofesa i lalo o le taitaiga a le toatele o fomai talenia ma onosai. Sa ou amata muamua i le vaavaai mamao mai ona sosoo ai lea ma le vaai latalata. I le mavae ai o se tausaga o le matau, sa tuuina mai ia te a'u ni galuega laiti, o le fesoasoani i le fomai tipitipi ma lona "fesoasoani muamua"—le fomai tipitipi fesoasoani.

Ina ua mavae se isi tausaga, sa faatagaina a'u ou te tu mai i le isi itu o le laulau mai le fomai tipitipi ma avea ma fesoasoani muamua i le taimi o taotoga faigofie. Ina ua mavae se isi tausaga pe lua, sa faatagaina au e avea ma fesoasoani muamua i taotoga e fai sina faigata. Ona amata ai lea ona ou faia taotoga aupito faigofie, e pei o le faaleleia o se totoga pau, ae avea le fomai tipitipi atamai ma o'u fesoasoani muamua.

I lo'u tausaga mulimuli o aoaoga faamasani—i le fitu o tausaga talu ona uma a'u aoga faafomai—na faatagaina ai loa a'u e fai taotoga faigata atu, a e fai le fomai tipitipi ma fesoasoani muamua. Na ou iloina o faiaoga sili ona lelei e mafai ona faagasolo leleia le taotoga e ala i la latou fesoasoani aua e mafai ona latou faaali mai ia te au mea e tatau ona fai i auala manino ma faigofie—o auala na latou aoaoina e ala i lenei lava faiga e tasi o le faufautua.

Ou te le'i talisapaia atoa le taitaiga a nei



I le avea ai ma se tagata aoga fomai tipitipi, o taimi uma lava sa i ai se tagata e sili atu ona poto i o'u autafa. I le avea ai ma se atalii o le Atua, ou te maua foi lena lava avanoa.

fomai tipitipi maoae ma le talenia o e na avea ma o'u fesoasoani muamua seia oo ina maea a'u aoaoga faamasani ma mafai ona ou galue na o a'u lava. Ae peitai, e oo lava i le 30 tausaga muilmuli ane, o loo ou manatua pea o'u faiaoga a o ou faaogaina i aso taitasi ia tomai sa latou tautiga ai e aoao mai, faasino mai, ma faasa'o mai.

Ua le ese lava ma le aoaoina o mataupu faavae o le talalelei. Ua aoaoina i tatou i le upu ma le upu e ala i aafiaga—e se Faiaoga faapalepale. Tatou te vaai atu ia te Ia, mulimuli i Ana faaitaiga, ole atu mo musumusuga, ma e faamanuiaina i tatou

e lo tatou Tama Faalelagi i le taitaiga—lea e masani ona maua mai e ala i le Agaga Paia, o saunoaga a perofeta soifua, o tusitusiga paia, ma isi o e alolofa ma auauna atu. O lo tatou Taiala e peiseai o loo tu i o tatou tafatafa a o tatou maua le to'a, faalauleleia lo tatou ala, tuuina mai faasaoga moomia, tali i fesili, ma ofoina mai le tele ma le tele o le faatuatuaina a o tatou faamaonia lo tatou agavaa ai.

O nisi tagata aoga faafomai tipitipi e naunau lava ia galulue na o i latou, e fai mea i a latou lava ala. E faapena foi ona tatou tau-mafai i isi taimi e galulue e aunoa ma lo tatou Taiala poto. Peitai, ua ou aoaoina, i le tele o tausaga o avea a'u ma fomai tipitipi, e oo mai lava i le taimi nei, ou te moomoo lava mo le ma teufatuina se fesoasoani muamua e sili atu mea na te iloa nai lo a'u—ae maise lava pe afai o tulaga faaletonu ola ma agaga o tagata!

O lo tatou tuputupu ae i le talalelei na amataina i le olaga i le muai olaga, ma faaauau mai ai iinei, ma o le a le masalomia lava le faaauauina pea pe a maea o tatou olaga i le tino. Ae o vaega uma o o tatou aafiaga, na oo muamua i ai lo tatou Faaola, ma faailoa mai tomai e manaomia ina ia tatou manuia ai. Ma ua Ia valaauliaina tagata uma e faalagolago ia te Ia ma Lona atamai. ■



E LE MAFAI ONA KOPINA

O Le Malamalama o le Lalolagi, na saunia e Howard Lyon

“Faauta, o au o le tulafono, ma le malamalama. Ia outou vaavaai mai ia te au, ma tumau e oo i le iuga, ma o le a outou ola ai; aua o ia o le e tumau e oo i le iuga o le a ou tuuina atu i ai le ola faavavau.

“Faauta, ua ou tuu atu ia te outou poloaiga; o lea ia outou tausi au poloaiga. Ma o le tulafono lea ma perofeta, aua ua latou molimau faamaoni ia te au” (3 Nifae 15:9–10).



Ao tatou suesueina le Tusi a Mamona e le tagata lava ia, o ni aiga, ma i totonu o a tatou vasega o le Aoga Sa i lenei tausaga, e mafai ona tatou suesue i nei faamaumauga anamua—e pei ona sa faia e Liae—ma iloa ai ua “manaomia i latou; ioe, ua aoga tele lava ia te i matou, ina ia [mafai] ai ona matou faasaoina o poloaiga a le Alii mo a matou fanau” (1 Nifae 5:21). Tagai i le “Fesoasoani i Tamaiti ia Fiafia i le Tusi a Mamona,” itulau 14, ma le “Sueina o Tali i le Tusi a Mamona,” itulau 16.